

Juãw

Juãw kot tanhmã Jejus kot amnhĩ nhĩpêx to ho pa hã kagà

Juãw na pre kagàja nhĩpêx. Na pre määnên Wam Juãw nê Sikũn Juãw nê Hapuhã Juãw nê Apokarip nhĩpêx. Juãw Paxis kêt axtem Juãw õ. Nê Jejus kôt mẽ pa ho mẽ pa xwỳnhjê hõ na pre. Nê ÿ hã mẽ ahkre ho pa xwỳnhjê hõ na pre. Nom kormã ã amnhĩ nhĩpêx anhỹr o pa hkêt ri na pre kêp tep kanhêr xwỳnh. Nê kêp Jejus kràmnhwỳ mex na pre. Jakamã na pre kagàja nhĩpêx nê kamã Jejus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jejus kêp Tĩrtũm Kra hã harê nê hã kagà. Nê ãm pix kukwak ri Tĩrtũm wa kuri mẽ pahĩr tũm nê mẽ papa ho mẽ papa hã harê nê hã kagà. ã na pre Juãwja mẽ pamã Jejus jarê nê hã kagà anê.

Jejus te kot Tĩrtũm pyrãk ã harênh

Matêwre 1.23; Juãw 8.12, 8.58, 10.30, 20.28;

määnên Atre 10.36; Sikũn Korĩt 4.4; Piripos 2.6-11; Korosê 1.13-17, 2.9;

Xitre 2.13; Eprêw 1.1-4; Wam Juãw 1.1-4, 5.20; Apokarip 1.17-18

1 1Amnepê mã kormã mẽmoj kêt ri nhũm kot Tĩrtũm kapêr o amnhĩrĩt xwỳnhja Tĩrtũm kôt pa ho pa. Te kêp urãk nê pa. Wa kot amnhĩ nhĩpêxja ãm tipxi. Nê wa àhpumunh ãm tipxi. Nê wa hkarõ määnên ãm tipxi. ãm wa tipxi rãhã nê pa ho pa. 2Kormã mẽmoj kêt ri na pre Tĩrtũm kapêr o amnhĩrĩt xwỳnhhta Tĩrtũm kôt ri pa ho pa. 3Nê Tĩrtũm nhỹ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gô xujanãr o kato. Nê kamã mẽmoj piitã Tĩrtũm nhỹ hã ho kator pa. Kop apu mẽmoj to kator kêt ronhỹx mẽmoj amrakati kumrêx.

4Nê Tĩrtũm o amnhĩrĩt xwỳnhhta pix kukwak ri na hte mẽmoj piitã htĩr nê pa. Nê ãm pix kukwak ri na htem Tĩrtũm ri htĩr tũm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamaxpêr nyw o amnhĩrĩt pu mẽ

pahprĩ hã mar mex nẽ. 5Ja kaxyw na pre wrỳ nẽ ri mẽ kãm Tĩrtũm kapẽr jarẽnh o ri mẽ hkõt pa. Jao mẽ kot amnhĩ nhĩpêx nyw jarẽ nhũm mẽ kot amnhĩ tomnuj xwỳnhjaja tee ri kuma nẽ kãm mar prãm kêt nẽ. Nẽ tee ri kãm kapẽr o hapêx prãm kaprỳ.

Juãw Paxis kumrêx kot tanhmã Jejus jarẽnh to hã harẽnh

Matêwre 3.1-3; Makre 1.1-4; Rukre 3.2-6

6Tã nhũm kormã Jejus mẽ kãm kapẽr o pa hkêt ri nhũm Juãw Paxis kumrêx mỗ nẽ hkukamã Tĩrtũm nhỹ hã mẽ kãm tanhmã harẽnh to ho pa. 7Mẽ kãm mẽ kot amnhĩ nhĩpêx nyw nhõr xwỳnh pê Jejus Kris kukamã mẽ kãm harẽnh o ri mẽ hkõt pa. Mẽ kot mar nẽ amnhĩ kaxyw Jejus kõt hamaxpêr kaxyw. 8No Juãw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nẽ. Na pre ãm kot mẽ kãm õr xwỳnhhta kukamã mẽ kãm harẽnh o pa. 9Jakamã na pre hte mẽ kãm harẽnh o ri pa nẽ mẽ kãm harẽnh o:

—E ot pa mẽ amã mẽhõ jarẽnh o ri ixpa. Kot mẽ pamã mẽ pahte amnhĩ nhĩpêx nyw nhõr xwỳnhhta. Kojã tokyx mẽ pakamã pøj pu mẽ omu. Kojã pøj nẽ mẽ piitã mẽ kãm Tĩrtũm kapẽr jarẽnh o ri pa. Mẽ pahte pahprĩ hã mar mex kaxyw. Anẽ.

Tĩrtũm kot mẽ ho hkra hprãm xwỳnhjê jarẽnh

Rõmãn 8.14; Karatas 3.26; Epes 1.5

10Tã nhũm Jejus man kot mẽmoj piitã ho kator xwỳnhhta wỳr wrỳ nẽ mẽ hkõt ri pa. No nhũm mẽ kot kêp mẽmoj piitã ho kator xwỳnh ã omunh kêt jakamã na prem kapẽr ma nẽ ãm kuma nẽ amnhĩ kaxyw hkõt hamaxpêr kêt nẽ. 11Na pre wrỳ nẽ mẽ pakamã ã ho kato. Kêp mẽ pahpiitã mẽ pahto kator xwỳnh tã nhũm mẽ ohtõ nẽ omu nẽ ãm omu nẽ hkõt amnhĩ nhĩpêx kêt nẽ. 12Na prem ãm grêre nẽ kuma nẽ amnhĩ kaxyw hkõt hamaxpêr nẽ hkõt amnhĩ xunhwỳ. Hãmri nhũm amnhĩ tã mẽ omu nẽ mẽ kãm:

—E nã ãm hãmri. Ra mẽ ate amnhĩ kaxyw ixkõt ajamaxpêr nẽ ixkõt amnhĩ xunhwỳr jakamã na ka mẽ ixkukwak ri apê Tĩrtũm kraa. Anẽ.

13Na htem ã kêp Tĩrtũm kra hprãm xaj Jejus kõt amnhĩ xunhwỳr anẽ. No na htem mẽ katorxà nhõxà hkre rũm hapõx kõt kêp Tĩrtũm kra hkêt nẽ. Rỳ amnhĩ krã hkõt tanhmã amnhĩ nhĩpêx to kukwak ri kêp hkra hkêt nẽ. ãm Tĩrtũm tãm kot mẽ ho hkra pix kukwak ri na htem kêp hkra.

Jejus wrỳk nẽ ã ho kator ã harẽnh

Matêwre 1.20; mããnẽn Rõmãn 1.2-4; Pĩrĩpos 2.6-7;

Eprêw 2.9, 4.15; Wam Juãw 4.2

14Jakamã na pre Tĩrtũm o amnhĩrĩt xwỳnhhta mẽ pahwỳr wrỳ nẽ mẽ pakamã ã ho kato nẽ mẽ pakamã pa. Kêp Tĩrtũm Kra hã pixi mex na pre.

Ně kot amnhĩ nhĩpêxja te Tĩrtũm kot amnhĩ nhĩpêx pyræk. Uræk nẽ mex o mex. Nẽ uræk nẽ mẽ pakutã nojarêť xwỳnh. Na pre hte katàť kôt Tĩrtũm kapêr jarênh o ri mẽ hkôt pa. Pa prem kuma nẽ mex o mex ã omu.

15Nhũm Juãw Paxis na pre hkukamã mẽ kãm harênh o ri pa nẽ mẽ kãm:

—E ra ixte mẽ amã harênh o ri ixpa xwỳnhhta na ra pøj. Te pa ixte wa nẽ ixkator pyræk nom amnepê mã kormã ixkêť ri nhũm htĩr rãhã nẽ pa ho pa. Ham ĩ ho kator tã kêp Tĩrtũm Kra jakamã uræk nẽ rãhã ho rãhã hã pa xwỳnh na. Jakamã kot amnhĩ to rax o kot ijakrenh par. Anẽ.

16Nẽ kêp mẽ pakutã nojarêť rãhã nẽ pa ho pa xwỳnh jakamã na hte mẽ pahto mex rãhã pu mẽ kukwak ri pamex nẽ ri papa ho papa.

17Na pre finat Mojesja mẽ panhĩgêťjê mã Tĩrtũm kapêr jarênh o ri mẽ hkôt pa nẽ mẽ kãm:

—Na pre Tĩrtũm mẽ pahte tãm amnhĩ nhĩpêx o papa hã mẽ pamã karõ. Jakamã kot puj mẽ kot mẽ pamã mẽmoj tã karõ xà hkôt ã amnhĩ nhĩpêx anhỹr o papa nẽ ra tãm amnhĩ nhĩpêx o papa. Anẽ.

Nhũm pre Mojesja ã mẽ kãm kapêr o pa anẽ. Hãmri nhũm mẽ kuma no ãm tee ri kãm Tĩrtũm kôt tãm amnhĩ nhĩpêx o pa hprãm kaprỳ. Jakamã nhũm hpãnhã Jejus Krisja wrỳ nẽ mẽ pamã kapêr õ ho kapêr o pa nẽ mẽ pamã:

—E mẽ ate Tĩrtũm kôt amnhĩ nhĩpêx o apa hkêť tã nhũm arĩ kãm mẽ ajapê nẽ. Nẽ kãm mẽ ato mex prãm. Jakamã kot kaj mẽ amnhĩ to awỳ nhũm tanhmã mẽ akrã hto ka mẽ ra tãm ri amnhĩ nhĩpêx o apa. ãm hãmri na pa ã mẽ amã ja jarênh anẽ.

Anhỹr o mẽ pamã Tĩrtũm kapêr jarênh o pa. Tĩrtũm kapêr na mex o mex.

18Nẽ aa mẽ pahtõ mẽ pahte pano ho Tĩrtũm pumunh kêt. ãm Kraja pix na kot no ho omunh. Kaxkwa kamã kuri ri pa ho pa jakamã kot omunh mex. Nẽ te kot Hipêêxàja pyræk jakamã na pre wrỳ nẽ hprĩ hã tanhmã kute hã mẽ pamã harênh o pa. Jakamã na pu mẽ ra pahpiitã Tĩrtũm kot amnhĩ nhĩpêx ã omu nẽ mar mex nẽ.

Juãw Paxis kot mẽ kãm Jejus jarênh o pa hã harênh

Matêwre 3.1-12; Makre 1.1-8; Rukre 3.15-17; mããnên Atre 19.4

19-28Na pre Juãw Paxis ma hkwỳjê hkôt mẽ kãm Jejus jarênh o pa nhũm mẽ hkwỳjaja kuma nẽ amnhĩ kaxyw Jejus kôt hamaxpêr nẽ hkôt amnhĩ xunhwỳ. Hãmri nhũm Juãw Paxis ja hã mẽ omu nẽ Tĩrtũm mã mẽ hkrã kumrã. Pyhti pê Jotãw nhĩkjê hã krĩ pê Petãn tã ri mẽ hkrã kumrãr o pa. Hãmri nhũm krĩ pê Jerujarê kamã Ijaew krãhtũmjaja harênh ma nẽ ma hwỳr hkwỳjê rê. Mẽ kot tanhmã hkukjêť to nhũm kot mẽ kãm tanhmã amnhĩ jarênh to kaxyw. Jakamã nhũm mẽõ patre hkwỳjê mẽ Tĩrtũm mã amnhĩ jarênh xà hã ixkre kamã mẽ ho ajuta

xwÿnh kwÿjê mẽ Parijew nhõ xwÿnh kwÿjê mẽ nhũm mẽ ma hwÿr mra. Juāw Paxis wÿr mra nẽ omu nẽ kãm:

—Pa. E ot pa mẽ awÿr mra. Kwa mẽ inhmã amnhĩ jarẽ. Apê mẽ atõ na ka we? Xà ka na apê Tĩrtũm kot mẽ ixkaxyw axãm mã xwÿnhnta na ka nà? Xà ka na pa htem amnhĩ wÿr akamã ijamak o ixpa? Anẽ.

Hãmri nhũm mẽ kuma nẽ mẽ kãm: “Nà pa hkêt.” Anẽ hãmri nhũm mẽ kãm:

—Tõ mãn xep apê amnepê mã Tĩrtũm nhÿ hã kapêr jarênh xwÿnh pê finat Erisja. Hã na ka tanhmã amnhĩ to nẽ akupÿm atĩr nẽ mẽ ixkõt apa nà? Anẽ.

Hãmri nhũm mẽ kãm:

—Nà ixpê Eris kêt. Anẽ.

Hãmri nhũm mẽ kãm:

—Tõ mãn xep apê finat Mojes kot mẽ kãm harênh o pa xwÿnhnta na ka nà? Anẽ.

Hãmri nhũm mẽ kuma nẽ kê axte mẽ kãm:

—Nà ixpê tãm kêt. Anẽ.

Hãmri nhũm mẽ tee ri kot ã amnhĩ tã aprãr anhÿrja ma nẽ kãm:

—Kwa apê jajê hõ hkêt tã na ka hte mẽ hkrã kumrãr o ri apa. Kwa nà akatãt kõt mẽ inhmã amnhĩ jarẽ. Pa mẽ ama nẽ ma akupÿm mra nẽ mẽ kot awÿr mẽ ixrênh xwÿnhjê mã tanhmã ajarênh to. Tanhmã na ka hte mẽ kãm amnhĩ jarênh to ho ri apa? E kwa mẽ inhmã amnhĩ jarẽ pa mẽ ama. Anẽ.

Hãmri nhũm tã hprĩ hã mẽ kãm amnhĩ jarẽ. Amnepê mã mẽ hkukamã Tĩrtũm nhÿ hã kapêr jarênh xwÿnh pê finat Ijais kot hkukamã tanhmã harênh to nẽ hã kagà xà hkõt nhũm mẽ kãm amnhĩ jarẽ nẽ mẽ kãm:

—Tõe. Nà kot paj ixprĩ hã mẽ amã amnhĩ jarẽ ka mẽ inhma. Amnepê Tĩrtũm kapêr jarênh xwÿnhjê hõ pê finat Ijaisja na pre hte mẽ kãm mẽhõ hkukamã harênh o ri pa. Mẽhõ kot mẽ panhõ Pahihti hkukamã htẽm nẽ kapõt ã kutêp mẽ kãm harênh o pa xwÿnhnta nhũm pre hkukamã harênh o ri pa. Nẽ mẽ kãm harênh o:

Koja nhÿrmã mẽhõja kapõt ã mõn pøj nẽ mẽ kãm tanhmã

ujarênh to ho ri pa. Nẽ mẽ kãm ujarênh o: “E mẽ inhma.

Koja Tĩrtũm tokyx mẽ pahwÿr mẽ panhõ Pahihti mẽ nhũm

wrÿ nhũm mẽ piitã omu. Jakamã kwa mẽ tokyx kutêp tãm

amnhĩ nhĩpêx o ri apa. Te ho mẽ kot mẽhõ kutêp pry ho

mex pyrãk o amnhĩ nhĩpêx o ri pa. Jao amnhĩ nhĩ ho tãm

amnhĩ nhĩpêx nẽ tãm axpẽn nhĩpêx o ri apa. Pahihtita

kutêp.”

—Anhÿr o na pre hte finat Ijaisja kot Pahihti hkukamã harênh o ri pa xwÿnhnta kukamã harênh anẽ. Tã paa. Pa na pre Ijaisja ã ixkukamã

ijarênh anhÿr o pa. Pa na pa hte ã Pahihti kutêp mẽ kãm harênh o ri ixpa anê. Tã ã ixte harênh anhÿr xwÿnhhta na ra mẽ pakamã pa ka mẽ kormã ja hã omunh kêt nê. Kukamã na pa hte mẽ piitã mẽ kot hkôt amnhÿ xunhwÿr ã mẽ omunh kaxyw gô pix o mẽ hkrã kumrãr o ri mẽ hkôt ixpa. Nom na pre ra mẽ pahwÿr Tirtûm kot mẽ pakaxyw ãm xwÿnhhta tãm mẽ pahwÿr wrÿ. Àhpumunh tÿx o kot ijakrenh jakamã na pa hte ãm kukwak ri ixpa nê amnhÿ tã hã xpijaàm o ri ixpa. Anê.

Juãw Paxis kot mẽ kãm Jejus jahkre hã harênh

Matêwre 3.11; Makre 1.10; Rukre 3.22

29Tã nhûm apkati nhûm Juãw Paxis amnhÿ wÿr Jejus pumu nê mẽ kot mar o kuhê xwÿnhjê mã ìhkra ho ahkre nê mẽ kãm:

—E. Onêj Tirtûm kot mẽ pakaxyw ãm xwÿnhhta tẽ. Mẽ pahpê Ijaew na pu htem xatã pahte amnhÿ tomnuj pãnhã amnhÿrer kaxyw Tirtûm mã pahkrit ôwêhti hkra nyw kwÿ hpa nê ho amnhÿ pãnhã kãm amnhÿrer o papa. No kêt htêm nêj koja nhÿrmã kãm mẽ pahpiitã mẽ pahte amnhÿ tomnuj pãnhã amnhÿrer pa. 30Na pa pre ra mẽ amã harênh o: “Te pa ixte wa nê ixkator nê ixtir nê ixpa pyrãk. Nom amnepêm kormã ixkêt ri na pre htir rãhã nê pa ho pa. Nê ì ho wrÿk nê jar kator tã kêp Tirtûm Kra jakamã urak nê rãhã nê pa ho pa xwÿnh na. Jakamã kot amnhÿ to rax o kot ijakrenh par.” Anhÿr o pa pre mẽ amã harênh o ri ixpa ka prem inhma.

31—Ixte mẽ amã ã harênh anhÿr tã ijaxwÿja kormã ixte kêp Tirtûm Kra hã omunh kêt nê ãm hkukamã Tirtûm nhÿ hã mẽ amã ã harênh anhÿr o ri ixpa. Nê hkukamã Tirtûm mã mẽ akrã kumrãr o ri ixpa. Tã na pa kêp Tirtûm Kra hã omu nê ã mẽ amã ahkre anê ka mẽ omu. Anê.

32-33Nhûm pre ã Juãw Paxis mẽ kãm Jejus jahkre anê nê mẽ kãm:

—Nà Tirtûm na pre ixte mẽ akrã kumrãr o ixpa kaxyw inhmã hã karõ. Tã na inhmã kot mẽ pakaxyw ãm xwÿnhhta o amnhÿrit nê inhmã harênh o: “Koja nhÿrmã Ixkarõja mēhõ hwÿr wrÿ nê kuri arik. Ka ja hã omu nê kêp Ixkra hã omunh kurê kumrêx. Koja amnhÿ xõ ri amnhÿ pyrã nê mẽ kãm Ixkarõ nhõr o pa nhûm mẽ hkarõ mã agjê.” Anhÿr o inhmã harê. Tã na pa ra omu. Na pre Tirtûm Karõ kaxkwa rûm te tuuti pyrã nê hwÿr wrÿk o tẽ nê ìkre hã xa. 34Pa ã kot hipêx anhÿr ã omu nê kêp Tirtûm Kra hã omunh kurê kumrêx. Jakamã na pa ã mẽ amã ahkre nê mẽ amã harênh anê. Anê.

Juãw Paxis kôt pa xwÿnh wa kot Jejus kôt pa hã wa harênh

Atre 19.4

35Tã nhûm apkati nhûm Juãw Paxis axte Jejus pumu. Kot hkôt ri pa ho pa xwÿnh mẽ wa nhÿri xa nê omunh o xa. 36Nhûm ra mẽ hãnh tẽ nhûm Juãw Paxis omu nê hkôt ri pa xwÿnh wa kãm:

—E oněj Tirtùm kot mẽ pakaxyw ãm xwỳnhhta tẽ. Něj koja mẽ pahte amnhĩ tomnuj pãnhã amnhĩre. Anẽ.

37Hãmri nhũm wa kuma nẽ omu nẽ ma hkõt tẽ nẽ hã ajêt. 38Nhũm wa omu nẽ wa kãm: “Pa mo na?” Anẽ nhũm wa kot kêp mẽ ahkre xwỳnh ã omunh jakamã kãm:

—Nà wa ixte ma akõt ixtẽm nẽ nhỹri anhõrkwỹ pumunh mã na pa wa akõt tẽ. Anẽ.

39Hãmri nhũm wa kãm:

—Tõe. Nà wa kam nẽ rĩ ma ixkõt tẽ. Anẽ.

Hãmri nhũm wa kuma nẽ ma hkõt wa tẽ nẽ õrkwỹ hwỳr pøj nhũm ra amỹkry nhũm wa hkõt axà nẽ kuri ỹr o kamàt hãmri nẽ kato nẽ ma akupỹm tẽ. 40Kõt htẽm xwỳnhjê hõta na pre kêp Andre. Simãw Pêtre htõ na pre. Nẽ kaxyw hõja. Wa kumã na pre Juãw Paxis Jejus jahkre nẽ harẽ nhũm wa ma hkõt tẽ. Tã wa ra akupỹm wa tẽ. 41Hãmri nhũm Andreja htõ Simãw wỳr tẽ nẽ kãm:

—Kwa na pa wa jarãhã Tirtùm kot mẽ pakaxyw ãm xwỳnhhta pumu. Ma pu hwỳr ka wa ixwar ano ho omu nà. Anẽ.

Ijaew kapêr kãm “Tirtùm kot mẽ pakaxyw ãm xwỳnh” anhỹrja te kot Gres kapêr kãm “Kris” anhỹr jarẽnh pyràk. Ijaew na prem ã Jejus jarẽnh anẽ nẽ harẽnh o: “Tirtùm kot mẽ pakaxyw ãm xwỳnh.” Anhỹr o harẽ. 42Jakamã nhũm ã Andreja htõ mã harẽnh anẽ nẽ ma akupỹm hwỳr o tẽ. Nẽ wa hwỳr pøj nhũm wa omu. Wa kêp Juãw kra hã wa omu hãmri nẽ Simãw mã kapêr nẽ kãm:

—Pa Simãw. Nà apê Simãw tã kot paj axte atã anhĩxi hõ mẽ. Kot kaj mããnẽn apê Septi. Anẽ.

Mẽ pakapêr kãm Septija te kêp “kẽn” jarẽnh pyràk. No Gres kapêr kãm te kêp “Pêtre” jarẽnh pyràk. No Ijaew kapêr kãm kêp “Septi.” Jakamã nhũm pre Jejus ã Simãw Pêtre hã hixi mẽnh anẽ.

Jejus kot amnhĩ kõt Firipti mẽ Natãnaew wa hwỳr ã harẽnh

43-44Tã nhũm apkati nhũm ra Jejus pyka pê Garirej wỳr nojarêt nẽ nhỹri Firipti pumu. Firiptija Andre mẽ Simãw Pêtre wa uràk nẽ krĩ pê Pesêj nhõ xwỳnh na pre. Jakamã nhũm Jejus nhỹri omu nẽ amnhĩ kõt kuwỳ nẽ kãm:

—E kwa ma ri ixkõt apa ho apa. Anẽ.

45Hãmri nhũm kuma nẽ ma tẽ nẽ nhỹri Natãnaew pumu nhũm nhỹri pĩ hpàr parpê nhỹ nhũm omu nẽ kãm:

—Kwa na pa jarãhã finat Mojes kot amnepêm mẽhõ hã kagà xwỳnhhta pumu. Tirtùm kot mẽ pakaxyw ãm xwỳnhhta na. Tirtùm nhỹ hã kapêr jarẽnh o mẽ pa xwỳnhjaja kot hkukamã harẽnh nẽ hã kagà xwỳnhhta. Kêp Najare nhõ xwỳnh nẽ mããnẽn kêp finat Juje hkra. E kwa tokyx pu hwỳr ka ixkuxwar ano ho omu. Anẽ.

46Hãmri nhũm tee ri kot tanhmã harẽnh toja ma nẽ kãm:

—Tk. Kokỹ. Najare nhõ xwỳnh piitã kot amnhĩ to mexti hã kot kêt we hõ kệp Tĩrtũm kot mẽ pakaxyw ãm xwỳnh. Anẽ.

Hãmri nhũm kãm:

—Kwa nà ã akapẽr anhỹr kêt nẽ. Ma ixkõt tẽ nẽ ixpyrà nẽ ano ho omu mãn. Nẽ rĩ ã ri akapẽr anẽ. Anẽ.

Hãmri nhũm kuma nẽ ma hkõt tẽ. 47Hãmri nhũm Jejus amnhĩ wỳr wa omu nẽ kuri mẽ kuhê xwỳnhjê mã Natãnaew jarẽnh kurê kumrẽx nẽ harẽnh o:

—E onẽj Ijaew õja mẽ pahwỳr hpõx o tẽ. ãm hãmri na hte tãm amnhĩ nhĩpêx o pa. Na hte higêt finat Jako kurom hêx rom ri tanhmã mẽ kãm amnhĩ to hêx to ho pa hkêt nẽ. Na hte ãm kapẽr mex pix o ri kapẽr o pa. Anẽ.

48Hãmri nhũm tee ri amnhĩ tã kuma nẽ kãm:

—Kwa mẽhõ na pre ã amã ijarẽnh anẽ? Aa ixte nhỹri apumunh kêt kumrẽx tã ka ri ãm hãmri ã ijarẽnh anẽ. Anẽ.

Hãmri nhũm kãm:

—Nà mẽhõ kot tanhmã inhmã ajarẽnh to hkêt. ãm pa na pa hte inhno ho apumunh o ixpa. Kormã Firipti kot awỳr htẽm nẽ amã ijarẽnh kêt ri pa ra ixprĩ hã inhno ho apumu. Na ka kormã pĩta parpê nhỹ pa apumu. Anẽ.

49Hãmri nhũm tee ri kot hprĩ hã harẽnh ã amnhĩ tã kuma nẽ kãm:

—Kwa mẽ ijahkre xwỳnh. Pẽr ãm hãmri apê Tĩrtũm Kra kumrẽx jakamã na ka ã ijarẽnh anẽ. Xep ka na mẽ ixte amnhĩ wỳr akãm ijamak o ixpa xwỳnhhta na ka. Nà ka na apê mẽ ixpê Ijaew nhõ Pahihti. Anẽ.

50Hãmri nhũm Jejus kuma nẽ kãm:

—Nà ãm hãmri na ka ixte pĩ hpar pê apumunh ã ajarẽnhja ma nẽ hkõt pix mã ixpê Tĩrtũm Kra hã ixpumu. Tã kot kaj ja nhĩrõ pê axte mẽmoj mex o kot ja jakrenh pumu. 51Koja nhỹrmã kaxkwa axkjê nhũm Tĩrtũm kapẽr o mẽ wrỳk xwỳnhjaja kurũm axpẽn japa ka mẽ omu. Finat Jako pyrã nẽ mẽ omu. Ixte Tĩrtũm kot mẽ akaxyw ixãm xwỳnh wỳr koja mẽ ã wrỳk nẽ amnhĩ nhĩpêx anẽ ka ja hã mẽ omu. Kwa jam ajamaxpẽr tỳx rãhã ho apa. Anẽ.

Jejus kot gõ ho mẽ kãm wĩhti nhĩpêx ã harẽnh

2 1Tã nhũm apkati axkrut nẽ hapêx nhũm Jejus arĩ Garirej kamã pa. Nhũm krĩ pê Kanã kamã axpẽn mã wahõj wa rer kaxyw nhũm Jejus katorxà ma mẽ hwỳr mõ. 2Hãmri nhũm mẽ amnhĩ wỳr Jejus mẽ hkõt ri mẽ ixpa xwỳnhjê wỳ pa mẽ ijaxwỳja ma mẽ hwỳr mõ nẽ ra mẽ hwỳr põj. 3Hãmri nẽ mẽ hkõt wa hã ixkĩnh nẽ apku nẽ wĩhti hkwy ho ixkõm o ixkrĩ. Tã nhũm ra wĩhti mẽ kệp hapêx nhũm Jejus katorxàja harẽnh ma nẽ Jejus mã harẽ nẽ kãm:

— Xê Jejus. Na xep ra mẽ kêp wĩhti hapêx pa. Xàt ka tanhmã mẽ ho ajuta hto mẽ? Anẽ.

4Hãmri nhũm kãm:

— Tôe. Kwa tee ri ajamaxpêr kêt nẽ. Kot paj tanhmã mẽ kãm ho. Nom kot paj kormã ixpê Tĩrtũm kot mẽ akaxyw ixãm xwỳnh ã pa kormã amnhĩ to amnhĩrit kêt nẽ. Anẽ.

5Hãmri nhũm katorxà kuma nẽ mẽ kãm mẽ àpênh xwỳnhjê hwỳr tẽ nẽ mẽ kãm:

— An koja Jejus mẽ awỳr tẽ nẽ tanhmã mẽ amã mẽmoj tã karõ hto ka mẽ ama nẽ kãm ho anhỳr kurê kumrêx. Anẽ.

6Nhũm mẽ kuri kên o poti kêp 6 nẽ kuhê. Piitã umpỳm rũnh kumrêx. Kojã hõ pyxi nẽ nỳt nẽ kamã gô kêp 80 rit nẽ hkwy kamã kêp 100 rit. Ijaew na htem apkur kaxyw nẽ amnhĩ nhĩhkra kuhõnh japjê rũnh nẽ kormã apku. Nẽ apkur pa nẽ axte amnhĩ nhĩhkra kuhõ. ã mẽ kot xatã amnhĩ nhĩhkra kuhõnh jakamã nhũm pre htem amnhĩ ri ã poti rũnh kwỳ xunhwỳr anẽ. No nhũm ra hkapyr nẽ kuhê. 7Hãmri nhũm Jejus tẽ nẽ omu mẽ àpênh xwỳnhjê mã kãm:

— E mẽ ma mra nẽ gô ru nẽ ho poti kuhê mỳj piitã ho nỳt pa. Anẽ.

Nhũm mẽ kuma nẽ ma mra nẽ ho nỳt pa. 8Hãmri nhũm mẽ kãm:

— Nà hãmri. Pãnã hõ kamã gô hkwy janhi nẽ o tẽ nẽ mẽ anhõ patrãw mã agõ kê hkwy ho ixkõ nẽ kamã ama. Anẽ.

Hãmri nhũm mẽ mar xà hkõt kãm hkwy janhi nẽ hwỳr o tẽ nẽ kãm kugõ. 9-10Nom nhũm gõja arĩ kêp gô kumrêx kêt nẽ. Jejus kot tanhmã ho jakamã nhũm ra hpãnã kêp wĩhti. Jakamã nhũm mẽo patrãw wỳr hkwy ho tẽ nẽ kãm kugõ nhũm hkaki nẽ kamã ama. Nom Jejus kot gô ho hipêx ã omunh kêt nẽ. ãm htỳx ho wĩhti kumrêx ã hkamnhĩx nẽ mex kumrêx ã hkaki. Hãmri nẽ amnhĩ wỳr mjên nyw xwỳnh mã hpa ho apê nhũm hwỳr tẽ nhũm kãm:

— Kwa na htem wĩhti mex o wa nẽ mẽ kãm kugõ hãmri nhũm mẽ hpenh pa nhũm mẽ rĩ kormã hkõt omnu ho hapu nẽ mẽ kãm kugõ. Tã ka pêr mẽ axtem nẽ wam mẽ kãm omnu nhõr pa hãmri nẽ kormã mex kumrêxja o hapu nẽ mẽ kãm agõ. Kêp wĩhti ja na mex kumrêx. ãm mex o mex. Anẽ.

Jejus kot gô ho hipêx ã omunh kêt jakamã nhũm ã kãm kapêr anẽ. ãm mẽ àpênh xwỳnh pixjaja na prem ja hã omu. 11Nhũm Jejus kormã mẽ kãm aa mẽ kot mẽmoj pumunh kêt õ ho anhỳr kêt tã krĩ pê Kanã kamã ã mẽ kãm amnhĩ nhĩpêx anhỳr o hkra. Jao amnhĩ to rax o amnhĩ to rax ã mẽ inhmã amnhĩ to amnhĩrit. Pa mẽ ixpê hkõt ri ixpa xwỳnhjaja ã kot amnhĩ nhĩpêx anhỳr ã omu hãmri nẽ kêp Tĩrtũm kot mẽ pakaxyw ãm xwỳnh ã omunh kurê kumrêx.

12Tã nhũm Jejus hpãnã ma krĩ pê Kapanaũ hwỳr mõ. Pa mẽ hkõt ri ixpa xwỳnhjaja nẽ katorxà nẽ htõjaja pa mẽ ma ixpiitã hkõt mõ.

Hãmri nê hwÿr pøj nê kamã mẽ hkôt ixpa hã ixtã apkati grêre nê ma hpãnhã krí hõ hwÿr ixpa.

Jejus kot Tirtũm nhõrkwÿ hwÿr àr ã harênh

Matêwre 21.12-13; Makre 11.15-19; Rukre 19.45-46

13Tã nhũm ra arĩgro pê Pas ahtêp o mõ. Pasa ã mẽ ixpê Ijaew na pa htem amnepêm Tirtũm kot pika pê Ejit rúm mẽ inhĩgêjtê kator mã ijamaxpêr kaxyw axpên wÿr akuprõ nê hã ixkĩnh. Jakamã nhũm Jejus ma hkwÿjê hkôt krí pê Jerujarê hwÿr mõ. Pa mẽ ixpê hkôt ri ixpa xwÿnhjaja pa mẽ ma hkôt ixpa. Hãmri nê hwÿr pøj 14nê Tirtũm mã amnhĩ jarênh xà hã ixkre hwÿr mra nê ixkre puhã kahêja wÿr agjê. Nhũm mẽ kamã axtem nê mẽmoj to wênê ho kuhê. Mõx o wênê nê ôwêhti ho wênê nê tutre ho wênê ho kuhê. Mẽ kot haprôr nê ho Tirtũm mã hkĩnh xà kaxyw mẽ kãm ho wênê. Nê kàxpore ho pinhpanh xwÿnhjaja haxwÿja mẽ kuri hkrí. 15Hãmri pa mẽ Jejus kôt mẽ hwÿr agjê nê ja hã mẽ omu hãmri nhũm Jejus pê ja omnuj tÿx nê. Jakamã nhũm tee ri mẽ omu hãmri nê amnhĩm mry hkà ho mẽ htak xà nhĩpêx nê ho ixkreja nê mẽ piitã mẽ kator pa. Nê mõx nê ôwêhti nê mẽmoj piitã kator pa. Nê kàxpore ho pinhĩpanh xwÿnhjaja nhũm mẽ kêp mẽ õ mẽsti rênh pa nhũm mẽ hikàxpore pykap rôrôk pa nê anhgrã nê hikwÿ. 16Hãmri nhũm Jejus tutre ho wênê xwÿnhjê mã kãm:

—Kwa mẽ anhõ tutre jamÿ nê tokyx ma mra. Na htem Inhĩpêêxà nhõrkwÿ kamã mẽmoj to wênê hkêti nê. Kêp mẽ ujaarôr xà hã ixkre hkêti. E kwa mẽ tokyx ma mra. Anê.

Nhũm pre ã mẽ kãm kapêr anê nhũm mẽ tee ri kuma hãmri nê ma mrar kurê kumrêx. 17Pa mẽ hkôt mẽ ixpa ho ixpa xwÿnhjaja ã kot mẽ hipêx anhÿr ã omu hãmri nê ra Tirtũm kapêr ã kagà htũm kot ã amnhĩ nhĩpêx anhÿrja kukamã hã kagàta mã ijamaxpêr kurê kumrêx. Kagà kot amnepêm Jejus kukamã te ra ã kapêr anhÿr pyrãk o harênh. Nê harênh kot:

Na pa hte Tirtũm nhõrkwÿ ho mex rãhã ho ixpa. Nhũm mẽmoj punuj hwÿr axà pa omu nhũm ja inhmã mex kêt nê.

Anhÿr o kot hkukamã harênh jakamã na pa mẽ ã Jejus kot mẽ hipêx anhÿrja ã omu hãmri nê ra hkukamã hã kagàta mã ijamaxpêr kurê kumrêx.

Ijaew krãhtũmjaja kot Jejus kukjêr ã mẽ harênh

18Tã nhũm Ijaew krãhtũmjaja tee ri Jejus kot ixkreja nê mẽ kator ã omu hãmri nê hwÿr mra nê kãm:

—Pa. Kwa mon ka ri ã Tirtũm mã amnhĩ jarênh xà hã ixkreja nê mẽ kator anê? Mêhõ na we mẽ ixwÿr amê ka ÿ hã ã mẽ hipêx anêhti? Nà xà Tirtũm na mẽ ixwÿr amê? E mẽ inhmã aa mẽ ixte mẽmoj pumunh kêt õ

ho anē. Pa mē ja hã apumu hãmri nē Tirtūm kot mē ixwÿr amēnh xwÿnh ã apumunh kurê kumrêx. E kwa tokyx mē inhmã ho anē. Anē.

19Hãmri nhūm mē kuma nē mē kãm amnhĩ jarē. Nom amnhĩ tã kuxi nē mē kãm awjarē nē mē kãm:

— Nã kot paj aa mē ate mēmoj pumunh kêt õ ho pixi nē mē amã ho anē ka mē omu. Tirtūm nhõrkwÿ jaa. Kot kaj mē agrã pa ixtã apkati axkrunēpxi nē akupÿm hipêx ka mē ja hã ixpumu.

20-22 Anhÿr o mē kãm kapēr. No ãm ixkreja jarēnh kêt nē. Na pre ãm amnhĩ tã kuxi nē ã mē kãm kapēr anē. Mē kot hpĩr nhūm htyk ã apkati axkrunēpxi nē akupÿm htĩr ã mē kãm ã amnhĩ jarēnh anē. Te mē kot Tirtūm mã amnhĩ jarēnh xã hã ixkreta grãnh nhūm hã apkati axkrunēpxi nē akupÿm kot hipêx parta pyrãk ã hã kuxi nē ã mē kãm amnhĩ jarēnh anē. Jakamã nhūm mēhprĩ hã mar mex kêt nē. ãm tee ri kuma nē kãm:

— Tk. Kwa ixkre ja na prem hipêx kaxyw nē hã amgrã xohtõ rax nē hipêx. Hã amgrã pê 46 nē hipêx par kēnã kot ka kêt atã apkati axkrunēpxi pix nē akupÿm hipêx. Anē.

Mē kot hprĩ hã mar kêt jakamã na prem ã kãm kapēr anē. Pa mē hkõt mē ixpa ho ixpa xwÿnhjaja ã mē kãm kapēr anhÿrja ã kuma nē hã inhnõhtÿx rãhã ho ri ixpa. Tã nhūm mē kot Jejus pĩr nhūm hã apkati axkrunēpxi nē akupÿm htĩr nhõ arĩgrota ã pa mē kot ã amnhĩ jarēnh anhÿrja mã ijamaxpēr kurê kumrêx. Nē axpēn mã:

— Hēxta waa nē. Xep ãm hãmri na pre Pahihti amnhĩ kukamã ã amnhĩ jarēnh anē. Mē kot hpĩr nhūm htyk ã apkati axkrunēpxi nē akupÿm htĩr ã amnhĩ kukamã amnhĩ jarēnh mex nē. Te mē kot Tirtūm nhõrkwÿ grãnh par nhūm hã apkati axkrunēpxi nē akupÿm hipêx ã amnhĩ jarēnh pyrãk. ãm hãmri na pre amnhĩ kukamã ã amnhĩ jarēnh anē. Anē.

Jejus kot mē pajamaxpēr kõt mē pahpumunh ã harēnh

23Tã nhūm Jejus mē hkõt mē ixpa ho ixpa xwÿnhjaja arĩ Jerujarē kamã ri ixpa ho ixpa. Nhūm ra arĩgro pê Pasja kato nhūm mē piitã hkĩnh kaxyw axpēn wÿr akuprõ. Nhūm Jejus mē kãm aa mē kot mēmoj pumunh kêt kwÿ ho anhÿr o ri mē hkõt pa. Nhūm mē omu nhūm mē hkwÿjaja Tirtūm kot mē pakaxyw ãm xwÿnh ã hkõt hamaxpēr tã no ãm hkõt hamaxpēr tÿx kêt nē. 24Jakamã nhūm Jejus amnhĩ tã mē hamaxpēr ã mē omu nē hamaxpēr o:

— Nã mē kot ixkõt hamaxpēr kryre xwÿnhjaja koja mē hã apkati grēre nē ixto hamakētkati nē htÿx ri pa. Anē.

25Jejus kot mē pahte pahtÿx ri amnhĩ tomnuj o papa hã mē pahpumunh par. Nē pahtÿx ri pajamaxpēr punuj o papa hã mē pahpumunh par. Jakamã na pre ã mē harēnh anē.

Jejus mẽ Nĩkotẽ wa kot axpẽn mã kapẽr ã wa harẽnh

Juãw 1.12-13; mããnẽn Wam Pẽtre 1.23

3 1Tã nhũm Parijew nhõ xwỳnhjê õ pê Nĩkotẽ. Mããnẽn kệp Ijaew krãhtũmjê hõ. 2Jakamã na pre Jejus jarẽnh ma nẽ kãm omunh prãm nẽ. Hãmri nẽ hkwỹ pymaj kamàt kãm hwỳr tẽ nẽ omu nẽ kãm:

—Pa mẽ ijahkre xwỳnh. E ot pa awỳr tẽ. Ra mẽ ixte apumunh mex. Tĩrtũm na pre ate mẽ ijahkre ho apa kaxyw mẽ ixwỳr amẽ ka mẽ ixwỳr wrỳ. Mẽhõ koja apyrà nẽ aa mẽ inhmã mẽ kot mẽmoj pumunh kêt kwỳ ho anhỳr o pa? Nà amrakati kumrẽx. Kop apu Tĩrtũm kot mẽ ixwỳr amẽn kêt ronhỳx ka ã amnhĩ nhĩpẽx anhỳr kêt nẽ. Anẽ.

3Hãmri nhũm kuma nẽ tanhmã kãm kapẽr to. No ãm amnhĩ tã kuxi nẽ kãm awjarẽ nẽ kãm:

—Na htem piitã mẽ katorxà nhõxà hkre rũm hapõj. Tã Tĩrtũm kãm mẽ piitã axte mẽ hapõx prãm. Jakamã kot kaj mẽ akator o axkrut kêt nẽ hãmri nẽ nhỹrmã Tĩrtũm ri atĩr tũm nẽ apa ho apa hkêt nẽ. ãm hkrajê pix na htem kuri htĩr tũm nẽ pa ho pa. Jakamã kwa jam ajamaxpẽr tỳx nẽ ri ho apa. Anẽ.

4Hãmri nhũm Nĩkotẽja kuma nẽ tee ri ã kot kãm kapẽr anhỹrja kukamã hamaxpẽr nẽ kãm:

—Kwa ra ixaptàr kẽnã kot pa kêt tanhmã amnhĩ to nẽ akupỹm ixkatorxà nhõxà hkre hwỳr axà nẽ axte kurũm ixkato. Anẽ.

5-7Hãmri nhũm Jejus kãm:

—Nà na hte mẽ hkrarejaja mẽ katorxà nhõxà hkre rũm kagõ hkõt hapõj hãmri nẽ kệp katorxà mẽ hipêxà wa hkwỹy. Jao wa kot amnhĩ nhĩpẽx kõt amnhĩ nhĩpẽx o pa. Ja pyrà nẽ ka mẽ atõ amã apê Tĩrtũm kra hprãm hã kot kaj amnhĩ to awỳ nhũm wa Ixkarõja akarõ mã axà hãmri ka ra apê hkraa. Te ra axte akator pyràk o amnhĩ nhĩpẽx. Nẽ te mẽ hkra kot katorxà nẽ hipêxà wa kot amnhĩ nhĩpẽx kõt amnhĩ nhĩpẽx o pata pyrà nẽ apãm Tĩrtũm kot amnhĩ nhĩpẽx kõt amnhĩ nhĩpẽx o ri apa. Nom koja Tĩrtũm mẽ wa Ixkarõja akarõ mã àr kêt nẽ ka apê hkra hkêt nẽ. Jao te axte akator kêt pyràk o amnhĩ nhĩpẽx. Jakamã na pa amã te ate akator pijakrut o amnhĩ nhĩpẽx pyràk o amã ã ja jarẽnh anẽ. Kwa jam ajamaxpẽr tỳx rãhã ho ri apa. No ama nẽ tee ri amnhĩ kukamã ajamaxpẽr kêt nẽ.

8—E pa ixprĩ hã amã ja jarẽ ka inhma. Na hte kòk kãm nhỹhỹm àpêr prãm xà hkõt àpêr o pa. Pu mẽ kamã ama no ãm pano ho nhỹhỹnh mõr xà hkõt omunh kêt nẽ. Nẽ nhỹhỹm ma mõr xà hkõt omunh kêt nẽ. Ja pyrà nẽ na hte Tĩrtũm mẽ wa Ixkarõja mẽ hkaxwỳnh mã agjê nẽ mẽ ho Tĩrtũm kra nom nhũm mẽhprĩ hã kot tanhmã mẽ ho hã amnhĩ tã omunh kêt nẽ. Anẽ.

9Hãmri nhũm Nĩkotẽ ã Jejus kot kãm kapẽr anhỹr ã kuma nẽ tee ri hamaxpẽr nẽ kãm:


—Kwa na pa ixprĩ hã amar kêt nẽ. Anẽ.

10Hãmri nhũm kãm:

—Kwa mon ka hte Tĩrtũm kapẽr tũm o Ijaew jahkre ho apa tã aprĩ hã ixkapẽr mar kêt nẽ? 11Ixte mẽmoj pumunh xà hkõt ixte mẽ amã harẽnh o ixpa htã ka mẽ apẽ Ijaew krãhtũmjaja mẽ amã ixkapẽr mar prãm kêt nẽ. ã mẽ ate anhỹr kumrẽx. Kwa jam ajamaxpẽr tỳx nẽ. 12Na pa ra Tĩrtũm kot jar tanhmã amnhĩ nhĩpêx to hã harẽnh o ixpa htã ka mẽ am ama nẽ ixkõt ajamaxpẽr kêt nẽ. Jakamã xà kot pa hpãnhã mẽ amã kaxkwa kamã tanhmã kot amnhĩ nhĩpêx to hã harẽ ka mẽ ama nẽ mar tỳx nẽ? Nà kot ka mẽ ama nẽ am ama nẽ hkõt ajamaxpẽr kêt nẽ. 13Mẽhõ na we ra ma kaxkwa hwỳr api nẽ kamã mẽmoj mex pumu nẽ man akupỹn mẽ awỳr wrỳ nẽ mẽ amã tanhmã harẽnh to? Nà amrakati kumrẽx. Am paxipix ixpẽ Tĩrtũm kot mẽ akaxyw ixãm xwỳnh na pa pre amnẽ kurũm mẽ awỳr wrỳ hãmri nẽ ixprĩ hã mẽ amã tanhmã harẽnh to ho ri ixpa.

14—Amnepẽm finat Mojesja kormã kapõt ã mẽ o pa ri na pre mẽ kãm kax o kagã karõja nhĩpêx nẽ kỳxpẽ mẽ kãm kunhõ. Kagã kot mẽ hkamnar xwỳnhjaja kot hwỳr rĩt nẽ omunh nẽ akupỹm mex kaxyw mẽ kãm kunhõ. Tã ixpẽ Tĩrtũm kot mẽ akaxyw ixãm xwỳnh kot paj nhỹrmã kagã karõta pyrã nẽ kỳx pẽ pĩ kahpa hã ajêt. 15Ka mẽ te mẽ kot kagã karõ pumunh nẽ akupỹm mexta pyrã nẽ amnhĩ kaxyw inhmã ajamaxpẽr nẽ ixkõt amnhĩ xunhwỳ hãmri nẽ nhỹrmã Tĩrtũm mẽ wa ixri atĩr tũm nẽ amex rãhã nẽ apa ho apa.

16—Tĩrtũm kãm pika piitã hkõt mẽ apiitã mẽ ajapê htỳx. Nẽ mẽ ajapê xaj na pre ixpẽ Kra hã ixpyxi hã mẽ awỳr inhmẽ. Ka mẽ atõ amnhĩ kaxyw ixkõt ajamaxpẽr nẽ ixkõt amnhĩ xãm. Hãmri nẽ nhỹrmã atyk tã nhũm Tĩrtũm akupỹm ato atĩr ka wa ixkuri atĩr tũm nẽ amex rãhã nẽ apa ho apa. Hãmri nhũm Tĩrtũm aa amnhĩ nẽ nhỹhỹm amẽnh kêt kumrẽx. 17No mẽ ate amnhĩ tomnuj mỳrapẽ tanhmã ixte mẽ anhĩpêx to kaxyw na pre mẽ awỳr inhmẽnh kêt nẽ. Am ixkukwak ri mẽ atĩr tũm nẽ mẽ amex rãhã apa ho apa hprãm xaj na pre mẽ awỳr inhmẽ pa mẽ awỳr wrỳ. 18Jakamã kot ka mẽ atõ amnhĩ kaxyw ixpẽ Tĩrtũm Kra hã ixkõt ajamaxpẽr nẽ ixkõt amnhĩ xãm nhũm Tĩrtũm ixtã apumu nẽ



Juãw 3.14-17

ate amnhĩ tomnuj mÿrapê tanhmã anhĩpêx to hkêt nê. No kêt mẽ kot ixkôt amnhĩ xunhwÿr kêt xwÿnhjaja na Tĩrtũm ma mẽ kot amnhĩ xà htÿx kamã hamak tũm xà hwÿr mẽ pa mã xwÿnhjê hã mẽ harê. Mẽ kot ixkôt amnhĩ xunhwÿr kêt mÿrapê. Anê.

Mẽ kot amnhĩ tomnuj o hpimxur prãm kaprÿ ã mẽ harênh

19Nhũm Jejus arĩ Nĩkotê mã kapêr nê kãm:

—Na pre Tĩrtũm amnê pika hwÿr mẽ awÿr inhmê. Mẽ ate amnhĩ tomnuj xwÿnh ã amnhĩ pumunh kaxyw mẽ awÿr inhmê. Tã nhũm mẽ ohtô nê amnhĩ tomnuj gryk ã kãm kapêr mar prãm kêt nê. Jao ixkaga nê kãm ixkapêr mar prãm kêt nê. 20Ra ixprĩ hã ixte mẽ kot tanhmã amnhĩ tomnuj to ho pa hã mẽ omunh mex jakamã mẽ kãm ixkapêr mar prãm kêt. Nê ixte mẽ kot tanhmã amnhĩ tomnuj to ho pa hã mẽ harênh pymaj ixkôt kãm pa hprãm hkêt nê. 21No kêt mẽ kot ixkôt amnhĩ xunhwÿr xwÿnhjaja na mẽ kot amnhĩ nhĩpêx o pa hã hpijaàm kêt. Na htem ànnhĩx ixkôt amnhĩ nhĩpêx o pa. Jakamã koja mẽ piitã ja hã mẽ omu nê Tĩrtũm kot tanhmã mẽ hkrã hto nhũm mẽ ra kãm hkôt pix mã amnhĩ nhĩpêx ho pa hprãm ã mẽ omunh kurê kumrêx. Anê.

Nhũm pre ã Jejus Nĩkotêja mã kapêr anê.

Juãw Paxis kot Jejus jarênh o pa hã harênh

Juãw 1.19-28

22Tã pa mẽ ixpê Jejus kôt ri ixpa ho ixpa xwÿnhjaja Jejus kôt Jerujarê rũm ijapôj nê pika pê Jutej kwÿ kamã ixpa. Jejus nhÿ hã Tĩrtũm mã mẽ hkrã kumrãr o ri mẽ hkôt ixpa. 23Nhũm finat Juãw Paxis haxwÿja mẽ ixpyrà nê mẽ hkrã kumrãr o pa. Krĩ pê Sarĩ htã krĩ pê Enõ mÿri pyhti rax jakamã nhũm pre htem hwÿr mra nhũm kamã mẽ hkrã kumrã. 24Kormã mẽ kot haxàr kêt ri nhũm kamã mẽ hkrã kumrãr o pa.

25Rôm nhũm Ijaew hõja Juãw Paxis kôt mẽ pa ho mẽ pa xwÿnhjê hwÿr tẽ nê Juãw Paxis kot mẽ hkrã kumrãr ã tanhmã mẽ hkukjêr to nhũm mẽ kuma nê tee ri hã axpên kukjêr o kuhê. 26Hãmri nê akupÿm Juãw Paxis wÿr tẽ nê kãm:

—Kwa mẽ ijahkre xwÿnh. Pyhti pê Jotãw nhĩkjê hã ate mẽhõ pumunh nê tanhmã mẽ inhmã harênh to xwÿnhhta kôt mẽ pa ho mẽ pa xwÿnhjaja na xep htem apyrà nê mẽ hkrã kumrãr o pa nhũm xep mẽ ra ohtô nê mẽ pahkaga nê mẽ hkôt pa. Kwa xà ja amã mex nà? Anê.

27Hãmri nhũm mẽ kuma nê mẽ kãm:

—Tÿ ja mex kênã. Tĩrtũm kãm hprãm xà hkôt na htem mẽ hwÿr mra nhũm mẽ ixpãnhã mẽ hkrã kumrã. Nà ja mex. 28Ixpê Tĩrtũm kot mẽ pakaxyw ãm xwÿnh kêt. Na pa pre ra mẽ amã ja hã amnhĩ jarê ka prem inhma. ãm hkukamã na pre Tĩrtũm amnê inhmê pa mō nê ã jar ri ixpa anê.

29—Te ixte mẽ umre kot amnhĩ nhĩpêx pyràk. Na htem axpên mã mẽ rer kaxyw nhũm mẽ umreja myta wỳr tẽ nẽ hpa hã kupy nẽ ma ni hwỳr o tẽ nẽ axpên mã wa kure. Hãmri nhũm hpãnhã mễhõja axpên tã wa hakre. Nhũm umreja wa kuri hkĩnh nẽ mar o xa. Tã te ixte mẽ umre kot amnhĩ nhĩpêx pyràk jakamã koja mẽ ma Tĩrtũm kot mẽ pakaxyw ãm xwỳnhhta wỳr mra nẽ kapêr ma pa mẽ harênh ma nẽ ixkĩnh nẽ. 30Na htem mẽ umre hã hkĩnh kêt nẽ. Mjên nyw xwỳnhja ã na htem hkĩnh. Tã ja pyrà nẽ koja mẽ axte ixte mẽ kãm Jejus jarênh mar kaxyw ixwỳr mrar kêt nẽ. ãm hwỳr koja mẽ hpãnhã mra nẽ tãm mar o kuhê. Ja mex kumrêx. 31Jesús kêp kaxkwa rũm amnẽ mẽ pahwỳr wrỳk xwỳnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwỳnh jakamã Jejus kĩnhã mẽ pahte mẽmoj piitã omunh tohtuj anhỳr. Nẽ pika nhõ xwỳnhjê jamaxpêr pix o pajamaxpêr o ri papa.

32—Na hte Jejus mẽ kãm kaxkwa kamã kot mẽmoj pumunh xwỳnh kwỳjê jarênh o pa. Nẽ kamã kot mẽmoj mar xwỳnh kwỳ jarênh tã nhũm mẽ ohtô nẽ kuma nẽ ãm kuma. 33No mẽ kot mar nẽ amnhĩ kaxyw hkôt hamaxpêr xwỳnhjaja na htem kuma nẽ axpên mã harênh o: “Nà ãm hãmri na ã Tĩrtũm kapêr jarênh anẽ. Nà Tĩrtũm kapêr mex kumrêx.” Anhỳr o axpên mã harê.

34—Tĩrtũm na pre mẽ pahwỳr Jejus mẽ nhũm amnẽ mẽ pahwỳr wrỳ nẽ Tĩrtũm Karõ nhỹ hã mẽ pamã kapêr jarênh o ri mẽ pahkôt pa. 35Tĩrtũm kãm Krata japê htỳx kumrêx jakamã na pre ãhkram mẽmoj piitã haxàr pa nhũm uràk nẽ hihtỳx o hihtỳx nẽ mẽmoj piitã ho amnhĩptàr o pa. 36Jakamã mẽ kot amnhĩ kaxyw hkôt hamaxpêr nẽ hkôt amnhĩ xunhwỳr xwỳnhjaja koja mẽ nhỹrmã wa kuri htĩr tũm nẽ mex rãhã nẽ pa ho pa. No mẽ kot hkaga xwỳnhjaja koja mẽ ã amnhĩ nhĩpêx anhỳr kêt nẽ. Koja Tĩrtũm mẽ kot amnhĩ xà htỳx kamã hamak tũm xàta wỳr mẽ rênh pa. Anẽ.

4 1Tã nhũm Parijew nhõ xwỳnhjaja Jejus jarênh ma. Nẽ hkôt mẽ pa xwỳnhjaja ohtô rax o Juãw Paxis kôt mẽ pa xwỳnhjê jakrenh ã mẽ harênh ma. Nẽ Jejus kot mẽ hkrã kumrãr rax o Juãw Paxis jakrenh ã harênh ma. 2Nom Jejus na pre mẽ hkrã kumrãr kêt nẽ. ãm mẽ ixte hkôt ri mẽ ixpa ho mẽ ixpa xwỳnhjaja na pa prem kãm mẽ hkrã kumrãr o ri ixpa. 3Jakamã nhũm Jejus amnhĩ tã Parijew nhõ xwỳnhjê jarênh ma hãmri nẽ mẽ kêp kato nẽ hpãnhã ma akupỳm Garirej wỳr mỗ pa mẽ ma hkôt ixpa.

Mễhõ ni kot amnhĩ nhĩpêx nyw o amnhĩ nhĩpêx ã harênh

Juãw 7.37-39; mããnẽn Apokarip 22.1, 22.17

4Tã pa mẽ mỗ nẽ kormã pyka pê Samar mã axà nẽ hkôt ixpa. 5Hãmri nẽ krĩ pê Sika hwỳr ixpôx o mỗ. Amnepê m finat Jako kot hkra Juje mã pyka nhõr xwỳnh tã krĩa xa pa mẽ ra hwỳr ixpôx o mỗ. 6Nẽ amnepê m

Jako kot gôm kakwÿnhhta wÿr pøj. Nhũm ra kaxkwa nhĩpøk ri myt nhÿr mẽ nhũm Jejus ra mrar ryy kurê hkêngrà nê. Hãmri nê gôm kakwÿnh mÿ ri tẽm nê hkôkôt o nhÿ. 7-8Hãmri pa mẽ kure nê mẽ ixàpkur xà japrôr kaxyw ma krĩm ijapêx.

Rôm nhũm Samar nhõ xwÿnh nija amnhĩm gô runh mã tẽ nhũm Jejus omu nê kãm:

—Kwa inhmã anhõ gôta kwÿ pa ho ixkõ. Anê.

9Nhũm amnhĩ jaêr pê amnhĩ tã kuma. Ijaew na pre htem Samar nhõ xwÿnhjê kutã apkur rÿ mẽ hkôt ri pa rÿ mẽ ho mjên kêt nê. Rÿ mẽ kutã hkôm kêt nê. Tã nhũm Jejus ã gô hã nija wÿr anê nhũm tee ri amnhĩ tã kuma nê kãm:

—Xê pêr apê Ijaew tã axtem nê ri gô hã ixwÿ. Xà ate ixpê Samar nhõ xwÿnh ã ixpumunh kêt? Hãn ka ri hã ixwÿ. Anê.

10Hãmri nhũm kuma nê kãm amnhĩ jarê. No ãm amnhĩ tã kuxi nê kãm kapêr nê kãm:

—Nà aprĩ hã ate ixpumunh ro nhÿx ka kam gô hã ixwÿ pa amã hkwÿ. Inhõ gô na axte mã. Tĩrtũm kãm amarĩ mẽ amã òr prãm. Na htem ho ixkõ hãmri nê mex nê htĩr tũm nê pa ho pa. Anê.

11Hãmri nhũm tee ri kot ã õ gô jarênh anhÿrja ã kuma nê htÿx ho gôm kakwÿnh kamã gô hã hkamnhĩx nê tee ri hkukamã hamaxpêr nê kãm:

—Xê tanhmã kot ka kêt amnhĩ to nê inhmã gôta kwÿ janhi? Mo kaxyw anhõ gô janhir xà? Gôm kakwÿnhhta upÿm rax kênã kot ka kêt tanhmã amnhĩ to nê hkwÿ janhi. Nhÿhÿnh kot ka anhõ gô jarênh xwÿnhhta kwÿ janhi pa ho ixkõ hãmri nê ixĩr tũm nê ixpa ho ixpa? 12Mê inhõ gôm kakwÿnhja amnepê mã mẽ panhĩgêt finat Jako nhõ gôm kakwÿnh na pre. Jako hkwyjaja na prem hkakwÿ nhũm kamã gô kato nhũm pre htem hanhi nê ho hkôm o pa. Nê hkrajaja nê hkrit piitã ho hkôm o pa. Jakamã na pre mẽ ixpê hkanrêhã htãmnhwÿjê mã hkaga. Tã xep axtem anhõ gô. Mẽ kot ho hkôm nê htĩr tũm kaxyw na xep. Jakamã xê xà ate amnhĩ to rax o mẽ panhĩgêt Jako jakrenh mẽ? Anê.

13Hãmri nhũm Jejus kãm:

—Nà mẽ anhõ gôta na htem ho ixkõ nê arĩ kãm kôr o pa. 14No ixte amã gô jarênh xwÿnhhta kot ka hkwy ho ixkõ hãmri nê axte amã kôr kêt kumrêx nê apa. Nhũm te akaxwÿnh kãm hinore hprôt pyrãk o ka amnhĩ nhĩpêx. Hãmri nê te hinore kamã gôja aa grã hkêt pyrã nê aa ajapêx kêt kumrêx. Nhÿrmã atyk tã akupÿm atĩr nê atĩr tũm nê amex rãhã apa ho apa. Anê.

15Nhũm nija kuma hãmri nê kãm:

—Xôwehe? Xê tô tokyx inhmã anhõ gôta kwÿ. Pa ho ixkõ nê axte inhmã kôr kêt nê ixpa. Nê axte amnê amnhĩm gô janhir mã inhmarr kêt nê. Xê tokyx inhmã hkwy mẽ? Anê.

Tÿx gô kumrêx ã hkamnhĩx nê ã hã àhwÿr anê. 16Hãmri nhũm kãm:

— Tô ma akupÿm krĩm tẽ nẽ amjên japrô nẽ man akupÿn ixwÿr wa tẽ. Anẽ.

17Hãmri nhũm tee ri kuma nẽ kãm:

— Ma mo inhmjên? Inhmjên kêt na pa hte ri ixpa. Anẽ.

Hãmri nhũm kãm:

— Tÿ. Nà ãm hãmri na ka ã amnhĩ jarẽnh anẽ. 18Na ka pre ra amjên kêp 5. Nẽ my mẽ ri war apa xwÿnh ata te kêp amjên pyrãk nom kêp amjên kumrẽx kêt. Anẽ.

19Hãmri nhũm amnhĩ jaêr pê kot ã kãm kapêr anhÿrja ma hãmri nẽ kãm:

— Xê pẽr aprĩ hã ate ixpumunh par pyrãk. Mãn apê Tĩrtũm nhÿ hã kapêr jarẽnh o mẽ pa xwÿnhjê hõ mãn ka mẽ? 20Xê inhmã mẽmoj jarẽ. Nhÿhÿm kot paj wem axpẽn kôt mra nẽ Tĩrtũm mã mex o mex ã harẽ? Amnepê mã mẽ panhĩgêjtaja na prem hixêt mũj nhĩmõk ã api nẽ hã kãm amnhĩ jarẽ nẽ kãm mex o mex ã harẽ. No mẽ apê Ijaew na ka htem krĩ pê Jerujarẽ pix kãm mẽ ixte axpẽn kôt mrar nẽ ã amnhĩ nhĩpêx anhÿr ã mẽ inhmã karõ. Xà hixêt nhĩmõk ã mẽ ixte kãm amnhĩ jarẽnhja xà apê omnuj mẽ? Ma xà apê omnuj kêt? Anẽ.

21Hãmri nhũm Jejus kãm:

— Nà kot kaj mẽ nhÿrmã ãm Jerujarẽ pix kãm rÿ hixêt mũj nhĩmõk pix ã axpẽn wÿr akuprô nẽ Tĩrtũm mã amnhĩ jarẽnh kêt nẽ. 22Mẽ apê Samar nhõ xwÿnhjaja mẽ ate Tĩrtũm mã mex o mex ã harẽnh o apa htã aprĩ hã kot amnhĩ nhĩpêx ã omunh kêt. Nẽ tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhĩpêx to nẽ tanhmã hamaxpêr to hã omunh mex. Mẽ inhĩõ kukwak ri koja Tĩrtũm mẽ kot hkôt amnhĩ xunhwÿr xwÿnh piitã nẽ mẽ kot amnhĩ tomnuj rênh pa. 23Tã koja mẽ piitã Mẽpahpãm Tĩrtũm mã mex o mex ã harẽnh kaxyw nhÿhÿm pa hkêt nẽ. Koja mẽ nhÿri pa xà kamã mẽ õpinh xà kaxwÿnh kãm ã kãm amnhĩ jarẽnh anhÿr o pa. Ja na Tĩrtũm kãm hprãm. No nhÿhÿm mrar nẽ nhÿri kuhê xà pix kamã kãm amnhĩ jarẽnhja nhũm kãm hprãm kêt nẽ.

24— Nẽ Tĩrtũmja mẽ pahpyrà nẽ ã hkêt jakamã na te kaxkwa nẽ pika piitã hkôt pa ho pa. Jakamã na htem nhÿri pa nẽ õpinh xà kaxwÿnh kãm amnhĩ kaxyw kãm hamaxpêr nẽ kãm mex o mex ã harẽ nhũm ra amnhĩ tã mẽ kuma. ã mẽ kot amnhĩ nhĩpêx anhÿrja na kãm hprãm. Anẽ.

25Nhũm pre ã Jejus nija mã kapêr anẽ nhũm kuma nẽ kãm:

— Ma koja xep nhÿrmã Tĩrtũm kot mẽ pakaxyw ãm mã xwÿnh pê Krisja mẽ pahwÿr wrÿ hãmri nẽ hprĩ hã mẽ pamã mẽmoj piitã ho amnhĩrĩt pu mẽ kuma. Anẽ.

26Hãmri nhũm kãm:

— Kwa nhũm paa. Ixte amã ixkapêr xwÿnhja ixpê Kris na pa. Jakamã na pa ixprĩ hã amã ã ixkapêr anẽ. Anẽ.

27Nhũm pre ã kãm amnhĩ jarẽnh anhỹrja rôm pa mẽ ixte hkôt ri mẽ ixpa ho ixpa xwỳnhjaja ra ixujaprôr pa nẽ akupỹn hwỳr ixpôx o mra. Hãmri nẽ amnhĩ jaer pê kot Samar nhõ xwỳnh nita mã kapêr ã omu nẽ tee ri hkukamã ijamaxpêr nom tanhmã hã hkukjêr to hkêt nẽ. Nija kêp Samar nhõ xwỳnh tã nhũm àmnhĩx kãm kapêr o nhỹ. Pa mẽ omu nẽ ãm omu nẽ tanhmã hã kãm nẽ hkêt nẽ. 28Hãmri nhũm nita gôm kakwỳnh mỳr ri õ poti re nẽ ma akupỹm krĩm tẽ nẽ hkwỳjê mã awjarê. 29Nẽ mẽ kãm:

— Xê mẽ tokyx ma ixkôt gôm kakwỳnh wỳr mra nẽ mỳ ri mẽhõ my mũj pumu. Tĩrtũm kot mẽ pahwỳr mẽnh mã xwỳnhnta na. Aa kot nhỹri ixpumunh kêt tã kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nẽ ixpyrà nẽ kapêr ã ama. Anẽ.

30Hãmri nhũm mẽ kuma nẽ ma hkôt Jejus wỳr mrar kurê kumrêx.

31Rôm pa mẽ ixte Jejus kôt ri ixpa ho ixpa xwỳnhjaja tee ri mẽ ixàpkur xà ho Jejus ma nẽ kãm:

— E ota mẽ panhõta. Kwa mẽmoj py nẽ aku mãn.

32Anhỹr tã nhũm mẽ inhma nẽ tanhmã mẽ inhmã amnhĩ jarẽnh to. Nom amnhĩ tã kuxi nẽ amnhĩ jarẽ nẽ mẽ inhmã:

— Nà kormã. Inhõja axtem na. Mẽ ate inhõja pumunh kêt. Anẽ.

33Hãmri pa mẽ kuma nẽ tee ri hã axpên kukja nẽ axpên mã:

— Kwa mãn ra mẽhõ mẽ paxwakre kamã kãm mẽmoj to tẽ nhũm kukrê nà? Anẽ.

34Hãmri nhũm mẽ inhma nẽ mẽ inhmã:

— Nà mẽhõ kot kêt ri inhmã mẽmoj to mra pa kuku? Kot paj kot mẽ awỳr inhmẽnh xwỳnhnta mã tanhmã amnhĩ nhĩpêx to hãmri nẽ te ra ixàpkur mex nẽ hã ixihĩtx mex pyræk o amnhĩ nhĩpêx. Tã kot paj ã kãm amnhĩ nhĩpêx anhỹr o ri ixpa rãhã ho ijapêx pa. Jao te ixàpkur rax pyræk.

35Anhỹr o mẽ inhmã amnhĩ jarẽ. Hãmri nẽ ra Samar nhõ xwỳnhjaja mẽ ixwỳr mrar ã mẽ omu nẽ mẽ inhmã tanhmã mẽ harẽnh to nom mẽ hã kuxi nẽ mẽ harẽ nẽ mẽ harẽnh o:

— Kot kaj mẽ axte mẽ atã mytwrỳ kêp 4 hãmri nhũm ra mẽ apur kãm mẽ anhõja hamỳnh mã tãm nẽ. Nom kormã. E ka mẽ pahwỳr mẽ mrar xwỳnh něj pumu. Ra mẽ kot amnhĩ kaxyw ixkôt hamaxpêr nẽ ixkôt amnhĩ xunhwỳr mã tãm jakamã te mẽ apur kãm ra mẽ anhõ jamỳnh mã tãm pyræk. Jakamã ka mẽ atõ ma mẽ hwỳr mõ nẽ mẽ kot amnhĩ kaxyw ixkôt hamaxpêr nẽ ixkôt amnhĩ xunhwỳr kaxyw mẽ kãm ijarê. Hãmri nẽ te ate ixpur kãm inhmã inhõ jamỳnh xwỳnh pyræk o amnhĩ nhĩpêx.

36— Jakamã koja mẽhõ kumrêx mẽ hwỳr tẽ nẽ mẽ kãm Tĩrtũm kapêr jarẽ hãmri nẽ te kêp õ pahi mã hpur kãm ahkre ho pa pyræk. Nhũm mẽ kot mar xwỳnhjaja kuma nom kormã hprĩ hã mar tỳx kêt nẽ. Tã kot kaj mẽ atõ wanta kôt mẽ hwỳr tẽ nẽ mẽ kot ixkôt amnhĩ xunhwỳr kaxyw

apří hã mẽ kãm ijarênh o mẽ hkôt apa hãmri nê te apê mẽ anhõ pahi mã hpur kãm axujamýnh xwýnh pyræk. Hãmri nhũm mẽ hkwýjaja mẽ ama nê ixkôt amnhĩ xunhwý nê ixkôt ri amnhĩ nhĩpêx o pa. Hã koja nhỹrmã mẽ apyrà nê Tĩrtũm mẽ wa ixri mex rãhã nê htĩr tũm nê pa ho pa. Ka mẽ amnhĩ tã mẽ omu nê akĩnh nê apa. Te mẽ kot mẽ hpur kãm ahkre xwýnhjaja nê mẽ kot hamýnh xwýnhjaja mẽõ rũnh pumunh nê hkĩnhhta pyræk.

37—Na htem tũhã ã mẽ pur kãm mẽ àpênh xwýnhjê jarênh anê nê mẽ harênh o: “Axtem mẽ ahkre xwýnhjaja nê axtem mẽ kot hamýnh xwýnhjaja.” Anê. Tã te mẽ ate mẽ ujarênh ja pyræk. 38Na pa pre ra ma mẽ hwýr mẽ arê. Mẽ ate aprĩ hã mẽ kãm ijarênh nhũm mẽ kot mẽ amar nê amnhĩ kaxyw ixkôt hamaxpêr nê ixkôt amnhĩ xunhwýr kaxyw. Nom mẽ kajaja na ka prem akumrêx mẽ hwýr amrar nê mẽ kãm ijarênh kêt nê. Tĩrtũm kapêr jarênh o mẽ pa xwýnhjaja na prem kumrêx mẽ hwýr mra nê ixkukamã mẽ kãm ijarênh o ri mẽ hkôt pa. Te mẽ kot hpur kãm ahkre ho pata pyræk. Tã kot kaj mẽ hpãnhã mẽ kot amnhĩ kaxyw ixkôt amnhĩ xunhwýr kaxyw aprĩ hã mẽ kãm ijarênh o apa. Jakamã te mẽ ate mẽ hpur kãm mẽõ jamýnh xwýnh kot amnhĩ nhĩpêxta pyræk. Anê.

Mẽ hkwý kot amnhĩ nhĩpêx nyw o amnhĩ nhĩpêx ã mẽ harênh

Sikũn Korĩt 5.17; Wam Juãw 4.14

39Rũm nhũm Samar nhõ xwýnh kwýjaja nija kot mẽ kãm amnhĩ jarênh ma hãmri nê uræk nê amnhĩ kaxyw Jejus kôt hamaxpêr. Na pre ra amnhĩ tã tanhmã mẽ kãm Jejus jarênh to nê mẽ kãm harênh o:

—Ma aa kot nhỹri ixpumunh kêt tã ra kot hprĩ hã ixpumunh par. Ixte tanhmã amnhĩ nhĩpêx to hã ixpumunh par.

Anhỹr jakamã nhũm mẽ kuma nê uræk nê amnhĩ kaxyw hkôt hamaxpêr kurê kumrêx.

40Hãmri nê man mẽ ixwýr mra nê Jejus pumu nê amnhĩ wýr kuwý nê kãm:

—Pa. E kwa mẽ tokyx anojarêr kêt nê. Mẽ ma mẽ ixkôt mẽ inhõ krĩ hwýr mõ nê mẽ ixkôt ri apa grire nê arĩ ma mõ. Anê.

Hãmri nhũm mẽ kuma nê mẽ kãm:

—Tõe. Nà kot paj mẽ anê. Anê.

Hãmri pa mẽ ma mẽ hkôt mõ nê mẽ õ krĩ kamã mẽ hkôt ri ixpa hã apkati axkrut. 41Nhũm Jejus mẽ kãm Tĩrtũm kapêr jarênh o ri mẽ hkôt pa nhũm mẽ axte ohtõ nê kuma nê nita pyrà nê hkôt amnhĩ xunhwý. 42Hãmri nê nita wýr mra nê kãm:

—E nã ãm hãmri. Akumrêx na ka mẽ inhmã Jejus o amnhĩrĩt. Pa mẽ akôt ma hwýr mra nê mẽ pam omu nê kapêr ã kuma. Jao apyrà nê amnhĩ kaxyw hkôt ijamaxpêr nê hkôt amnhĩ xunhwý. Pêr ãm hãmri kêp pyka piitã hkôt mẽ pahte amnhĩ tomnuj pãnhã amnhĩrer mã xwýnhhta na. Anê.

Garirej nhõ xwÿnhjaja kot Jejus pumunh ã mẽ harênh

Matêwre 13.57

43Tã pa mẽ Jejus kôt Samar rûm ixkato nẽ ma pika pê Garirej wÿr mõi. Kamã Jejus nhõ krĩ pê Najare htã pa mẽ hwÿr inhmõr kêt nẽ. 44Na pre ra Jejus mẽ inhmã tanhmã õ krĩ nhõ xwÿnhjê jarênh to nẽ mẽ harênh o:

—Tirtûm nhÿ hã kapêr jarênh o mẽ pa xwÿnhjaja na htem amnhĩ nhõ krĩ kamã mẽ kãm Tirtûm kapêr jarênh o pa nhûm mẽ kuma nẽ ãm kuma. Jakamã kot paj Najare hwÿr inhmõr kêt nẽ. Mẽ kãm ixkapêr mar prãmre hã.

45Anhÿr jakamã na pa prem hwÿr inhmõr kêt nẽ. Pãnhã nhãm krĩ hõ hwÿr mõi nẽ hwÿr pøj hãmri nhûm mẽ amnhĩ wÿr Jejus pumu nẽ hkĩnh nẽ. Na prem ra krĩ pê Jerujarê kamã arĩgro pê Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wÿr omu nẽ hkĩnh nẽ.

Jejus kot mẽhõ hkra ho mex ã harênh

46Tã pa mẽ kormã Garirej kamã ixpa nẽ akupÿm krĩ pê Kanã hwÿr mõi. Kamã na pre Jejus mẽ kãm gõ ho wĩhti nhĩpêx. Jakamã pa mẽ akupÿm mẽ hwÿr mõi. Nhûm mẽõ pahi nhõ kôwenatôjê hõ hkra myja kêp à htÿx nẽ nõ. Nom Kanã kamã hkêt axtem krĩ hõ pê Kapanãũ kamã. 47Jakamã nhûm hipêêxàja tee ri hkra pumu hãmri nẽ ra Jejus kot Jutej rûm Kanã hwÿr hpõx ã harênh ma nẽ hkra kaxyw kãm hamaxpêr nẽ ma hwÿr mõi kurê kumrêx. Hãmri nẽ nhÿri omu nẽ hwÿr tẽ nẽ kãm kapêr kãm hihtÿx nẽ kãm:

—Pa. E ot pa awÿr tẽ. Na ra ixkra ixpê htyk kaxyw. Kwa ixkamã axukapri nẽ ma ixkõt mõi nẽ akupÿm inhmã ho mex. Anẽ.

48Hãmri nhûm kuma nẽ kãm:

—Kwa pêr ãm ixte mẽ amã aa mẽ ate mẽmoj pumunh kêt kwÿ ho anhÿr ã ixpumunh kôt pix mã na ka htem amnhĩ kaxyw ixkõt ajamaxpêr. Nom amarĩ amnhĩ kaxyw ixkõt ajamaxpêr kêt nẽ. Anẽ.

49Hãmri nhûm tee ri kuma nẽ kãm:

—Kwa tokyx. Kot kaj tokyx ixkõt amõi kêt koja ixpê ty. Anẽ.

50Hãmri nhûm kãm:

—Nã koja apê htyk kêt nẽ. Ra ixte akupÿm amã ho mex kênã. Mãmrĩ ma akupÿm mõi nẽ tokyx omu. Na ra akupÿm amã mex. Anẽ.

Hãmri nhûm kuma nẽ kaxyw hkõt hamaxpêr kurê kumrêx nẽ ma akupÿm hwÿr mõi. Nẽ mõi o apkati. 51Nẽ kormã õ krĩ hwÿr hpõx o mõi ri nhûm ra kãm mẽ àpênh xwÿnhjaja kutã mra nẽ nhÿri pry hã hkaxpa nẽ kãm:

—Pa. Kwa na ra akra hkà hakry nẽ akupÿm amã mex. Anẽ.

52Hãmri nhũm mẽ kuma nẽ hkĩnh tỳx nẽ. Nẽ mẽ kãm:

—Kwa xô wehe? Mẽmo ore hã na pre we ra hkà hakry? Anẽ.

Nhũm mẽ kãm:

—Nà jãã na pre kaxkwa nhĩpòk ri myt nhỹ nhũm hkà hakry nẽ akupỹm amã mex kurê kumrẽx. Anẽ.

53Hãmri nhũm mẽ kuma nẽ mẽ kãm:

—Hêxta waa nẽ. Kwa pẽr ãm hãmri Jejus kot inhmã akupỹm mex ã harẽnh xà hã ore kamã na pre akupỹm inhmã mex. Nà ãm hãmri. Anẽ.

Hãmri nẽ amnhĩ kaxyw Jejus kôt hamaxpẽr kurê kumrẽx. Nhũm òrkwỹ kamã ri mẽ pa xwỳnhjaja uràk nẽ amnhĩ kaxyw hkôt hamaxpẽr.

54Nhũm Jejus ã kãm hkra ho mex anẽ. Na pre ra pika pẽ Garirej kamã mẽ kot mẽmoj pumunh kêt ò ho anhỹr o tipxi nẽ mẽ kãm gô pix o wĩhti nhĩpêx. Tã ra pyka pẽ Jutej rũm akupỹm mẽ hwỳr mō nẽ ã akupỹm mẽ hkrata o mex anẽ.

Jejus kot himô mỳ ri akupỹm mẽhō ho mex ã harẽnh

Juãw 7.23, 10.30-33

5 1Tã mẽ ixpê Ijaew mẽ ixte Tĩrtũm ã ixkĩnh kaxyw Jerujarẽ hwỳr akuprõ nhũm Jejus haxwỳja ma hwỳr mō. Pa mẽ hkôt mẽ ixpa ho mẽ ixpa xwỳnhjaja ma hkôt mō. 2Jerujarẽ kamã na himôja hikwỹ. Nhỹhỹnh mẽ kot krĩ hwỳr ôwêhti ho gjêx xà htã hikwỹ. Himôja nhĩxi pẽ na Petes. Nẽ pu hã mẽ à xwỳnhjê nhĩkwỹ xà hã ixkre kêp 5. 3Piitã kamã na pre hte tanhmã mẽ à kute xwỳnhjaja hikwỹ. Mẽ nohkre xwỳnhjaja nẽ mẽ hyk o mẽ pa xwỳnhjaja nẽ mẽ ì kamã mẽ htyk xwỳnhjaja. ãm ahpỹnhã tanhmã mẽ à kute xwỳnhjaja ixkre hkwyja kamã akupỹm mex prãm xaj hikwỹ. 4Na pre hte Tĩrtũm kapẽr o mẽ wrỳk xwỳnhja tōhã himô hwỳr wrỳ nẽ gô xok. Hãmri nhũm mẽ à xwỳnhjê hō kot amnhĩ to wa nẽ kumrẽx hwỳr wrỳk nẽ kamã mrõr xwỳnhja akupỹm mex. Kwỳjê rom akupỹm mex kurê kumrẽx. Jakamã nhũm pre hte mẽ à xwỳnhjaja akupỹm mex prãm xaj gô xok jamãr o hikwỹ. 5Jakamã nhũm mẽhō myja ixkre hō kamã hikwỹ. Te omnuj nẽ arĩ hikwỹ hã amgrà xohtō rax nẽ. Ra hã amgrà kêp 38. 6Jakamã nhũm Jejus mẽ hwỳr tẽ nẽ omu. Nẽ hprĩ hã omu nẽ hamaxpẽr o:

—Kwa mũj na hte omnuj nẽ ri pa hkêt ã amgrà xohtō rax nẽ. E pa akupỹm ho mex.

Anhỹr o hamaxpẽr hãmri nẽ kãm:

—Pa. E kwa inhmã amnhĩ jarẽ. Xà amã akupỹm amex prãm? Anẽ.

7Hãmri nhũm kuma nẽ kãm:

—Ku nhũm. Inhmã tokyx akupỹm inhmex prãm tỳx kumrẽx kênã. No mẽhō kot tokyx inhmỳ nẽ mẽ kêp ixto wa nẽ ixkumrẽx gô xok kamã

inhmrôr? Na pa tee ri ixkumrêx hwÿr ixtêm nê inhmã inhmrôr prãm nhũm mē xatã ixpê amnhĩ to wa nê mra nê kamã mrô. Anê.

8Hãmri nhũm Jejus kãm:

—Tÿ? Tôe. E na ka akupÿm amex. E kànhmã xa nê akupĩp py nê ma akupÿm anhörkwÿ hwÿr tē. Anê.

9Hãmri nhũm kuma nê ra akupÿm mex nê kànhmã xa nê ri mra. Nê hkĩnh tÿx nê hikupĩp py nê ma akupÿm örkwÿ hwÿr tē. Ijaew nhô arĩgromnu pê sap ã nhũm Jejus kot akupÿm ho mex 10nhũm ma akupÿm pry hã hikupĩp py nê o tē. Nhũm Ijaew nhô pahi hkwÿja nhÿhÿnh mra nê tee ri kot sap ã hpyr nê o htēm ã omu nê kãm:

—Tk. Kwa mē pahpê Ijaew na pu htem mē panhō arĩgromnu hã paxapênh kêt nê. Finat Mojes kot ja nê mē pahkurê htã ka axtem nê akupĩpta py nê nhÿhÿm o tē. Anê.

11Hãmri nhũm mē kuma nê mē kãm:

—Tÿ. Kot anhÿr tã kot ixto mex xwÿnhta na ã inhmã kapêr anê pa mar xà hkôt kupy nê akupÿm inhörkwÿ hwÿr tē. Anê.

12Hãmri nhũm mē tee ri kuma nê kãm:

—Kwa mēhō na we ã ri amã karō anê? Anê.

13Nhũm kormã kot Jejus nhĩxi mar kêt jakamã kot mē kãm ahkre kaxyw hakêx nê tee ri hkwÿjê kaêx ã hapêr rīt o xa. Nom nhũm mē ohtō nê pry hã mrar jakamã nhũm tee ri hapêr nhũm Jejus ra ma nhÿhÿm tē.

14Tã nhũm hã ahtũmre nhũm Jejus Tĩrtũm mã amnhĩ jarênh xà hã ixkre hwÿr tē nê axà nê kot ho mex xwÿnhta pumu nê kãm:

—Pa. E na ka ra akupÿm amex. Nom kwa kêr ka axte tanhmã amnhĩ tomnuj to ho ri apa hkêt nê. Kot kaj axte ã amnhĩ nhĩpêx anê hãmri nê apunuj tÿx o wam ate apunujta jakre kãm ga. Anê.

15Hãmri nhũm kuma nê ma tē nê kato. Nê ma mē õ pahijê hwÿr tē nê mē kãm:

—E na pa ra kot ixto mex xwÿnhta nhĩxi ma. Xep kêp Jejus. Anê.

16Hãmri nhũm mē hixi ma nê hã tanhmã axpên mã ho kapêr punuj to. Mē õ arĩgromnu hã kot mē ho mex o pa jakamã nhũm mē axpên jakwa kamã ri hixi ho rê nê nhÿri omu nê tanhmã hã kãm àkjêr to.

17Hãmri nhũm amnhĩ tã mē kuma nê mē kãm:

—Ku nhũm. Inhĩpêxà Tĩrtũm na hte apkati mē tanhmã mē pahto mex to ho pa. Jakamã pa hte uràk nê ã mē ho mex rãhã ho ri ixpa anê nê aa mēmo arĩgro hã ja ho anhÿr kaga hkêt nê.

18Anhÿr o mē kãm amnhĩ jarê nhũm mē kuma nê kamã gryk tÿx nê. Nom mē õ arĩgromnu hã kot mē ho mexja pix mÿrapê kamã gryk kêt. Mãänên Tĩrtũm kêp hipêxà hã harênhja mÿrapê nhũm prem kamã gryk tÿx kumrêx nê axpên mã:

—Tk. Kwa na ã amnhĩ jarênh anhÿr jao te kêp Tĩrtũm pyràk ã amnhĩ jarê. E kwa pu mē kupĩ ri. Anê.

Tirtùm Kra kot Hipêêxà nhỹ hã amnhĩ nhĩpêx ã harênh

Juãw 14.10-13

19Hãmri nhũm Jejus axte mẽ kêp Ijaew nhõ pahijê mã kapêr nẽ mẽ kãm:

—Na pa hte amnhĩ krã hkôt tanhmã amnhĩ nhĩpêx to ho ri ixpa hkêt nẽ. Na pa hte Inhĩpêêxà kot tanhmã amnhĩ nhĩpêx to hã omunh xà hkôt uràk nẽ mẽ ho mex o ri ixpa. Kwa mẽ amnhĩ krã him ja jaxà nẽ kãm ajamaxpêr tỳx nẽ ho apa.

20—Inhĩpêêxàja kãm ijapêê. Na hte inhmã kot tanhmã mẽ ho mex to piitã ho amnhĩrít. Ixte omunh nẽ uràk nẽ ỹ hã tanhmã mẽ ho mex to ho ri ixpa kaxyw. Jakamã kot paj ãm akupỹm mẽ à xwỳnhjê ho mex pix o ri ixpa hkêt nẽ. Kot paj mãânên mẽ kãm mêmoj mex o ja jakrenh o anhỹr o ri ixpa ka mẽ hã ixpumu nẽ ixkamã ano puma ho apa.

21—Nẽ Inhĩpêêxà kot akupỹm mẽ htyk xwỳnhjê ho htír jakamã kot paj uràk nẽ akupỹm mẽ htyk xwỳnhjê ho htír o ri ixpa. Anẽ.

Mẽ htír tùm nẽ mẽ pa mã xwỳnhjê jarênh

Juãw 3.16-17, 3.36, 6.27, 6.40, 6.60, 10.28, 17.2-3; Rômãn 6.23; Karatas 6.8;

Xitre 1.2, 1.37; Wam Juãw 2.25, 5.11-13

22Nhũm Jejus arĩ mẽ kêp Ijaew nhõ pahijê mã kapêr nẽ mẽ kãm:

—Koja nhỹrmã Inhĩpêêxàja mẽ htír tùm nẽ mẽ pa ho mẽ pa mã xwỳnhjê jarênh kêt nẽ. Ja kaxyw na pre pa ixãm. 23Tã mẽ piitã mẽ kot ja hã ixpumunh nẽ ixtã hpijaàm o ri pa kaxyw na pre mẽ kaxyw ixãm. Te mẽ kot Inhĩpêêxà hã hpijaàmta pyrã nẽ pa ixtã hpijaàm o pa kaxyw. Jakamã koja mẽhõ ixtã hpijaàm kêt nẽ hãmri nẽ mãânên Inhĩpêêxà hã hpijaàm kêt ã amnhĩ to amnhĩrít. Tãm kot mẽ awỳr inhmênh kênã. 24Jakamã koja mẽhõ ixkapêr ma nẽ amnhĩ kaxyw kot mẽ awỳr inhmênh xwỳnhta kôt hamaxpêr nẽ ixkôt amnhĩ xãm. Hã koja nhỹrmã htyk tã ma mẽ kot amnhĩ xà htỳx kamã hamak o pa htùm xàta wỳr mõi kêt nẽ. Koja Inhĩpêêxà akupỹm ho htír nhũm wa ixri htír tùm nẽ mex kumrêx nẽ pa ho pa. Jakamã koja mẽhõ ixkôt amnhĩ xãm hãmri nẽ ra kêp wa ixri htír tùm nẽ pa ho pa mã xwỳnh. Kwa mẽ jam ajamaxpêr tỳx rãhã ho apa.

25—No mẽ kãm ixkapêr mar prãm kêt xwỳnhjaja kêp Inhĩpêêxà mẽ wa ixri mẽ htír tùm nẽ mẽ pa mã xwỳnh kêt. Tã ixpê Tirtùm Kra jakamã koja mẽ ixkapêr ma nẽ ixkôt amnhĩ xunhwỳ. Hã kot paj amnhĩ tã mẽ omu nẽ mẽ htír tùm nẽ mẽ pa mã xwỳnh ã mẽ harê nhũm mẽ àmnhĩx ri hkĩnh nẽ pa ho pa. Kwa mẽ jam ajamaxpêr tỳx rãhã ho apa.

26—Nẽ Inhĩpêêxà tãm kêp mẽ ho mẽ htír xwỳnh. Tã ixpê Kra jakamã na pre amnhĩ pyrã nẽ ja kaxyw ixãm.

27—Ra kot mẽ akaxyw ixãm jakamã na pre mãânên ixte tanhmã mẽ ajarênh to kaxyw ixãm. Wa ixri mẽ atír tùm nẽ apa ho apa mã xwỳnhjê

hã mẽ ajarẽnh rỳ wa ixri mẽ atĩr tũm nẽ apa hkêt mã xwỳnhjê hã mẽ ajarẽnh kaxyw. 28-30 Jakamã kot paj nhỹrmã ra mẽ htyk nẽ mẽ hikwỹ xwỳnh piitã mẽ kãm ixkapẽr nhũm mẽ inhma. Kojã mẽ ixkapẽr ma hãmri nẽ akupỹm htĩr nẽ pika rũm hapôx pa. Hãmri nhũm mẽ kot kormã htĩr ri Tĩrtũm kapẽr kôt amnhĩ nhĩpêx hkêt xwỳnhjaja mẽ kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma hapêx pa. Nom nhũm mẽ kot amnhĩ to mex xwỳnhjaja. Ra mẽ kot Tĩrtũm kôt amnhĩ nhĩpêx jakamã kojã mẽ ma Tĩrtũm mẽ wa ixwỳr api nẽ wa ixri mex nẽ hkĩnh rãhã htĩr tũm nẽ pa ho pa.

—Kot paj ja kaxyw tanhmã mẽ apiitã mẽ ajarẽnh to. Nom kot paj amnhĩ krã hkôt inhmã hprãm xà hkôt tanhmã mẽ ajarẽnh to hkêt nẽ. Kot paj Inhĩpêxà kot mẽ awỳr inhmẽnh xwỳnhnta nhỹ hã àhpumunh tỳx xà hkôt tanhmã mẽ ajarẽnh to. Jao ãm hãmri mẽ ajarẽ. Kwa mẽ jam ajamaxpẽr tỳx nẽ. No ã ixte mẽ amã amnhĩ jarẽnh anhỹrja ma nẽ tee ri ajamaxpẽr kêt nẽ. Anẽ.

Mẽ kot Jejus kêp Tĩrtũm Kra hã harẽnh xwỳnhjê jarẽnh

Juãw 8.18; Wam Juãw 5.6-8

31Nhũm Jejus arĩ mẽ kêp Ijaew nhõ pahijê mã kapẽr nẽ mẽ kãm:

—E na pa ra tanhmã mẽ amã amnhĩ jarẽnh to. Nom kop ãm papxipix ixte ã amnhĩ jarẽnh anhỹr ronhỹx ka mẽ inhma nẽ ajamaxpẽr o: “Ko. Na apu ãm hãmri ã mẽ inhmã amnhĩ jarẽnh anẽ rỳ apu ãm amnhĩ to hêx.” Anhỹr o ajamaxpẽr. 32Nom papxipix na pa hte ã amnhĩ jarẽnh anhỹr kêt nẽ. Inhĩpêxà haxwỳja na hte ã ijarẽnh anẽ. Nẽ ãm hãmri na hte tanhmã ijarẽnh to ho pa. Tĩrtũmja hêx kêt. 33No mẽ amã pika nhõ xwỳnhjê pix kapẽr mar prãm jakamã na ka prem finat Juãw Paxisja wỳr akwỳjê rẽ nhũm mẽ ma hwỳr mra nẽ ixtã hkukja nhũm mẽ kãm tanhmã ijarẽnh to. Nẽ hprĩ hã mẽ kãm ijarẽ. 34No mẽ apê pika nhõ xwỳnhjaja mẽ ate axpẽn mã tanhmã ijarẽnh toja na ixpê tanhmã kute hkêt. Kojã mẽhõ tanhmã ixto kapẽr punuj to rỳ tanhmã ijarẽnh mex to pa amnhĩ jarẽnh ma nẽ tee ri amnhĩ kukamã ijamaxpẽr o ixkaprĩ hkêt nẽ. Tã nom Juãw Paxis kapẽrja mẽ amã mex jakamã na pa ã mẽ amã harẽnh anẽ. Ka mẽ ra kot tanhmã ijarẽnh toja ma nẽ amnhĩ kaxyw ixkôt ajamaxpẽr nẽ ixkôt amnhĩ xunhwỳ nẽ nhỹrmã ty nẽ ma mẽ kot amnhĩ xà htỳx kamã hamak tũm xàta wỳr apa hkêt nẽ.

35—Juãw Paxis na pre te kanê hpôk mex nẽ mẽmoj to amnhĩrit mex pyrã nẽ mẽ amã Tĩrtũm kapẽr o amnhĩrit mex o pa. Ka prem te maripôtre kot kanê hã htu pyrã nẽ hwỳr akuprõ nẽ mar o akuhê. Nom hkôt ajamaxpẽr tỳx kêt nẽ. 36Na pre hprĩ hã mẽ amã ijarẽnh o ri pa.

—Tã pa pam mẽ awỳr wrỳ nẽ Inhĩpêxà nhỹ hã mẽ akamã aa mẽ ate mẽmoj pumunh kêt kwỳ ho anhỹr o ri ixpa. Mẽ ate ja hã ixpumunh nẽ Inhĩpêxà tãm kot mẽ awỳr inhmẽnh kôt ixpumunh kaxyw.

37—Ně Inhĩpêêxàja mãâněn ixpê Kra hã mẽ amã ixto amnhĩrĩt. Ra mẽ anhõpinh xà kaxwỳnh kãm kot mẽ amã ixto amnhĩrĩt tã ka mẽ ama mẽ ãm ama mẽ ixkõt ajamaxpêr kêt mẽ. 38Mẽ amã mẽ ate hkõt amnhĩ nhĩpêx o apa hprãm kêt. Mẽ ate kapêr mar tỳx ronhỹx ka mẽ ixkapêr ma mẽ amnhĩ kaxyw ixkõt ajamaxpêr kurê kumrêx. Ixpê Tĩrtũm kot mẽ awỳr inhmênh xwỳnh kênã.

39—Ně Tĩrtũm kapêr ã kagà htũm haxwỳja kot tanhmã ijarênh to. Ka htem wa ixri atĩr tũm mẽ apa ho apa hprãm xàj kamã harênh rãhã ho ri apa. Nẽ kot tanhmã pa ijarênh to htã ka mẽ ixkapêr ma mẽ amnhĩ kaxyw ixkõt ajamaxpêr kêt mẽ. Anẽ.

Ijaew nhõ pahijaja kot Jejus kaga hã mẽ harênh

40Nhũm Jejus arĩ mẽ kêp Ijaew nhõ pahijê mã kapêr mẽ mẽ kãm:

—Nẽ pa na ixte Inhĩpêêxà mẽ wa ixri ixte mẽ ho mẽ htĩr tũm mẽ mẽ pa mã xwỳnh ã mẽ harênh tã ka mẽ amnhĩ kaxyw ixkõt ajamaxpêr kêt mẽ. 41Nom mẽ ate inhmex ã ijarênh kêt tã ja ixpê tanhmã kute hkêt. ãm Inhĩpêêxà pix kot inhmex ã ijarênhja na inhmã hprãm. 42Ra ixte mẽ apumunh mex. Mẽ amã Tĩrtũm kĩnh kêt. 43Tãm kot mẽ awỳr inhmênh tã ka mẽ ixpumu mẽ ixkaga mẽ ixkõt amnhĩ nhĩpêx kêt mẽ. Nom koja mẽhõ amnhĩ krã hkõt mẽ awỳr tẽ mẽ tanhmã mẽ ajahkre hto ka mẽ ama mẽ hkõt amnhĩ nhĩpêx kurê kumrêx.

44—ãm pika nhõ xwỳnh pixjaja kot mẽ amex ã mẽ ajarênhja na mẽ amã hprãm. No Tĩrtũm kot amnhĩm mẽ amex ã mẽ ajarênhja mẽ amã hprãm ã mẽ ate amnhĩ jarênh tã mẽ amã ja prãm kêt. Jakamã na ka htem ixkaga kumrêx. 45-46Tã nom kot paj pam nhỹrmã Tĩrtũm mã mẽ apê ixkwỳ hkêt ã mẽ ajarênh kêt mẽ. Mo kaxyw kot pa kêt ri ã kãm mẽ ajarênh anẽ? Finat Mojes tãm koja ja hã kãm mẽ ajarê. Na ka htem tanhmã ajamaxpêr to mẽ ajamaxpêr o: “Kot paj finat Mojes kot mẽ inhmã tanhmã kapêr to hkõt amnhĩ nhĩpêx o ri ixpa hãmri mẽ nhỹrmã Tĩrtũm ri ixtĩr tũm mẽ inhmex mẽ ixpa ho ixpa.” Anhỹr o ajamaxpêr nom hkõt amnhĩ nhĩpêx kêt mẽ. Mojes na pre hte pa ijarênh o pa. Tã mẽ ate kapêr kõt amnhĩ nhĩpêx ronhỹx ka mẽ amnhĩ kaxyw ixkõt ajamaxpêr mẽ ixkõt amnhĩ xunhwỳ. No mẽ ate ixkaga jakamã koja Mojes tãm Tĩrtũm mã mẽ apê ixkwỳ hkêt ã mẽ ajarê. 47Mẽ ate Mojes kapêr kõt amnhĩ nhĩpêx kêt jakamã kot kaj mẽ mãâněn ixkõt amnhĩ nhĩpêx hkêt mẽ. Anẽ.

Nhũm pre ã Jejus Ijaew nhõ pahijê mã kapêr anẽ.

Jejus kot mẽ ho 5.000 mẽ mẽ kãm mẽ õ hã harênh

Matêwre 14.13-21; Makre 6.30-44; Rukre 9.10-17

6 1-4Tã nhũm ra arĩgro pê Pas ahtêp o mõ. Pasa ã mẽ ixpê Ijaewjaja na pa htem axpên wỳr akuprõ mẽ hã õwêhti hkra nyw kwỳ pa mẽ ã hkur o ixkrĩ. Amnepêm Tĩrtũm kot pika pê Ejit rũm mẽ inhĩgêjtê kator

kaxyw nhũm prem nojarê t nê ã hkwỳ hpar nê ã hkur anê. Tã arĩ mē ixpê mē hkanrêhã mē htãmnhwỳjaja jam ijamaxpêr pê ixkĩnh kaxyw ã amnhĩ nhĩpêx anê. Jakamã nhũm Jejus pãr krem axã nê ma himô pê Garirej ã rêr kaxyw ma xarmã mō nê rê. Himôja nhĩxi hō pê na Tipe nhũm hã xarmã mō nê rê. Pa mē hkôt ixpa ho ixpa xwỳnhjaja ma hkôt ixpa.

Hãmri nhũm pika nhõ xwỳnh kwỳjaja Jejus ma mōr kãm omu hãmri nê ma gô kape hã pikap mē inhĩhkrep mra. Na pre ra Jejus mē kamã mē à xwỳnhjê ohtô nê akupỹm mē ho mex nhũm mē axte omu hãmri nê ma mē inhĩhkrep gô mỳ ri hpar o pa.

Tã pa mē xarmã rê nê pãr rũm ijabôj nê gô mỳ ri kỳxpê ixkrĩ hpa.

5Hãmri nhũm mē inhĩhkrep mē mrrar xwỳnhjaja mē ixwỳr hpôx o mra nhũm Jejus amnhĩ wỳr mē omu nê mē inhĩõ pê Firipti mã kapêr nê kãm:

—Kwa Firip. Mēmoj kot puj mē pahwỳr mē mōr nējje mã ho anê nhũm mē kuku? Tanhmã kot puj mē amnhĩ to nê nhỹri mē kãm mēmoj japrô nhũm mē kuku? Anê.

6Ra tãm kot tanhmã mē kãm õ hto hã amnhĩ pumunh mex tã ã mē hã Firipti kamã hamak kaxyw mē hã hkukjêr anê. 7Hãmri nhũm kuma nê tee ri mē hkukamã hamaxpêr nê kãm:

—Konên. Mē ohtô rax kumrêx kênã. Mo mē kaxyw mē pakàxpore rax? Kot pu mē pakàxpore ho 200 nê ho mē kãm mēmoj japrôr tã nhũm mē ãm ho hkryre nê kuku nê ho õhy htu hkê t nê. Mē ohtô rax o mē ohtô rax kênã. Anê.

8-9Hãmri nhũm mē inhĩõja kuma nê Jejus wỳr tē nê kãm kapêr. Simãw Pêtre htõ Andreja hwỳr tē nê kãm:

—E ota mēhõ hkrata amnhĩ kôt õ hkwỳ ho mō. No ãm grire. Na pãwti kêp 5 nê kaxyw õ tep axkrutre. No mē ohtô gri ã kot kêt mē hipêx pa. Anê.

10Hãmri nhũm kuma nê hkôt mē ixpa ho mē ixpa xwỳnhjê mã kapêr nê mē inhmã:

—Tôe. Nã hãmri. E mē kãm anê kê mē hkrĩ pa. Anê.

Hãmri pa mē kãm anê nhũm mē pō kamã hkrĩ hpa. Na prem ohtô kumrêx. Mēmyjê pixjaja kêp 5.000. Nê kaxyw mē hprô nê mē hkrajaja. Na prem ohtô ho ohtô. Tã piitã hkrĩ pa. 11-12Hãmri nhũm Jejus mēhõ hkrata pê õ pãwti jamỳ nê o xa nê Tĩrtũm mã harê nê kãm:

—Pa Papaj. Na ka hte mē inhmã mē inhõ ho apa. ãm kapxipix amex o amex. Anê.

Hãmri nê mē inhmã pãwtija gō pa mē ô ri mē hkrĩ xwỳnhjê mã ôr o mra nê ho mē piitã mē hipêx pa. Pãwtija ãm hkryre htã nhũm Jejus tanhmã ho nhũm ra ohtô rax kumrêx. Jakamã pa mē ô ri mē kãm ôr o mra nê ho mē piitã mē hipêx pa. Nhũm Jejus hpãnhã tep axkrutreta py nê mã ho anê nê Tĩrtũm mã harê hãmri nê amnhĩ xô ri mē inhmã kugō

pa mẽ mã ho anẽ nẽ. Te ho pãwti nhĩpêx pyrã nẽ ho mẽ piitã mẽ hipêx. Hãmri pa mẽ ixpiitã apku nẽ inhõhy htu nhũm arĩ mẽõ jakrêx kwỳ hprã. Hãmri nhũm Jejus mẽ inhmã:

— E kwa mẽ hkõt mra nẽ mẽõ jakrêx o akuprõ kê omnu hkêt nẽ. Anẽ.

13Hãmri pa mẽ kuma nẽ ho akuprõ nẽ kawã o 12 nẽ ho nỳt. Pãwti hkryreja ãm kêp 5 pix tã nhũm Jejus tanhmã ho nhũm rũnh kumrêx. Jakamã pa mẽ hakrêx prãr o kawã ho 12 nẽ ho nỳt pa. 14Hãmri nhũm mẽ inhĩkrep mẽ mõi xwỳnhjaja amnhĩ jaêr pẽ Jejus kot mẽ kãm mẽõ ho rax ã omu nẽ ri axpẽn mã harênh o:

— Kokỹỹ. Tãm mãn pre finat Mojesja amnepêm mẽ panhĩgêjtê mã harênh o ri pa. Tã ra mẽ pahwỳr wrỳ nã? 15Kwa pu mẽ kãm pakapêr kãm paxihtỳx nẽ ma akupỳm amnhĩ kõt o mõi nẽ amnhĩ kaxyw ãm kê mẽ pahto amnhĩptãr o pa. Anẽ.

Hãmri nhũm Jejus amnhĩ tã mẽ kapêr ma nhũm ja kêp omnuj nẽ. Jakamã nhũm mẽ kêp kato nẽ ma hpãnhã ahte nhỹri hixêť õ hwỳr tẽ.

Jejus kot gõ krãhkã hã htêm ã harênh

Matêwre 14.22-27; Makre 6.45-52

16Tã nhũm ra kamãtre pa mẽ Jejus kõt ri ixpa ho ixpa xwỳnhjaja ma akupỳm himõ hwỳr mra. 17Nhũm kormã Jejus mẽ ixwỳr akupỳn htêm kêt jakamã pa mẽ tee ri kamã ama hãmri nẽ akupỳm pãr mã axã nẽ ma akupỳm Kapanau hwỳr xarmã ixrêr o mõi.

18Pu nhũm ra kõk àpêr tỳx nhũm gõ xatã kãnhmã harĩ nẽ axpẽn wỳr mra nẽ axpẽn tak tỳx nẽ. 19Pa mẽ kormã gõ nhĩpõk ri mõi. Nẽ tee ri rrêmti ho gõ rênh nhĩpêx kaprỳ nom kormã ixrêr kêt nẽ. Nẽ kormã inhmõi o ixtã 5 kirõm pix nẽ. Hãmri nhũm ra Jejus gõ krãhkã hã hpar o mẽ ixkõt tẽ. Pa mẽ ixprĩ hã amnhĩ wỳr omunh mex kêt nẽ ixtỳx mẽkarõ hã hkamnhĩx nẽ mẽ inhmã uma htỳx kumrêx. 20Tã nhũm mẽ inhmã ixkapêr nẽ mẽ inhmã:



Juãw 6.16-20

—Tk. Kwa mẽ amã ma hkêt nê. Pa na pa mẽ akôt tẽ. Anê.

21Hãmri pa mẽ kapêr ma nê ixkĩnh nê. Nê amnhĩ wỳr pàr kre hwỳr ho api nhũm axà pa mẽ xarmã ixrêr kurê kumrêx nê pàr kre rũm ijapôx pa.

Mẽ kot Jejus japêr mrar ã mẽ harênh

22Tã nhũm apkati nhũm xarpê mẽ kot Jejus wỳr mrar nhũm kot mẽ kãm õ xwỳnhjaja tee ri hapêr o pa nê axpên mã:

—Kwa nhỹhỹm mãn pre we tẽẽ? Na pre hkôt ri mẽ pa xwỳnhjaja pix mẽ õ pàr kãm ma akupỹm xarmã mỗ nom nhũm Jejusja mẽ hkôt htẽm kêt nê. Nà mãn kormã jar nhỹhỹm ri mrar jakamã pu mẽ kormã omunh kêt nê. Anê.

23Rôm nhũm Tipe rũm pàr kwỳja mẽ hwỳr pøj. Jejus kot mẽ apkur xà ho Tĩrtũm wỳr nê mẽ kãm ho rax xà hã pikata wỳr nhũm mỗn pøj.

24Hãmri nhũm mẽ amnhĩ wỳr omu nê tee ri pàr kãm Jejus mẽ hkôt mẽ ixpa ho mẽ ixpa xwỳnhjê japêr hãmri nê axpên mã:

—E kwa pu mẽ ma mẽ hkôt xarmã mỗ nê Kapanauĩ kamã mẽ hapêr. Anê.

Hãmri nê mẽ kãm amnhĩ jarê nê mẽ õ pàr kwỳ hwỳr agjê nê ma mẽ hkôt xarmã mỗn rê. 25Hãmri nê ra mẽ ixwỳr rê nê mẽ ixkôt pøj nê mẽ ixkaêx ã Jejus pumu nê hwỳr mra nê kãm:

—Pa mẽ ijahkre xwỳnh. Kwa na pa prem tee ri xarpê ajapêr hãmri nê man akôt mỗn rê. Kwa tanhmã na ka pre we amnhĩ to nê man tẽn rê? Anê.

26Hãmri nhũm mẽ kãm:

—Nà mẽmo kaxyw na ka wem ri ijapêr o ri ixkôt apa? ãm jãã mẽ ate ixkutã axàpkur nê anhõhy htu jakamã na ka mẽ axte ixkutã axàpkur pix kaxyw ijapêr o ri apa. No ixte ã mẽ amã amnhĩ nhĩpêx anhỹr ã ixpumu nê ixpê Tĩrtũm Kra hã ixkôt ajamaxpêr kêt nê. Kwa mẽ ixpê Kra hã inhmã ajamaxpêr tỳx nê kêt wehe. Anê.

Jejus te kêp kaxkwa rũm mẽ paxàpkur xà maati pyràk ã kot amnhĩ jarênh

27Nhũm Jejus arĩ hwỳr mẽ mrar xwỳnhjê mã kapêr nê mẽ kãm:

—Kwa kêr ka mẽ ri axàpkur xà pix kukamã ajamaxpêr o ri apa hkêt nê. Na htem mẽ apkur xà kukwak ri Tĩrtũm mẽ wa ixri htĩr tũm nê pa ho pa hkêt nê. No kot kaj mẽ amnhĩ kaxyw pa ixkôt ajamaxpêr nê ixkôt amnhĩ xunhwỳ. Hã kot kaj mẽ ixkukwak ri nhỹrmã atĩr tũm nê wa ixri amex nê apa ho apa. Te ixpê mẽ kot mẽ apkur xà hkur nê ã hã htĩr tũm nê pa ho pa xwỳnh pyràk. Ja kaxyw na pre Inhĩpêêxà Tĩrtũm mẽ awỳr papxipix inhmẽ pa mẽ awỳr wrỳ. Anê.

28Hãmri nhũm mẽ kuma nê kãm:

—Kwa tanhmã kot paj wem amnhĩ nhĩpêx to nhũm Tĩrtũm hã mẽ ixpumu nẽ mẽ ixto mex nẽ? Anẽ.

29Hãmri nhũm mẽ kuma nẽ axte mẽ kãm amnhĩ jarẽ nẽ mẽ kãm:

—Nà kot kaj mẽ amnhĩ kaxyw pa Tĩrtũm kot mẽ awỳr inhmẽnh xwỳnh kôt ajamaxpěr hãmri nhũm ixtã mẽ apumu nẽ tanhmã mẽ akrà hto ka mẽ ajamakêtkati nẽ axãmnhĩx akĩnh nẽ tanhmã amnhĩ nhĩpêx to ho ri apa. Anẽ.

30Hãmri nhũm mẽ kuma nẽ kãm:

—Tôe. Kwa axte mẽ inhmã aa mẽ ixte mẽmoj pumunh kêt ô ho anẽ. Pa mẽ ja hã apumu nẽ amnhĩ kaxyw akôt ijamaxpěr kurê kumrêx. E mẽmo kot ka mẽ inhmã ho anẽ? Kwa tokyx mẽ inhmã axte mẽmoj tanhmã ho pa mẽ omu. 31Amnepêm finat Mojes pyrã kot kapôt ã mẽ panhĩgêjtê ho pa ri na pre hte apkati mẽ mẽ kãm mẽõ mẽ kot kãm “manã” anhỳr xwỳnhhta gõ nhũm pre htem hkur o pa. Tĩrtũm kapêr ã kagà htũm kot ja jarênh kot:

Na pre kaxkwa rũm mẽ hwỳr mẽ apkur xà rẽ nhũm mẽ hkur o pa. Anhỳr o kot harênh. Tã kot kaj Mojes nẽ apkati mẽ mẽ inhmã mẽ inhõ ho ri apa pa mẽ ja hã apumu nẽ rĩ kormã amnhĩ kaxyw akôt ijamaxpěr japêr. Anẽ.

32Hãmri nhũm mẽ kãm:

—Xà Mojes na pre hte mẽ kãm kaxkwa rũm mẽ apkur xà rênh o pa? Nà tãm kêt. Inhĩpêxã na pre hte mẽ hwỳr kurẽ nhũm mẽ hkawrà nẽ kuku nẽ kukwak ri hihtỳx nẽ htĩr nẽ pa. Tã nhũm ra mẽ awỳr hpãnhã pa ixpê Kra hã inhmẽ. Kwa mẽ ixkapêr ma nẽ amnhĩ krãm haxàr tỳx nẽ. 33Na pre Tĩrtũm inhĩpêx o te amnepêm kot mẽ hwỳr kaxkwa rũm mẽ apkur xà rênhhta pyrã nẽ amnẽ pika hwỳr inhmẽ. Jakamã te ixpê kaxkwa rũm mẽ apkur xà maati wrỳk xwỳnhhta pyrãk. Mẽ ate amnhĩ kaxyw ixkôt ajamaxpěr nẽ ixkôt amnhĩ xunhwỳr hãmri nẽ ixkukwak ri wa ixri atĩr tũm nẽ apa ho apa kaxyw. Anẽ.

34Nhũm pre ã Jejes mẽ kãm amnhĩ jarênh anẽ nhũm mẽ kuma nom hprĩ hã mar mex kêt nẽ. Âm htỳx ho axtem mẽ apkur xà mex pix ã harênh ã hkamnhĩx nẽ kãm:

—Kwa tô mẽ inhmã mẽ apkur xà maatita kwỳ gõ pa mẽ apkati mẽ hkur o ri ixpa. Anẽ.

35Hãmri nhũm mẽ kuma nẽ amnhĩ tã mẽ kãm:

—Nà mẽ apkur xà kumrêxja âm paa. Te ixpê mẽ apkur xà maati pyrãk. Jakamã kot kaj mẽ atõ amnhĩ kaxyw ixkôt ajamaxpěr nẽ ixkôt amnhĩ nhĩpêx o apa hã kot kaj mẽ akĩnh nẽ apa. Te ra axàpkur nẽ anhõhy htu nẽ akĩnh o ri apa pyrãk. Jao amnhĩ tã ixpumu nẽ akĩnh nẽ ajamakêtkati nẽ ri apa.

36—Ra mẽ ate ixpumunh mex tã kormã amnhĩ kaxyw ixkôt ajamaxpěr kêt nẽ. Kwa mẽ ixkapêr ma nẽ amnhĩ krãm haxàr tỳx nẽ.

37Tirtúm kot inhmã mẽ õr mã xwÿnhjaja koja mẽ ixpumu nẽ amnhĩ kaxyw ixkõt hamaxpêr mex kurê kumrêx. ã mẽ kot amnhĩ nhĩpêx anhÿr xwÿnhjaja kot paj aa amnhĩ nẽ mẽ hanor kêt nẽ.

38—Nẽ ixte amnhĩ krã hkõt kaxkwa rûm ixwrÿk nẽ inhmã hprãm xà hkõt tanhmã amnhĩ nhĩpêx to ho ixpa kaxyw na pa pre ixwrÿk kêt nẽ. Inhĩpêêxà kot mẽ awÿr inhmênh jakamã kãm hprãm xà hkõt pix mã na pa hte tanhmã amnhĩ nhĩpêx to ho ri ixpa.

39—Tã mo na hte Inhĩpêêxà kãm hprãm? Nà kot inhmã mẽ õr mã xwÿnh piitã nhÿrmã wa ixkuri htír tùm nẽ mex nẽ pa ho paja na kãm hprãm. Jakamã nhÿrmã akupÿm mẽ htír ã arĩgrota ã ixte akupÿm mẽ ho htír nhũm ixte ãm pixire nẽ ho ixpikunor kêtja na kãm hprãm.

40—Tã kot ka mẽ atõ ixpê Tirtúm Kra hã ixpumu nẽ amnhĩ kaxyw ixkõt ajamaxpêr nẽ ixkõt amnhĩ xãm. Hã kot kaj nhÿrmã atyk tã pa akupÿm mẽ atír xà hã arĩgrota ã akupÿm ato atír ka wa ixkuri atír tùm nẽ amex nẽ apa ho apa. Ja na Inhĩpêêxàja kãm hprãm. Anẽ.

Nhũm pre ã Jejus mẽ kãm amnhĩ jarênh anẽ. 41Hãmri nhũm Ijaew nhõ pahijaja mẽ kuri mar o kuhê nẽ tee ri kêp kaxkwa rûm mẽ apkur xà maati pyrãk ã amnhĩ jarênh ma nhũm ja mẽ kãm mex kêt nhũm mẽ kamã gryk nẽ. 42Jakamã axpên mã ri harênh o:

—Tk. Kwa mo na ri ã amnhĩ jarênh anẽ? Kêp mẽ panhĩõ kênã kot kêt ri kêp kaxkwa nhõ xwÿnh ã amnhĩ jarê. Kêp Juje mẽ Marir wa hkra na. Mẽ pahte katorxà mẽ hipêêxà wa omunh mex kênã kot kêt axtem nẽ kêp kaxkwa nhõ xwÿnh ã amnhĩ jarê. Anẽ.

43Hãmri nhũm amnhĩ tã mẽ kuma nẽ mẽ kãm:

—Kwa mẽ ã ijarênh anhÿr kêt nẽ. 44Koja Inhĩpêêxà kot mẽ awÿr inhmênh xwÿnhhta tanhmã mẽ hkrã hto nhũm mẽ rĩ kormã amnhĩ tã ja hã ixpumu nẽ amnhĩ kaxyw ixkõt hamaxpêr. Tã ã mẽ kot amnhĩ nhĩpêx anhÿr xwÿnhjaja koja mẽ nhÿrmã htyk tã pa akupÿm mẽ ho mẽ htír nhũm mẽ wa ixri htír tùm nẽ mex kumrêx nẽ pa ho pa.

45—Amnepêem Tirtúm kapêr jarênh o mẽ pa xwÿnhjaja na prem ã ja jarênh anhÿr o:

Koja Tirtúm mẽ hkrã kaxwÿnh kãm tanhmã mẽ kãm kapêr o amnhĩrit to ho pa.

Anhÿr o harênh. Jakamã mẽ kot Tirtúm kapêr mar nẽ hkõt amnhĩ nhĩpêx xwÿnhjaja koja mẽ mãânên amnhĩ kaxyw pa ixkõt hamaxpêr nẽ ixkõt ri amnhĩ nhĩpêx o pa.

46—Nẽ mẽ apê pika nhõ xwÿnhjê hõ aa mẽ ate ixkĩnhã ano ho Inhĩpêêxà pumunh kêt. ãm papxipix na ixte omunh. Kurũm na pa pre mẽ awÿr wrÿ. 47Tã kot ka mẽ atõ amnhĩ kaxyw ixkõt ajamaxpêr. Hã kot kaj nhÿrmã wa ixkuri atír tùm nẽ amex nẽ apa ho apa. Kwa mẽ jam ajamaxpêr tÿx nẽ.

48—Nē ixpê mē axàpkurxà maati jakamã pa na ixpê akupÿm mē ho mē htír xwÿnh. 49Amnepê mē panhīgêjtjaja kormã kapôt ã mē pa ri mē kot “manã” anhÿr xwÿnhhta kur o ri pata ã na prem kukwak ri htír tÿm nē pa ho pa hkê nē. Na prem ri pa nē gaa nē rĩ hpigê nē htyk pa. 50Axtem kaxkwa rÿm mē apkur xà maati jarēnh xwÿnhhta pix kukwak ri na htem nhÿrmã htyk tã akupÿm htír nē wa ixri htír tÿm nē mex nē pa ho pa. 51Ãm paa. Pa na htem inhĩ hkwÿ hkrē hãmri nē wa ixri htír tÿm nē mex nē pa ho pa. Na pa pre ra amnhĩ grōnh kôt mē awÿr wrÿ. Jakamã ka mē atō inhĩ hkwÿ hkrē hãmri nē nhÿrmã atyk tã pa akupÿm ato atír ka Tirtÿm mē wa ixri atír tÿm nē amex nē apa ho apa. Anē.

52Nhÿm pre ã Jejus Ijaew mã amnhĩ jarēnh anē. No ãm mē kãm amnhĩ tã kuxi nē amnhĩ jarē. Jakamã nhÿm mē tee ri kuma hãmri nē tanhmã hã axpēn mã kapēr to. Mē kot hprĩ hã mar kêt nē ãm mē kot ĩ hkwÿ hkrērja pix jarēnh mar jakamã tee ri hamaxpēr nē axpēn mã:

—Kwa tanhmã kot kêt we amnhĩ to nē mē pamã amnhĩ nhĩ hkwÿ gō pu mē kuku? Anē.

53-54Hãmri nhÿm amnhĩ tã mē kuma nē mē kãm:

—Nã mē kot inhĩ hkwÿ hkrēr nē ixkamrô hkwÿ ho hkôm xwÿnh pixjaja koja mē nhÿrmã Tirtÿm mē wa ixri htír tÿm nē pa ho pa. Ixte akupÿm mē ho mē htír xà hã arīgrotã ã kot paj mē ho mē htír nhÿm mē wa ixri htír tÿm nē mex nē pa ho pa. No kot kaj mē inhĩ hkwÿ hkrēr kêt nē ixkamrô hkwÿ ho akôm kêt hãmri nē wa ixri atír tÿm nē amex nē apa ho apa hkê nē. Kwa mē jam ajamaxpēr tÿx rãhã nē. 55Kêt inhĩja kēp mē apkur xà maati na. Nē ixkamrôja kēp mē hkôm xà maati na. Jakamã na htem inhĩ hkwÿ hkrē nē ixkamrô hkwÿ ho ixkō nē ra kēp wa ixri mē htír tÿm nē mē pa ho mē pa mã xwÿnh. 56Jakamã kot ka mē atō inhĩ hkwÿ hkrē nē ixkamrô hkwÿ ho ixkō. Hãmri pa amnhĩ tã apumu nē akarō mã axà ka te apê pa pyrãk o amnhĩ nhĩpêx o apa. 57Inhĩpêêxã kot mē awÿr inhmēnh xwÿnhhta kukwak ri na pa hte ixtír tÿm nē ixpa ho ixpa. Tã ja pyrã nē kot kaj mē inhĩ hkwÿ hkrē hãmri nē ixkukwak ri wa ixri atír tÿm nē apa ho apa mã xwÿnh.

58—Jakamã na pa ã mē amã ixpê kaxkwa rÿm mē axàpkur xà maati hã amnhĩ jarēnh anē. Amnepê mē panhīgêjtjaja na pre htem kapôt ã mēōta kur o pa hãmri nē gaa nē hpigê nē htyk pa. No kêt pa koja mē inhĩ hkwÿ hkrē hãmri nē mē kurom wa ixri htír tÿm nē mex nē pa ho pa. Anē.

59Nhÿm pre ã Jejus mē kãm amnhĩ jarēnh anē. Kormã Kapanãũ kamã Tirtÿm kapēr o mē ahkre xà hã ixkre kamã ã mē ahkre anhÿr o xa.

Mê ohtô nê mê kot Jejus kaga hã mê harênh

Sikûn Korîť 3.6; Sikûn Pêtre 3.16

60Hãmri nhùm mê kot Jejus kôt mar o mê pa xwÿnhjaja ohtô nê ã kapêr anhÿrja ma nê tee ri amnhĩ kukamã hamaxpêr nê hã axpên mã:

—Tk. Kwa pêr kapêrja ãm ri katii. Mêhõ koja we kuma nê hkôt hamaxpêr nê hkamrô nê ĩ kur o ri hkôt pa? Nà mê piitã mê kãm ja mexti hã. Anê.

61Hãmri nhùm amnhĩ tã mê kuma nê mê kãm:

—Kwa xà ixkapêrja mê apê omnuj? 62Nà kot paj nhÿrmã ma akupÿm kaxkwa hwÿr api. Ixpê Tirtûm kot mê akaxyw ixãm xwÿnh ã ma akupÿm hwÿr api. Hãmri ka mê ã ixte amnhĩ nhĩpêx anhÿr ã ixpumu nê rĩ kormã ixkôt amnhĩ xunhwÿr japêr. 63Na htem mêmoj kur kukwak ri kêp Tirtûm mê wa ixri htĩr tûm nê pa ho pa xwÿnh kêt nê. Rÿ amnhĩ krã hkôt tanhmã amnhĩ nhĩpêx to ho kêp wa ixri htĩr tûm nê pa ho pa mã xwÿnh kêt nê. Tirtûm mê wa Ixkarô tãm na hte mê hkarô mã agjê nê mê ho Tirtûm wa ixkuri mê htĩr tûm nê mê pa ho mê pa mã xwÿnh. Tã ŷ hã na pa ã mê amã ixkapêr anê. Nom mê amã amnhĩ tã kuxi nê amnhĩ jarê. Tã kot kaj mê ixkapêr ma nê ixkôt amnhĩ nhĩpêx. Hã kot kaj mê nhÿrmã wa ixri atĩr tûm nê amex nê apa ho apa. 64-65No mê akwÿjjaja na ka mê ixkapêr ma nê ãm ama nê ixkôt ajamaxpêr kêt nê. Jakamã na pa ã mê amã ixkapêr anê nê mê amã: “Koja Inhĩpêxàja tanhmã mê akrã hto ka mê rĩ kormã amnhĩ tã ixpumu nê amnhĩ kaxyw ixkôt ajamaxpêr.” Anhÿr o mê amã ixkapêr. Anê.

Nhùm ã Jejus mê kãm kapêr anê. Ra kot mê hkukamã mê omunh mex. Ra kot amnhĩ kaxyw mê kot hkôt hamaxpêr mã xwÿnhjê pumunh nê mãânên mê kamã kot mêmõ pahi nhĩhkram haxàr mã xwÿnhja nhùm mãânên ra kot amnhĩ kukamã omunh mex. Jakamã nhùm ã mê kãm kapêr anê. 66Hãmri nhùm mê kot hkôt kapêr mar o mê pa xwÿnh kwÿjjaja tee ri kuma hãmri nê hkaga nê axte hkôt pa hkêt nê. 67Hãmri nhùm tee ri mê kot hkaga nê ma mê mrar ã mê omu nê mê ixpê hkôt ixpa ho ixpa xwÿnh pê 12jê mã kapêr nê mê inhmã:

—Pa? No mê kajaja. Xà kot kaj mê uràk nê ixkaga nê ma akupÿm mra nà? Anê.

68Hãmri nhùm Simãw Pêtre kãm:

—Nà kot paj mê akaga hkêt nê. Kapxipix na htem amnhĩ kaxyw akôt hamaxpêr jao kêp Tirtûm mê war akuri htĩr tûm nê pa ho pa mã xwÿnh. 69Ka na pre Tirtûm mê ixwÿr amê. Jakamã na pa mê amnhĩ kaxyw akôt ijamaxpêr o ri ixpa. Nà kot paj mê aa akaga hkêt nê. Anê.

70Hãmri nhùm kuma nê kãm:

—Nà ixte amnhĩ kaxyw mê apê 12jê rênh tã na ka mê atõ akwÿjê hkĩnhã axtem nê Satanasti hkôt amnhĩ xãm. Anê.

71Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anê. Mẽ inhĩ õ na pre. Nê kêp Simãw Kariot kra na pre. Tã ra kot mẽ ĩhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anê.

Jejus tøjaja kot mẽ hkĩnh wỳr amnhĩ kôt hwỳr ã mẽ harênh

Matêwre 10.36, 13.57-58

7 1Tã nhũm Jejus arĩ Garirej kamã ri pa nê kormã akupỹm Jutej wỳr mõi kêt nê. Jutej kamã Ijaew nhõ pahijaja ra kot hã àmnênh nhũm mẽ kot hpĩr ã harênh jakamã nhũm mẽ umaj kormã hwỳr mõi kêt nê.

2Tã mẽ ixpê Ijaew mẽ ixte ixkre hkryre nhĩpêx nê hã ixkĩnh ã arĩgroja ra ahtêp o mõi. Mẽ ixkĩnhã ã na pa pre htem ixpiitã Jutej wỳr axpên wỳr akuprõ nê ahpỹnhã ri amnhĩm ixkre hkryre nhĩpêx nê kamã ixkrĩ.

3Jakamã nhũm Jejus tøjaja hwỳr mra nê kãm nojarêt nê amnhĩ kôt kuwỳ nê kãm:

—E kwa tokyx pu mẽ pahkwỳjê hkôt. Ka mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt apa kê mẽ kãm akapêr mar prãm xwỳnhjaja ja hã apumu. 4Na ka hte jar te apimxur pyràk o amnhĩ nhĩpêx. E kwa tokyx ma pu mẽ hkôt. Anê.

5Katorxà hkôt mẽ kêp Jejus tõi htã kormã amnhĩ kaxyw hkôt hamaxpêr kêt jakamã na prem ã kãm kapêr anê. 6Hãmri nhũm mẽ kãm:

—Nà kormã. Kormã ixte mẽ kãm amnhĩ to amnhĩrĩt xà hã arĩgro kormã kator kêt. Jakamã kot ka mẽ amã mẽ hkôt amrar prãm nê mãmri ma mẽ hkôt mra. 7Koja mẽ apumu nê kãm mẽ akurê hkêt nê. Nê mẽ akamã gryk kêt ka mẽ ri tanhmã amnhĩ nhĩpêx to ho mẽ hkôt apa. No pa kot paj mẽ hwỳr mõi nê mẽ kãm mẽ kot amnhĩ tomnuj o pa hã mẽ harênh o ri mẽ hkôt ixpa nhũm mẽ tee ri amnhĩ tã inhma nê ixkamã gryk nê. 8Jakamã mẽ mãmri ma mẽ hkôt mõi. Kot paj kormã. Kormã ixte mẽ kãm amnhĩ to amnhĩrĩt xà hã arĩgroja kormã kator kêt.

9Anê nhũm mẽ tee ri kuma hãmri nê kure nê ma mẽ hkwyjê hkôt Jutej wỳr mõi. Nhũm Jejus kormã Garirej kamã ri pa hã apkati grêre. 10Hãmri nê kormã ma hapu hã mẽ hkôt mõi. Pa mẽ hkôt ri ixpa ho ixpa xwỳnhjaja ma hkôt ixpa.

Mẽ kot ahpỹnhã tanhmã Jejus jarênh to hã mẽ harênh

Juãw 7.37-44, 9.22, 10.19-21, 12.42-43

11Rôm nhũm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwỳnhjê kaêx ã Jejus japêr o ri mra. Nê hã axpên kukjêr o mra nê axpên mã:

—Kwa nok? Nhỹri mãn we? Anê.

12Nhũm Ijaew piitã tanhmã axpên mã Jejus jarênh to ho pa. Nê kamã mẽ hkwyjaja harênh o:

—Nà kot amnhĩ to mex o pa xwỳnh na.

Anhỹr o harēnh o pa. Nē kamā mẽ hkwỳjaja axtem nē harē nē harēnh o:

—Tk. Kot mẽ no kupyw o pa xwỳnh kēnã. Anē.

13Nom mẽ õ pahi pymaj mẽ piitã mẽ nom tanhmã harēnh to hkêt nē. ãm axpēn mã pix mã tanhmã harēnh to ho pa.

Jejus kot mẽ hkĩnh xwỳnhjê jahkre hã harēnh

Matêwre 3.53-58; Makre 3.22; Juãw 5.16

14Tã pa mẽ mẽ hwỳr pøj. Jejus mẽ pa mẽ hkôt ixpa ho ixpa xwỳnhjaja mẽ hwỳr pøj. Kormã mẽ hkĩnhja hapêx kêt ri. Hãmri pa mẽ Jejus kôt Tĩrtũm mã amnhĩ jarēnh xà hã ixkreja wỳr mra nē agjê nhũm Jejus mẽ ahkre ho nhỹ. 15Hãmri nhũm mẽ inhõ pahijaja tee ri kot tanhmã mẽ ahkre hto hã kuma nē hã axpēn kukja nē axpēn mã:

—Kwa mẽ pahkĩnhã kot Tĩrtũm kapēr o istuda hkêt tã ã mẽ ahkre anē. Anē.

16Hãmri nhũm amnhĩ tã mẽ kuma nē mẽ kãm:

—Nà na pa hte amnhĩ krã hkôt tanhmã ri mẽ ajahkre hto hkêt nē. ãm kot mẽ awỳr inhmēnh xwỳnhnta nhỹ hã na pa hte ã mẽ ajahkre anhỹr o ri mẽ akôt ixpa. 17Tã kot kaj mẽ amã Tĩrtũm kãm hprãm xà hkôt amnhĩ nhĩpêx prãm hã kot kaj mẽ ixte y hã ixkapēr ã ixpumunh kurê kumrêx. 18Amnhĩ krã hkôt mẽ kãm kapēr o ri mẽ pa xwỳnhjaja na htem mẽ kot mẽ mar nē mẽ hã hpijaàm pix kaxyw tanhmã mẽ kãm kapēr to ho ri pa. No kêt pa na mẽ ate ixkapēr mar nē kot mẽ awỳr inhmēnh xwỳnhnta ã apijaàm pix kaxyw na pa hte tanhmã mẽ amã ixkapēr to ho ri ixpa. Jakamã ãm hãmri na pa hte mẽ amã ixkapēr o ri ixpa.

19—Finat Mojes na pre mẽ panhĩgêtjaja kot tanhmã amnhĩ nhĩpêx to ho pa nhũm Tĩrtũm kot mẽ kãm hã karõ jarēnh o ri mẽ hkôt pa htã ka mẽ hkôt amnhĩ nhĩpêx kêt nē. Tã ixte hkôt amnhĩ nhĩpêx kêt ã ixto axêx nē mẽ ate ixpĩr kaxyw ixtã amnhĩ jarēnh ri apa. Anē.

20Hãmri nhũm mẽ ã Jejus kot mẽ kãm kapēr anhỹrja ma nē hêx rom kãm:

—Kwa mẽ ixtõ na pa apĩr mã ka ri ã mẽ ijarēnh anē? Amrakati kēnã. Kwa mãn ka akrã xpã nà? Hã na ka ã ri akapēr anē. Anē.

21Hãmri nhũm mẽ kãm:

—Nà ixte mẽ pahkôt xà hã arĩgro hã akupỳm mēhõ myta ho mex jakamã na ka prem ja hã ixpumu nhũm ja mẽ apê omnuj nē. Nē te ixte mẽ pahkôt xà hã arĩgro hã ixpijaàm kêt xwỳnh pyrak ã ijarē.

22Nom na ka htem ixpyrà nē mẽ panhõ arĩgromnu hã mẽmoj tã axapēnh o ri apa. E pa mẽ amã mẽmoj jarē ka mẽ inhma. Na pre finat Mojes mẽ pamã mẽ pahte mẽ pahkra myre pê my kwryt kã jakar ã mẽ pamã karõ. Kukamã higêtjaja kot kãm ja hã karõ xà hkôt. Jakamã na

htem mẽ hkra myre hapôj nẽ hã semãn pyxi nẽ hapêx nhũm mẽ kêp mẽmy hkwrýt kà jakà. **23**Mẽ pahkôt xà hã arıgro hã hõ kator tãã nhũm mẽ hã semãn pyxi nẽ mẽ panhõ arıgromnu hõ hã kêp my kwrýt kà hkwy krãhta. Mojes kot Tirtũm nhỹ hã ja hã mẽ pamã karõ xà hkôt. Jao mẽ panhõ arıgromnu hã apê. Tã pa pre mẽ apyrà nẽ arıgromnu hã ixàpênh pê akupỹm mẽhõ myta ho mex ka mẽ ja hã ixpumu nẽ axtem nẽ ixtỳx ri ixte amnhĩ nhĩpêx o ixpa xwỳnh ã ijarẽ nẽ mẽ ate ixpĩr kaxyw ã amnhĩ jarẽ. **24**Kwa mẽ amnhĩ krã hkôt tanhmã mẽ harênh to ho ri apa hkêt nẽ. ãm mẽ kot tanhmã amnhĩ nhĩpêx to ho pa hã mẽ omu nẽ ajamaxpêr o: “Kwa xà we Tirtũm kãm ja mex nà?” Anhỹr o mãn kêt mẽ ajamaxpêr nẽ rĩ kormã tanhmã mẽ harênh to. Anẽ.

25Hãmri nhũm Jerujarẽ nhõ xwỳnh kwỳjaja ja hã kuma nẽ tee ri hkukamã hamaxpêr. Hãmri nẽ hã axpên kukja nẽ axpên mã:

—Kwa xà tãm na mẽ panhõ pahijaja mẽ kot hpĩr kaxyw hã amỹnê? **26**Ota jar mẽ pakamã ri pa htã nhũm mẽ ãm omu nẽ kãm tanhmã nẽ hkêt nẽ. Mãn mẽ ãm hãmri kêp Kris ã hkamnhĩx jakamã kapêr ma nẽ ãm kuma nẽ kêp Kris ã tanhmã ho hkêt nẽ. Anẽ.

27Hãmri nhũm mẽhõja kuma nẽ kãm:

—Tk. Nà kêp Tirtũm kot mẽ pahwỳr mẽnh xwỳnhre hã. Kêp Najare nhõ xwỳnh kênã. Mẽ pahte hipêêxà mẽ katorxà wa omunh mex. No kêt Tirtũm kot mẽ pahwỳr mẽnh mã xwỳnhhta koja xep mẽ pahwỳr kato pu mẽ nhỹhỹnh htẽm xà hkôt omunh kêt nẽ. Anẽ.

28Rõm nhũm Jejus arĩ Tirtũm mã amnhĩ jarênh xà hã ixkreja kamã mẽ ahkre ho nhỹ. Jakamã mẽ kot axpên mã harênh ã amnhĩ tã mẽ kuma nẽ mẽ kãm:

—Xà mẽ ate aprĩ hã ixpumunh nẽ nhỹhỹnh ixtẽm xà hkôt ixpumunh? Nà mẽ ate ja hã ixpumunh kêt. Na pa pre amnhĩ hkrã hkôt mẽ awỳr inhmõr kêt nẽ. Na pre mẽhõ mẽ awỳr inhmẽ. Nom kot mẽ awỳr inhmẽnh xwỳnhja kormã mẽ ate omunh kêt. **29**ãm papxpix na ixte omunh. Kurũm ixwrỳk xwỳnh na pa. Kot mẽ awỳr inhmẽnh nhũm kurũm ixwrỳk jakamã ixte ixprĩ hã omunh par. Anẽ.

30Hãmri nhũm mẽ hkwỳjaja tee ri ã kot amnhĩ jarênh anhỹrja ma nẽ ri axpên mã harênh o:

—Kwa Tirtũm kot mẽ pahwỳr mẽnh ã kot amnhĩ to hêx kênã. E kwa pu mẽ ã kot amnhĩ to hêx anhỹr ja ã unẽ nẽ haxà nà?

Anhỹr o axpên mã hã amỹnê. Nom kormã mẽ kot unênh nẽ haxà xà hã arıgroja kormã kator kêt jakamã nhũm Tirtũmja nẽ mẽ omunh mex nẽ nhũm mẽ ãm kãm unênh prãm kaprỳ. **31**No nhũm mẽ hkwỳja mẽ kurom kuma nẽ kêp Tirtũm kot mẽ pakaxyw ãm xwỳnh ã omunh kurê kumrêx nẽ amnhĩ kaxyw hkôt hamaxpêr. Hãmri nẽ axpên mã harênh o:

—Kwa mǎn kĕp Tirtũm kot mĕ pahwȳr mĕnh mǎ xwȳnhhta mǎn nà? Mĕ pahťo kot pu uràk nĕ aa mĕ kǎm mĕ kot mĕmoj pumunh kĕt o anhȳr rax o ri papa? Amrakati kumrĕx. Nà pĕr tǎm kĕnǎ. Anĕ.

Pôristi hkwȳ kot Jejus pynĕnh kaxyw ǎ mĕ harĕnh

32Nhũm prem ǎ axpĕn mǎ Jejus jarĕnh anhȳr o kuhĕ hǎmri nhũm Parijew nhō xwȳnhjaja hǎ mĕ kuma. Hǎmri nĕ patre krǎhtũmjĕ mĕ mĕ ma Jejus wȳr mĕō pôristi hkwȳ rĕ nĕ mĕ kǎm:

—E mĕ ma Jejus wȳr mra nĕ unĕ nĕ man akupȳn o tĕ. Anĕ.

33Hǎmri nhũm mĕ kuma nĕ ma hwȳr mra nĕ omu nom tokyx unĕnh kĕt nĕ. Kormǎ kapĕr ǎ mar o kuhĕ. Nhũm Jejus arĭ mĕ kǎm kapĕr o xa nĕ mĕ kǎm:

—Nà kot paj jar mĕ akôt ri ixpa hǎ mytwrȳ grĕre hǎmri nĕ ma akupȳm kot mĕ awȳr inhmĕnh xwȳnhhta wȳr api. 34Ka mĕ tee ri jar ijapĕr o ri apa nom nhȳri ixpumunh kĕt nĕ. Nĕ ma inhmôr xàta wȳr kot kaj mĕ atō ma ixkôt amôr kĕt nĕ. Anĕ.

35Hǎmri nhũm mĕ tee ri ǎ kot amnhĭ jarĕnh anhȳrja ma nĕ axpĕn mǎ:

—Kwa nhȳhȳm koja we ma mō pu mĕ hkôt papa hkĕt nĕ? Mǎn mĕ pahkwȳjaja kot Gresjĕ kamǎ mĕ pa xwȳnhjĕ hwȳr koja ma mō nĕ hpǎnhǎ mĕ hkôt mĕ ahkre ho pa nà? Hǎ na ǎ mĕ pamǎ amnhĭ jarĕnh anĕ? 36Mo na ri mĕ pahťe tee ri hapĕr o papa hǎ mĕ pajarĕ nĕ mĕ pahťe hkôt pamrar kĕt ǎ mĕ pajarĕ? Anĕ.

Tirtũm Karō te kĕp gō nyw pyrǎk ǎ harĕnh

Juãw 4.13-14; Apokarip 22.1, 22.17

37Tǎ nhũm ra mĕ hkĭnhja hapĕx kaxyw hitep xà hǎ arĭgro maatija kato. Jakamǎ nhũm Jejus kǎnhmǎ xa nĕ kȳxpĕ mĕ hpikuprōnh xwȳnhjĕ mǎ kapĕr nĕ mĕ kǎm:

—E te mĕ amǎ kôr o apa pyrǎk xwȳnhjaja. Mĕ amnĕ ixwȳr akuprō. Kot kaj mĕ amnhĭ kaxyw ixkôt ajamaxpĕr pa tanhmǎ mĕ ato ka mĕ apĕ Tirtũm mĕ wa ixri atĭr tũm nĕ apa ho apa mǎ xwȳnh.

38—Kot kaj mĕ ja hǎ amnhĭ pumu hǎmri nĕ ma mĕ kǎm ixkapĕr jarĕnh o ri mĕ hkôt apa. Te mĕ kǎm kôr nhũm mĕ ate mĕ kǎm gō hkwȳ nhũm mĕ kot ho hkōm pyrǎk o mĕ hipĕx o ri mĕ hkôt apa. Hǎmri nhũm mĕ ama nĕ mĕ apyrǎ nĕ amnhĭ kaxyw ixkôt hamaxpĕr. Pa ixte tanhmǎ mĕ atoja pyrǎ nĕ tanhmǎ mĕ ho nhũm mĕ apyrǎ nĕ kĕp wa ixri htĭr tũm nĕ pa ho pa mǎ xwȳnh. Anĕ.

39Nhũm pre ǎ Jejus mĕ kǎm kapĕr anĕ. No ǎm hǎ kuxi nĕ mĕ kǎm kapĕr nĕ hprĭ hǎ harĕnh kĕt nĕ. Tirtũm Karō kot nhȳrmǎ mĕ kot amnhĭ kaxyw Jejus mǎ hamaxpĕr xwȳnhjĕ karō mǎ gjĕjja nhũm ǎ mĕ kǎm hǎ kuxi nĕ harĕnh anĕ. No kormǎ akupȳm kaxkwa hwȳr àpir nĕ mex o mex nĕ hkrĭ hkĕt jakamǎ kormǎ mĕ hwȳr Karō rĕnh kĕt nĕ.

Mě kot ahpÿnhã tanhmã Jejus jarënh to hã mẽ harënh

Juãw 7.11-13, 7.25, 10.19-21

40Hãmri nhũm mẽ kot Jejus mar o hkrĩ xwÿnhjaja ã kapër anhÿrja ã kuma nẽ ahpÿnhã tanhmã harënh to nẽ harënh o:

—Kwa finat Mojes pyrã nẽ kęp Tĩrtũm nhÿ hã kapër jarënh o pa xwÿnh na nã? Anẽ.

41Nhũm kamã mẽ hkwÿjaja mẽ kãm:

—Nà Tĩrtũm kot mẽ pakaxyw ãm xwÿnhnta na. Anẽ.

Nhũm kamã mẽ hkwÿjaja ja hã mẽ kuma nẽ mẽ kãm:

—Tk. Nà kęp Garirej nhõ xwÿnh kënë kot kêt Tĩrtũm mẽ pakaxyw ãm. 42Tĩrtũm kapër ã kagà htũm kot kęp Garirej nhõ xwÿnh ã harënh kêt. Kęp Pahi Tawi hkanrêhã hkagrõt nyw jakamã koja uràk nẽ Jutej kamã krĩ pẽ Perěj kamã kato. Jao koja uràk nẽ kęp Jutej nhõ xwÿnh.

Anhÿr o ri axpën mã harẽ. Mě kot htÿx Jejus pika pẽ Garirej kamã kator ã hkamnhĩx jakamã ã axpën mã harënh anẽ. Nom pika pẽ Jutej kamã na pre kato. Krĩ pẽ Perěj kamã. Tã no nhũm mẽ hkwÿjaja ja hã mar kêt jakamã kęp Tĩrtũm kot mẽ pahwÿr mën timer xwÿnh kêt ã hkamnhĩx.

43Jakamã nhũm mẽ ã ahpÿnhã axpën mã harënh anẽ. 44Nhũm mẽ hkwÿjaja ra kot unënh kaxyw tã tokyx unënh kêt nẽ.

Põristi kot Jejus pynënh kêt ã mẽ harënh

Matêwre 7.28-29

45Tã nhũm patre nhõ pôristijaja. Mě kot Jejus pynënh mã hwÿr mrar tã hãmri ã kapër anhÿrja ã kuma nẽ tee ri hamaxpër nẽ unënh kêt nẽ. Nẽ awjanã nẽ ahte ÿ kamã ma akupÿm patre krãhtũmjẽ mẽ Parijew nhõ xwÿnhjẽ hwÿr mra. Hãmri nhũm mẽ omu nẽ mẽ kãm:

—Pa nok? Tanhmã na ka mẽ amnhĩ to nẽ unënh nẽ ho amõr kêt nẽ? Anẽ.

46Hãmri nhũm mẽ kãm:

—Nà na pa mẽ unënh kêt nẽ. Kapër mex kënë. Te kot mẽ pakapër pyrãk kêt jakamã pa mẽ tee ri kapër ã kuma nẽ unënh kêt nẽ. Anẽ.

47Hãmri nhũm Parijew nhõ xwÿnhjaja mẽ kuma nẽ mẽ kãm:

—Tk. Kwa mãn ka mẽ ra mẽ uràk nẽ tanhmã kot amnhĩ to hêx toja ma nẽ hkõt ajamaxpër nã? 48Mě ixpẽ Parijew nhõ xwÿnhjaja nẽ mẽ panhõ pahijaja na pa htem hkõt ijamaxpër kêt nẽ. 49No kêt mẽ kot mar nẽ hkõt hamaxpër xwÿnhntijaja na htem mẽ ixkĩnhã finat Mojes kapër mar kêt nẽ. ãm Jejus kapër pix na htem kuma nẽ hkõt hamaxpër. Mÿrapẽ koja Tĩrtũm tanhmã mẽ homnuj tÿx to nhũm mẽ rĩ amnhĩ pumu. Anẽ.

Nìkotē kot Jejus xyr pê kapēr ã harēnh*Juãw 3.1-21*

50Hāmri nhūm Nìkotēja mẽ mar o xa. Mẽ uràk nẽ kêp Parijew nhõ xwỳnh tã na pre ra kamàt õ hã Jejus wỳr tẽ nẽ kãm kapēr. Jakamã tee ri hã mẽ kapēr ma hāmri nẽ yr pê mẽ kãm kapēr nẽ mẽ kãm:

51—Tk. Kwa kormã mẽ pahte pahprĩ hã kapēr mar nẽ tanhmã kot amnhĩ nhĩpêx to hã omunhre hã. Na pre finat Mojesja Tĩrtũm nhỹ hã mẽ panhĩgêjtê mã ja jarēnh o:

Kêr ka mẽ aprĩ hã mẽ kapēr ã mẽ ama nẽ mẽ kot amnhĩ nhĩpêx ã mẽ omu nẽ rĩ kormã tanhmã mẽ harēnh to.

Anhỹr tã ka mẽ kormã aprĩ hã Jejus kot amnhĩ nhĩpêx ã omunh kêt tã ra kot amnhĩ tomnuj xwỳnh ã harê. Anê.

52Hāmri nhūm mẽ tee ri kuma nẽ kãm:

—Tk. Kwa xà we uràk nẽ apê Garirej nhõ xwỳnh hã na ka ã yr pê akapēr anê? Xà Tĩrtũm kapēr ã kagà htũm kot Garirej nhõ xwỳnhjê hõ kêp ỹ hã kapēr jarēnh o pa xwỳnh ã harēnh? Nà ã kot harēnh anhỹr kêt. Anê.

53Nhūm mẽ ã Nìkotē mã kapēr anê hāmri nẽ anhgrà nẽ Tĩrtũm nhõrkwỹ rũm hapõj nẽ ma akupỹm òrkwỹ hwỳr àhkurê ho mra.

Mêhõ ni kot nhãm mẽ mjên o amnhĩkati hã harēnh*Xiakre 2.10-13*

8 1Tã nhūm Jejus Tĩrtũm nhõrkwỹ kamã mẽ ahkre hpa hāmri nẽ kato nẽ ma hixêt prêk pê Oriwêhti hwỳr tẽ. Hāmri nẽ hã api nẽ nhỹri nõ nẽ ra gõr.

2Tã nhūm apkati nẽ myt kator o mõi mẽ nhūm kànhmã nhỹ nẽ akupỹm wrỳ nẽ Tĩrtũm mã amnhĩ jarēnh xà hã ixkre hwỳr tẽ. No ãm kormã ixkre pu hã kahê hkre kamã nhỹ. Nhūm krĩ nhõ xwỳnhjaja omu nẽ hã hturax nẽ nhūm tanhmã mẽ ahkre hto ho nhỹ. 3Hāmri nhūm Parijew nhõ xwỳnhjê mẽ Tĩrtũm kapēr tũm o mẽ ahkre ho mẽ pa xwỳnhjaja hwỳr mẽhõ nija o tẽ. Na ra ham mẽhõ pê mjên o amnhĩkati ho nõ nhūm mẽ ja hã omu nẽ unê nẽ hpa hã kupy nẽ ma Jejus wỳr hkjênh o mõi. Hāmri nẽ mẽ kot mar o kuhê xwỳnhjê kutã ãm nhūm xa. 4Hāmri nhūm mẽ Jejus mã:

—E ot pa mẽ awỳr jahti ho tẽ ka omu. Na ham mẽhõ pê mjên o amnhĩkati ho nõ. Pa mẽ ja hã omu nẽ unê nẽ man awỳr o tẽ. 5E tanhmã kot puj mẽ hipêx to? Na pre finat Mojes Tĩrtũm nhỹ hã mẽ panhĩgêjtê mã ja jarēnh o:

Koja mēnijê hõ axtem nẽ nhãm mẽhõ pê mjên o amnhĩkati ho nõ ka mẽ ja hã omu nẽ apiitã ahpỹnhã kên rũnh jamỳ nẽ ho htak o apĩ.

Anhÿr o kot harënh. No ka? Tanhmã kot kaj mẽ inhmã ja jarënh to? Tanhmã kot paj mẽ hipêx to nhùm amã mex nê? E mẽ inhmã tanhmã mẽ ixte hipêx to jarë. Anë.

6Nhùm mẽ ã hêx rom nija ã Jejus kukjêr anë. Kot mẽ kot hpÿr nê mẽ kãm kapêr nhùm mẽ kot hã mar nê mẽ hkrãhtùmjê hwÿr môr nê kãm kot Mojes kapêr kwÿm ri mẽ ahkre hã harënh kaxyw nhùm mẽ hêx rom ã hkukjêr anë. Hãmri nhùm mẽ kuma nê tanhmã hã mẽ kãm nê hkêr nê. ãm htÿx hikôt nê ïhkrakrã ho pyka kagã ho nhÿ. 7Nhùm mẽ tee ri omu nê axte hã hkukja nhùm kãnhmã xa nê mẽ kãm:

— Tôe. Nã kot ka mẽ atõ aa tanhmã amnhÿ tomnuj to hkêr kumrêx ã amnhÿ pumu hãmri nê kam nê rÿ kaxyw kën õ py nê akumrêx ho hkura. Kê akwÿjaja rÿ kormã akôt hkwy jamÿ nê ho htak. Anë.

8Hãmri nê akupÿm hikôt nê pyka kagã ho nhÿ. 9Hãmri nhùm mẽ tee ri kapêrja kôt kuma hãmri nê mẽ kot mar o kuhê xwÿnhjê rùm angrã nê ma mra. Mẽ piitã mẽ kot amnhÿ tomnuj xwÿnh ã amnhÿ pumunh mex jakamã tee ri ã kot mẽ kãm kapêr anhÿrja ma nê angrã nê ma akupÿm hpÿnh nê axpên kôt mrar o xa. Mẽhpigêr kumrêx nê hpãnhã mẽ nywjaja nhùm mẽ hpÿnh nê ma axpên kôt mrar o ãm kãm hapêx. Nhùm Jejus mënija pix wa ahte mẽ kot mar xwÿnhjê kutã wa arík. 10Hãmri nhùm Jejus kãnhmã xa nê nita mã kapêr nê kãm:

— Pa? No mẽ kot ato kapêr xwÿnhhta mẽ? Xã na mẽhõ kën o akuranh kêt nê? Anë.

11Nhùm kãm: “Ma amrakati.” Anë nhùm kãm:

— Tôe. Nã kot paj ijaxwÿja tanhmã ato hkêr nê. E mamrÿ ma akupÿm anhõrkwÿ hwÿr tẽ. No ãm kêr ka axte ã amnhÿ nhÿpêx anhÿr kêt nê. ãm kwarÿ ho kwarÿ. Anë.

Jejus kot hprÿ hã amnhÿ jarënh

Juãw 1.4; Rõmãn 13.12-14; Epes 5.8-14; Wam Tesarõn 5.5-8

12Tã nhùm arÿgro hõ hã nhùm Jejus axte Tÿrtùm nhõrkwÿ hwÿr tẽ nê kamã mẽ ahkre ho nhÿ nê mẽ kãm:

— Nã te ixpê mẽ piitã mẽ õ kanê pyrãk. Na hte kanêja mẽ kãm hirã mex nê nhùm mẽ kamã rÿt mex o pa. Jao kamãt kô kamã ri pa hkêr nê. Ja pyrã nê na pa hte Tÿrtùm kot amnhÿ nhÿpêx o amnhÿrÿt mex o ri ixpa. Kot ka mẽ atõ amnhÿ kaxyw inhmã ajamaxpêr nê ixkôt amnhÿ xãm hãmri nê tanhmã amnhÿ tomnuj to ho apa hkêr nê. ãm Tÿrtùm kãm hprãm xã kôt pix mã tanhmã ri amnhÿ nhÿpêx to ho ri apa. Jao te ate kanê hpõk nhÿrã kamã arÿt mex pyrã nê apê wa ixri atÿr tùm nê apa ho apa mã xwÿnh. Anë.

13Hãmri nhùm Parijew nhõ xwÿnhjaja tee ri ã kapêr anhÿr ã kuma nê kãm:

—Tk. Kapxipix na ka ã amnhĩ jarēnh anē. Mēhõ kot ã ate amnhĩ jarēnh anhỹrja kõt kot mē inhmã ajarēnhre hã. Jakamã kot paj mē ama nē ãm ama. Anē.

14Hãmri nhũm mē kãm:

—Nà mēhõ kot ã ijarēnh anhỹr kêt tã no ãm hãmri na pa mē amã amnhĩ jarē. Ixêx kêt. Mē arom ixte nhỹhỹnh ixwryk xà hã amnhĩ pumunh mex. Nē mē arom ma akupỹm nhỹhỹm ixàpir xà hã amnhĩ pumunh mex. Jakamã ãm hãmri na pa ã mē amã amnhĩ jarēnh anē. 15Na ka htem amnhĩ krã hkõt tanhmã ri ijarēnh to. No pa na pa kormã amnhĩ xwar tanhmã mē ajarēnh to hkêt nē. 16Ixte tanhmã mē ajarēnh to ronhỹx pa ãm hãmri mē ajarē. Nhỹx pa ãm papxipix amnhĩ krã hkõt tanhmã mē ajarēnh to hkêt nē. Nhỹx mãänēn Inhĩpêêxà pê kot mē awỹr inhmēnh xwỹnhta inhĩhkõ hã pa wa ãm hãmri axpēn kõt tanhmã mē ajarēnh to. Mē ate amnhĩ to mex ã mē ajarē rỹ mē ate amnhĩ tomnuj ã mē ajarē. 17Tĩrtũm kapēr ã kagà htũm kot ja jarēnh kot:

Koja mēhõ wa hamẽxkrut nē tanhmã mēmoj jarēnh to nē ãm axpēn kõt harēnh o htipxi. Hã kot kaj mē wa ama nē ãm hãmri wa kot harēnh kõt ajamaxpēr kurê kumrêx.

18Anhỹr o kot harēnh. Tã pa ã amnhĩ jarēnh anē nhũm Inhĩpêêxà kot mē awỹr inhmēnh xwỹnhta mãänēn ã ijarēnh anē. Wa ixpijakrut tã ã wa ixte axpēn kõt amnhĩ jarēnh anhỹr jakamã kwa mē ixte tanhmã amnhĩ jarēnh toja ma nē ixkõt ajamaxpēr kêt wehe. Anē.

19Nhũm pre ã Jejus mē kãm kapēr anē. Hãmri nhũm mē kuma nē kãm:

—No nhỹri na we anhĩpêêxà ja? Anē.

Hãmri nhũm mē kãm:

—Nà mē ate Inhĩpêêxà pumunhre hã. Mē ate aprĩ hã ixpumunh ronhỹx ka mē mãänēn aprĩ hã Inhĩpêêxà pumunh mex kurê kumrêx. Nom mē ate ixpumunh mex kêt jakamã na ka mē mãänēn omunh mex kêt nē. Anē.

20Nhũm pre ã Jejus mē kãm kapēr anē. Arĩ Tĩrtũm mã amnhĩ jarēnh xà hã ixkreja kamã mē ahkre ho xa. Mē kot kàxpore gjēnh xà kuri mē ahkre ho xa. Nhũm mē kãm hkurê xwỹnhjaja tee ri kot tanhmã mē ahkre htoja ma nē kãm unēnh nē haxàr prãm nē. Nom kormã mē kot ã hipêx anhỹr ã arĩgro kormã kator kêt jakamã nhũm Tĩrtũmja nē mē omunh mex nē nhũm mē ãm kãm unēnh prãm kaprỹ.

21Hãmri nhũm Jejus arĩ mē kãm kapēr o xa nē mē kãm:

—Nà kot paj nhỹrmã mē arũm ixkato nē ma akupỹm api. Ka mē tee ri ijapēr nom nhỹri ixpumunh kêt nē. Hãmri nē mē ate amnhĩ tomnuj o apa rãhã ty nē mē atõ ixwỹr axàpir kêt nē. Anē.

22Hãmri nhũm Ijaew nhõ pahijaja tee ri ã kapēr anhỹrja ã kuma nē axpēn mã hã hpēr o pikēnh o kuhê nē axpēn mã:

—Kwa mǎn ra kot amnhĩ pĩr kaxyw ǎ na ri hkõt mẽ paxàpir kêt ǎ mẽ pajarēnh anē nà? Anē.

23Hāmri nhũm amnhĩ tǎ mẽ kuma nē mẽ kām:

—Nà mẽ kajaja mẽ apê pyka nhõ xwỳnh na ka mẽ. No pa na mẽ arom ixpê kaxkwa nhõ xwỳnh jakamǎ mẽ pajamaxpěr kot axpēn pyràk kêt. 24Kot kaj mẽ ixpê kaxkwa rũm ixwrỳk xwỳnh ǎ ixpumu nē amnhĩ kaxyw inhmǎ ajamaxpěr nē ixkõt amnhĩ xunhwỳr kêt hǎ kot kaj mẽ ate amnhĩ tomnuj o apa rǎhǎ nhỹrmǎ atyk o mẽ kamjaja Tĩrtũm mǎ amnhĩ pǎnhǎ amnhĩre. Anē.

25Nhũm Jejus ǎ mẽ inhõ pahijê hkukamǎ mẽ kot amnhĩ nhĩpêx jarēnh anē nhũm mẽ tee ri amnhĩ tǎ kuma nē kām:

—Kwa mẽ atõ na ka we ri ǎ mẽ inhmǎ akapěr anē? Anē.

Hāmri nhũm mẽ kām:

—Nà ra ixte mẽ amǎ amnhĩ jarēnh kēnǎ. Xàn ka mẽ kormǎ aprĩ hǎ inhmar kêt nē? 26Kot paj nhỹrmǎ mẽ amǎ mẽ ate amnhĩ tomnuj piitǎ ho amnhĩrĩt pa. Na pa kot mẽ awỳr inhmēnh xwỳnhnta pix xõ ri tanhmǎ mẽ amǎ ixkapěr to ho ri ixpa. ǂm hāmri na hte tanhmǎ mẽmoj jarēnh to. Na hte hēx kêt nē. Anē.

27Nhũm pre ǎ Jejus mẽ kām Hipêêxǎ kot mẽ hwỳr mēnh ǎ harēnh anhỹr tǎ no nhũm mẽ Hipêêxǎ kēp Tĩrtũm ǎ hkõt hamaxpěr kêt nē. 28Jakamǎ nhũm mẽ kām:

—Nà koja mẽ nhỹrmǎ pĩ kahpa hǎ inhõ ka mẽ rĩ kormǎ aprĩ hǎ ixpê Tĩrtũm rũm mẽ awỳr ixwrỳk xwỳnh ǎ ixpumu. Nē ixte amnhĩ krǎ hkõt ixkapěr o ri ixpa hkêt ǎ ixpumu. Nē ǎm Inhĩpêêxǎ xõ ri ixprĩ hǎ ixkapěr o ri ixpa hǎ ixpumu. 29Ixte kām hprǎm xǎ hkõt pix mǎ tanhmǎ ri amnhĩ nhĩpêx to ho ri ixpa jakamǎ na hte ixtǎnopxar mex o ixkõt pa ho pa. Koja aa ixkaga hkêt nē. Anē.

30Hāmri nhũm mẽ hkwỳja kuma nē hkwỳjê rom kapěr kõt hamaxpěr 31nhũm amnhĩ tǎ mẽ omu nē mẽ kām:

—Nà ǎm hāmri na ka mẽ tǎ ixkõt ajamaxpěr. Tǎ kēr ka mẽ ixkõt amnhĩ xunhwỳ nē ixkapěr kõt pix mǎ ri amnhĩ nhĩpêx mex o ri apa. Hāmri pa ja hǎ mẽ apumu nē mẽ apê ixkwỳ kumrēx ǎ mẽ ajarē. 32ǂm hāmri na pa hte ǎ ixkapěr anhỹr o ri ixpa. Tǎ kot kaj mẽ ixkõt ri amnhĩ nhĩpêx o ri apa hāmri nē aprĩ hǎ inhmar tỳx nē. Nom na hte kormǎ mẽmoj kot amnhĩ tǎ mẽ ato htỳx pyràk o mẽ anhĩpêx ka mẽ tee ri amnhĩ krǎ hkõt kām anhũrer prǎm kaprỳ. Tǎ kot kaj mẽ ixkõt amnhĩ xunhwỳ nē ixkõt ri amnhĩ nhĩpêx hāmri nē Tĩrtũm nhỹ hǎ tǎm amnhĩ nhĩpêx. Jao ỹ hǎ ate amnhĩ tomnuj mǎ anhũre. Anē.

33Nhũm pre ǎ Jejus mẽ kām kapěr anē hāmri nhũm mẽ tee ri kuma nē kām:

—Kwa mẽ ixpê mẽ pahpàr krax finat Apraãw kanrēhǎ htàmnhwỳ kēnǎ. Na pre mẽmoj te kot amnhĩ tǎ ho htỳx pyràk o hipêx kêt nē.

Jakamã mẽmo kot we mẽ ixpê hkanrêhã htãmnhwỳjê ho htỳx ka we ri ã mẽ ijarênh anê? Nà amrakati kênã. Tã kwa mon ka ã mẽ ijarênh anê? Anê.

34Hãmri nhũm Jejus hprĩ hã mẽ kãm awjarê nê mẽ kãm:

— Kwa mẽ ixkapêr ma nê amnhĩ krãm haxàr tỳx nê. Nà mẽ kot amnhĩ tomnuj o mẽ pa xwỳnhjaja te mẽ kot amnhĩ tomnuj tãm ri kot amnhĩ tã mẽ ho htỳx pyræk o mẽ hipêx. Jakamã nhũm mẽ urer kêt rãhã nê pa ho pa. Nê ã amnhĩ nhĩpêx anhỹr rãhã ho pa. **35**Jakamã ixkĩnhã mẽ kêp Tĩrtũm kwỳ hkêt. No pa na ixpê Tĩrtũm Kra jakamã mãânên ixpê hkwỳ na pa. **36**Tã mẽ kajaja. Kot kaj mẽ ixpê Tĩrtũm Kra hã ixkôt amnhĩ xunhwỳ hã kot pa tanhmã mẽ ato ka mẽ ixpyrà nê apê wa ixkwỳy. Hãmri nhũm mẽ ate amnhĩ tomnuj te kot mẽ amã urer pyræk o mẽ anhĩpêx ka mẽ ra wa ixkôt amnhĩ nhĩpêx o ri apa. Anê.

Mẽ kêp Tĩrtũm kra hkêt xwỳnhjê jarênh

37Nhũm Jejus arĩ mẽ kãm kapêr nê mẽ kãm:

— Nà ãm hãmri na ka mẽ apê finat Apraãw kanrêhã htãmnhwỳ hã amnhĩ jarê. Nom mẽ apê hkanrêhã htãmnhwỳ htã uræk nê amnhĩ kaxyw Tĩrtũm kôt ajamaxpêr kêt nê. Jakamã na ka htem ixkapêr ma nê ãm ama nê ixkaga. Nê axtem nê ixpĩr mã. Kop apu Apraãw arĩ mẽ akamã pa ronhỹx ã inhĩpêx anhỹr kêt nê. **38**Na pa hte Inhĩpêêxà hkôt pix mã ri amnhĩ nhĩpêx o ri ixpa. No mẽ kajaja axtem nê mẽ ate nhãm mẽ kapêr kôt amnhĩ nhĩpêx jakamã na ka htem ixkĩnhã Inhĩpêêxà hkôt amnhĩ nhĩpêx kêt nê. Anê.

39Hãmri nhũm mẽ tee ri amnhĩ tã kuma nê kãm:

— Tk. Kwa mon ka ã mẽ ijarênh anê? Mẽ ixte Apraãw kôt amnhĩ nhĩpêx o ri ixpa kênã. Anê.

Hãmri nhũm mẽ kãm:

— Nà. Mẽ ate hkôt ri amnhĩ nhĩpêx o apa ronhỹx ka mẽ uræk nê Inhĩpêêxà kapêr kôt amnhĩ nhĩpêx. **40**No na ka mẽ ra axtem nê ixpĩr mã. ãm hãmri na pre Tĩrtũm inhmã awjarê pa ô ri tanhmã mẽ amã mẽmoj jarênh to ho ri ixpa htã ka mẽ ra axtem nê ixpĩr mã. Kwa xà na pre Apraãwja ã mẽ hipêx anhỹr o pa? Nà na pre ã mẽ hipêx anhỹr kêt nê. **41**Mẽ ate hkôt amnhĩ nhĩpêx xwỳnhhta axtem na. Kêp Apraãw kêt. Nê mãânên kêp Tĩrtũm kêt. Anê.

Hãmri nhũm mẽ tee ri kuma nê kãm:

— Tk. Kwa nà ã mẽ ijarênh anhỹr kêt nê. Mẽ ixte Apraãw kôt amnhĩ nhĩpêx xwỳnh kênã. Tã ka ri axtem nê ã mẽ ijarênh anê. Mẽhõ hkôt kot pa kêt wem ri axtem amnhĩ nhĩpêx o ri ixpa? Anê.

42Hãmri nhũm mẽ kãm:

— Nà mẽ ate Apraãw kôt amnhĩ nhĩpêx ronhỹx ka mẽ ixpumu nê uræk nê amã ixprãm nê. Apraãw kot hkôt amnhĩ nhĩpêx o pa xwỳnhhta

tãm kot mẽ awÿr inhmẽnh nhũm mẽ awÿr ixwrÿk kênã. Na pa pre amnhĩ krã hkõt man mẽ awÿr ixwrÿk kêt nẽ. Tãm na pre mẽ awÿr inhmẽ pa wrÿ. 43Kwa mon ka mẽ aprĩ hã ixkapẽr mar mex kêt nẽ? Nã mẽ amã ixkõt amnhĩ nhĩpêx prãm kêt jakamã na ka mẽ tee ri ixkapẽr ma nẽ aprĩ hã mar mex kêt nẽ. 44Mẽ ate hkõt amnhĩ nhĩpêx xwÿnhhta Satanasti na. Aa tãm kot amnhĩ nhĩpêx kêt kumrẽx. Kêp mẽ hpar o pa xwÿnhjê hpãm maati na. Nẽ kêp mẽ kãm hêx o pa xwÿnhjê pãm maati na. A kot amnhĩ nhĩpêx kot anhÿr. Nẽ kãm mẽ kapẽr mex mar prãm kêt o pa. Nẽ ãm hêx pix o pa jakamã kêp mẽ hêx xwÿnhjê pãm. A kot amnhĩ nhĩpêx anhÿr xwÿnh tã ka htem hkõt amnhĩ nhĩpêx o ri apa.

45—Na pa hte kurom ãm hãmri ixkapẽr o ri ixpa. No mẽ kajaja mẽ apê hêx nhi xwÿnh maati ja hkra jakamã mẽ amã ixkapẽr mar prãm kêt. 46Xã na ka pre mẽ atõ ixte tanhmã amnhĩ tomnuj to hã ixpumu? Nã amrakati. Ixte amnhĩ to mex o ri ixpa xwÿnh na pa. Nẽ tãm ixkapẽr o ri ixpa xwÿnh tã ka mẽ inhma nẽ ãm inhma nẽ ixkõt ajamaxpẽr kêt nẽ. Kwa mon ka mẽ ja hã ixpumunh nẽ ixkõt ajamaxpẽr nẽ ixkõt amnhĩ xunhwÿr kêt nẽ? 47Tirtũm krajaja na htem kapẽr mar tÿx nẽ hkõt amnhĩ nhĩpêx o pa. No mẽ apê hkra hkêt jakamã mẽ amã kapẽr mar prãm kêt. Anẽ.

Mẽ kot Jejus kêp Satanasti hkwy hã harẽnh

48Hãmri nhũm mẽ ã Jejus kot mẽ harẽnh anhÿrja ma nẽ kamã gryk tÿx kumrẽx. Hãmri nẽ kãm:

—Tk. Kwa ate amnhĩ tomnuj o apa xwÿnhhti kênã. Ra Satanasti hkwy pê mẽkarõmnuti tanhmã kot akrã hto jakamã na ka ã mẽ inhmã akapẽr anẽ. Anẽ.

49Hãmri nhũm mẽ kãm:

—Nã mẽkarõmnuti kot tanhmã ixto hkêt. Na pa hte Inhĩpêxã hã xpijaàm pix o ri ixpa. Tã mẽ ate ixkĩnhã hã apijaàm kêt jakamã mããnen pa ixtã apijaàm kêt nẽ. 50Na pa hte amnhĩ krã hkõt mẽ piitã mẽ kot ixtã hpijaàm prãm xaj tanhmã mẽ kãm ixkapẽr to hkêt nẽ. No mẽ piitã mẽ kot ixtã hpijaàm o paja na Inhĩpêxã kãm hprãm. Tã koja nhÿrmã amnhĩ nẽ ixtã mẽ hpijaàm kêt xwÿnhjaja mẽ kot amnhĩ xã htÿx kamã hamak tũm xàta wÿr mẽ rẽnh pa.

51—Nẽ kot ka mẽ atõ wa ixkapẽr ma nẽ ixkõt amnhĩ nhĩpêx. Hã kot kaj wa ixri atĩr tũm nẽ apa ho apa. Kwa mẽ ixkapẽr ma nẽ amnhĩ krãm haxàr tÿx nẽ. Anẽ.

Nhũm pre ã Jejus Ijaew nhõ pahijê mã kapẽr anẽ. 52Nhũm mẽ kuma nẽ kãm:

—Kwa pẽr ãm hãmri na ka hte Satanasti nhÿ hã ã mẽ htĩr tũm nẽ mẽ pa ho pa hã mẽ harẽnh anhÿr o ri axêx o ri apa. Finat Apraãw na pre ri paa nẽ ty. Tã mẽ kot Tirtũm nhÿ hã kapẽr jarẽnh o mẽ pa xwÿnhjaja na

prem uràk nê ri paa nê mãânên htyk pa. Tã ka axtem nê mẽ kot akapêr kôt amnhĩ nhĩpêx o mẽ pa xwỳnhjaja ari htĩr tũm nê pa ho pa hã mẽ harê. Nà na ka ãm mẽ inhmã mẽ ho axêx o xa. ⁵³Na pre mẽ pahpãm Apraãwja kot amnhĩ to rax tã ty nê hapêx. Nhũm mẽ kot Tĩrtũm nhỹ hã kapêr jarênh xwỳnhjaja mãânên mẽ kot amnhĩ to rũnh tã htyk pa nê hapêx. Mẽ kot amnhĩ to rũnh tã htyk pa nê hapêx kênã kot kêt mẽ tanhmã amnhĩ to nê ari htĩr tũm nê pa. ãm mẽ ixte akapêr mar nê atã ixpijaàm pix prãm xàj na ka ã mẽ inhmã mẽ htĩr tũm nê pa hã mẽ harênh anê. Nom na ka ã mẽ harênh anhỹr kaprỳ. Kot paj mẽ ri akapêr mar kêt nê. Anê.

54Hãmri nhũm mẽ kuma nê mẽ kãm:

—Nà na pa hte amnhĩ krã hkôt mẽ ate ixtã apijaàm hprãm xàj tanhmã mẽ amã ixkapêr to hkêt nê. Kot paj anê nê ãm ixtỳx ã amnhĩ nhĩpêx anhỹr kaprỳ. No Inhĩpêêxà tãm kãm mẽ apiitã mẽ ate ixtã apijaàm o apaja nhũm kãm hprãm. Mẽ ate Tĩrtũm kôt amnhĩ nhĩpêx o apa hã amnhĩ to axêx xwỳnhhta tãm na kãm mẽ ate ixtã apijaàmja nhũm kãm hprãm. Tã ka htem ã amnhĩ nhĩpêx anhỹr kêt nê. Na ka htem ixkuk pumu nê axtem nê ixte Satanasti nhỹ hã mẽ amã ixêx o ri ixpa hã ijarê. ⁵⁵Mẽ ate Inhĩpêêxà hkôt amnhĩ nhĩpêx ã amnhĩ jarênh tã ãm amnhĩ to axêx o ri apa. No pa na pa hte mẽ arom ãm hãmri hkôt amnhĩ nhĩpêx mex o ri ixpa. ⁵⁶Amnepêm mẽ pahpàr krax Apraãwja na pre mẽ awỳr ixwrỳk kukamã ijarênh ma nê mẽ arom inhỹ hã hkĩnh tỳx nê pa. Anê.

Nhũm pre ã Jejus mẽ kãm amnhĩ jarênh anê. ⁵⁷Hãmri nhũm mẽ kuma nê tee ri kot mẽ kãm tanhmã Apraãw jarênh toja ma nê kãm:

—Tk. Xà na ka pre finat Apraãwja ano ho omu? Nà kormã anyw kênã. Apraãw amnepêm htyk nê hapêx kênã kot ka kêt kot akukamã ajarênh mar nê hkĩnh tỳx ã harê. Xàn ka pre ano ho omu? Kormã akator kêt ri na pre amnepêm htyk nhũm mẽ haxàr kênã. Nà na ka ãm mẽ inhmã amnhĩ to axêx. Te amnepêm mẽ hkukamã apa nê ate mẽ omunh nê mẽ harênh pyræk. Kwa akatàt kôt mẽ inhmã awjarê. Anê.

Jejus kêp rãhã ho rãhã xwỳnh ã harênh

58Hãmri nhũm Jejus mẽ kãm:

—Nà ixêx kêt. ãm hãmri na pa ã mẽ amã amnhĩ jarênh anê. Amnepêm kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwỳnh jakamã na pa pre hte inhno ho Apraãw pumunh mex o ri ixpa. Kwa mẽ ixkapêr ma nê amnhĩ krã him haxàr tỳx nê. Anê.

59Hãmri nhũm mẽ tee ri kot ã amnhĩ jarênh anhỹrja ã kuma nê kamã gryk tỳx nê. Nê axpên mã:

—Kwa tanhmã kot we amnhĩ to nê amnepêm rãhã nê pa ho pa xwỳnh ã amnhĩ jarê? Tĩrtũm pix na rãhã ho rãhã pa xwỳnh. Anê.

Hãmri nẽ kamã gryk xàj kẽn rũnh kwỳ kawrà ho ri hprõt nẽ kot ho htak o hpĩr kaxyw. Nom nhũm ra amnhĩ tã mẽ omu nẽ mẽ kęp akunok nẽ Tĩrtũm mã amnhĩ jarẽnh xà hã ixkreja rũm kato nẽ ma tẽ.

Jejus kot no hkre xwỳnh o mex ã harẽnh

Makre 8.22-26

9 ¹Hãmri nhũm Jejus ma tẽ pa mẽ hkõt ri mẽ ixpa ho mẽ ixpa xwỳnhjaja ma hkõt mra. Hãmri nẽ nhỹri no hkre xwỳnh pumu. Katorxà nhõxà hkre rũm na pre no hkre nẽ kato. Hãmri nẽ ra hprêk nẽ hpri kamã àhwỳr o hkrĩ. ²Tã hãmri pa mẽ mra nẽ omu nẽ hã Jejus kukja nẽ kãm:

—Kwa mẽmoj mỳrapê na pre we myti něj no hkre nẽ kato? Xà tãm kot tanhmã amnhĩ tomnuj to mỳrapê nà? Xà katorxà rỳ hipêêxà kot amnhĩ tomnuj mỳrapê na pre ã no hkre nẽ kator anẽ? Anẽ.

³Hãmri nhũm mẽ inhmã:

—Nà mẽhõ kot tanhmã amnhĩ tomnuj to mỳrapê no hkre nẽ kator kêt. ãm Tĩrtũm kot ho mex nhũm mẽ kot ja hã omunh kaxyw na pre ã no hkren kator anẽ. Tã kot paj Tĩrtũm nhỹ hã no ho mex ka mẽ ja hã ixpumu. Na pa hte kormã jar pikap ri ixpa ri Tĩrtũm mã tanhmã amnhĩ nhĩpêx mex to ho ri ixpa. ⁴Na htem arĩgro hã mẽmoj tã apê nhũm kamàt nhũm mẽ kãm ure nẽ àpênh kêt nẽ. Ja pyrà nẽ na pu htem kormã pahĩr ri jar pikap ri papa ri Tĩrtũm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hãmri nẽ axte jar ã amnhĩ nhĩpêx anhỹr kêt nẽ. Jakamã kwa kêr pu mẽ ri jar pikap ri papa ri kãm tanhmã amnhĩ nhĩpêx mex to ho ri papa. ⁵Na pa hte ã kãm amnhĩ nhĩpêx anhỹr jao te kanê hirã mex pyrà nẽ ixprĩ hã mẽ kãm Tĩrtũm kot amnhĩ nhĩpêx o amnhĩrĩt mex o ri ixpa. Anẽ.

⁶Nhũm pre ã Jejus mẽ inhmã amnhĩ jarẽnh anẽ. Hãmri nẽ kot nohkre xwỳnhhta no o mex kaxyw hikõt nẽ argõx mẽ nẽ ho gyw kwỳ nhĩpêx nẽ kãnhmã xa nẽ ho no kukõ. ⁷Hãmri nẽ kãm:

—E ma gõ gjênh xà pê Siroe hwỳr tẽ nẽ kamã amnhĩ no kuhõ. Anẽ.

Mẽ pakapêr kãm Siroeja mẽ kot kãm: “Nhỹhỹm mẽnh xwỳnh” anhỹr jarẽnh pyræk. Tã nhũm Jejus hwỳr kumẽ nhũm ma hwỳr tẽ. Hãmri nẽ kamã amnhĩ no hã gyw kuhõnh pa jao rĩt mex kurê kumrêx. Hãmri nẽ rĩt mex ã amnhĩ pumu nẽ hkĩnh tỳx nẽ ma akupỹm õrkwỹ hwỳr tẽ. ⁸Hãmri nhũm õrkwỹ kuri mẽ õrkwỹ xwỳnhjaja nẽ mẽ kot pry kamã ahwỳr o hkrĩ hã omunh xwỳnhjaja amnhĩ jaêr pê ra rĩt mex ã omu nẽ tee ri hã axpẽn kukja nẽ axpẽn mã:

—Kwa pêr pry kamã àhwỳr o hkrĩ xwỳnhhta na nà? Anẽ.

⁹Hãmri nhũm kamã mẽ hkwỳjaja mẽ kãm:

—Tỳ. Tãm na. Anẽ.

Nhũm kamã mẽ hkwỳjaja mẽ kãm:

— Nà tãm kêt. Axtem mēhō na. Te kot uràk nom tãm kêt. Anē.

Anhÿr o ri axpēn mã harē. Tã nhũm tãm mē kãm amnhĩ jarē nē mē kãm:

— Tÿ pa kēnã. Pa na pa pre hte inhno hkre nē ri ixpa htã ra ixrĩt mex. Anē.

10Hãmri nhũm mē tee ri kuma nē kãm:

— Kwa no tanhmã na ka we amnhĩ to nē ra arĩt mex?

11Anē nhũm mē kãm:

— Nà mē kot kãm “Jejus” anhÿr xwÿnhhta na ixwÿr tē nē ixkaxyw gyw kwÿ kagō nē ho inhno kukō. Hãmri nē mē kot gō mã: “Siroe” anhÿr xwÿnhhta kamã ixte amnhĩ no kuhōnh kaxyw hwÿr inhmã anē pa ma hwÿr tē nē kamã amnhĩ no kuhō nē ixrĩt mex kurê kumrēx. Anē.

12Hãmri nhũm mē kuma nē kãm:

— No nhÿhÿm na ato mex xwÿnhja ma tē? Anē.

Hãmri nhũm mē kãm:

— Konēn. Ixte nhÿhÿm htēm xà hkôt omunhre hã. Anē.

13Hãmri nhũm mē kuma nē ma Parijew nhō xwÿnhjê hwÿr o mō nē mē kãm harē. 14Nē mē kãm:

— E ot pa mē awÿr jahti ho tē. Na xep Jejusja jarãhã akupÿm kãm no ho mex. Mē panhō arĩgromnu htã nhũm hã no ho mex. Anē.

15Hãmri nhũm mē tee ri mē kuma nē myta pumu nē kãm:

— E mē inhmã amnhĩ jarē. Tanhmã na ka pre we amnhĩ to nē anohkre nē akrĩ htã ra ano mex nē? Anē.

Hãmri nhũm mē kãm:

— Nà na pre Jejus gyw o inhno kukō nē inhmã anē pa gō ho amnhĩ no kuhō nē ixrĩt kurê kumrēx. Anē.

16Hãmri nhũm mē kuma nē tee ri Jejus ã axpēn kukjêr o kuhê nē axpēn mã harēnh o:

— Kwa mē panhō arĩgromnu hã kot ho mex jakamã kēp Tĩrtũm rũm mē pahwÿr wrÿk xwÿnh kêt. ãm kot amnhĩ tomnuj xwÿnh kēnã. Anē.

Nhũm mē hkwÿjaja harēnh o:

— Kwa nà. Kot amnhĩ tomnuj xwÿnh ronhÿx àhpumunh tÿx kôt no ho mex kêt nē. Anē.

17Hãmri nē hpãnhã no mex xwÿnhhta mã kãm:

— No ka? Ate kot ano ho mex xwÿnh ã amnhĩ tã harēnh jakamã mēhō hã na ka hkamnhĩx? Mēhō na wehe? Anē.

Hãmri nhũm mē kãm:

— Konēn. Mãn kēp Tĩrtũm kapêr jarēnh o ri mē pa xwÿnh mãn. Hã na ã inhno ho mex anē. Anē.

18Hãmri nhũm mē tee ri kuma nē axpēn mã:

—Kwa pěr aa nohkre hkêt kênã. Na pre ãm amnhĩ to hêx o pa. E kwa pu mẽ amnhĩ wỳr katorxà nê hipêêxà wa hã karõ kê wa man tẽ nê tanhmã mẽ pamã harênh to. Anê.

Hãmri nê wa hã karõ 19nhũm wa mẽ hwỳr tẽn axà nhũm mẽ wa kãm:

—Pa. E mẽ inhmã mẽmoj jarẽ. Xà we wa akrata na ãm ja nà? Xà tãm na ka hte wa nohkre nê kator ã harê? Kwa tanhmã na we amnhĩ to nê ra rĩt mex? Anê.

20Hãmri nhũm wa mẽ kãm:

—Ỗy wa ixkra kênã. Na pre wa ixpê nohkre nê kato. 21Tã ra tanhmã amnhĩ to nê ra rĩt mex. No wa ixte kot ho mex xwỳnhhta pumunh kêt. Kwa mẽ tãm mãn hkukja nê ama. Ra ãptàr kênã. Kê tãm mãn mẽ amã tanhmã amnhĩ jarênh to ka mẽ ama.

22Anhỳr o mẽ kãm wa hkrata jarẽ. No ãm wa kãm mẽ uma nê ã mẽ kãm kapêr anê nê mẽ kãm Jejus nhĩxi jarênh kêt nê. Na pre Parijew nhõ xwỳnhjaja ra Jejus nê mẽ kãm kapêr nê mẽ kãm:

—Ka mẽ atõ Tĩrtũm kot mẽ pakaxyw Jejus xãm ã harê hãmri nê axte Tĩrtũm kapêr o mẽ ahkre xà hã ixkreja wỳr agjêx kêt kumrêx nê rĩ amnhĩ pumu.

23Anhỳr o nê mẽ hkurê jakamã nhũm wa mẽ umaj ã mẽ kãm hkra jarênh anê nê kot ho mex xwỳnh nhĩxi jarênh kêt nê. 24Hãmri nhũm mẽ axte amnhĩ wỳr no mex xwỳnhhta ã karõ nê kãm:

—Kwa akatàt kôt mẽ inhmã amnhĩ jarẽ. Ate kot ano ho mex ã harênh xwỳnhhta na kot amnhĩ tomnuj pix o pa xwỳnh kênã kot kêt ano ho mex. Jakamã kwa Tĩrtũm noo mã akatàt kôt mẽ inhmã amnhĩ jarẽ nê axêx kêt nê. Anê.

25Hãmri nhũm mẽ kãm:

—Ko ixte ja hã omunh kêt. ãm ja pix na ixte omunh. Na pa pre inhno hkre nê ri ixpa htã ra ixrĩt mex nê. Anê.

26Hãmri nhũm mẽ tee ri kot amnhĩ jarênhja ã kuma nê kãm:

—No tanhmã na we mytita amnhĩ to nê amã ano ho mex? Anê.

27Hãmri nhũm tee ri axte mẽ kot hã hkukjêr ã mẽ kuma nê mẽ kãm:

—Kwa ra ixte mẽ amã ãm hãmri amnhĩ jarênh griã. Tã ka mẽ inhma nê ãm inhma nê arĩ hã ixkukja. Mãn ka mẽ amã hkôt amnhĩ xunhwỳr prãm hã na ka mẽ aprĩ hã ixkukja nà? Mẽ ate kot amnhĩ nhĩpêx ã aprĩ hã harênh mar nê hkôt amnhĩ xunhwỳr prãm xàj na ka mẽ aprĩ hã amã harênh prãm nê. Anê.

28Hãmri nhũm mẽ tee ri kuma nê kamã gryk nê. Nê hã kãm akir nê kãm:

—Tk. Ka na ka hte kapêr kôt amnhĩ nhĩpêx. No kêt mẽ pajaja na pa htem finat Mojes kapêr kôt pix mã amnhĩ nhĩpêx. 29Mojes mã na pre hte Tĩrtũm kapêr o pa. Jakamã pa htem ãm hkôt pix mã amnhĩ nhĩpêx o ri ixpa. No ate kot ano ho mex ã harênh xwỳnhhta mẽ ixte omunh kêt.

Ně mēhō nhỹ hã kot tanhmã amnhĩ nhĩpêx to ho pa xwỳnhja mẽ ixte omunh kêt. Aně.

30Hãmri nhũm tee ri mẽ kuma nẽ mẽ kãm:

—Kwa kot inhmã inhno ho mex nhũm ra ixrĩt mex tã ka mẽ tee ri hkukamã ajamaxpěr nẽ mēhō nhỹ hã kot ã amnhĩ nhĩpêx anhỹr o pa hã omunh kêt ã amnhĩ jarě. **31**Mě pahte Tĩrtũm kot amnhĩ nhĩpêx ã omunh mex. Kojã mēhō kot amnhĩ tomnuj xwỳnh mẽmoj tã kuwỳ nhũm kuma nẽ ãm kuma. No kêt mẽ kot hkôt ri amnhĩ nhĩpêx xwỳnhjaja. Nẽ mẽ kot kãm mex o mex ã harěnh xwỳnhjaja na htem mẽmoj tã kuwỳ nhũm mẽ kuma nẽ mẽ kãm tanhmã mẽmoj nhĩpêx to rỳ mẽ kãm mẽmoj gō. **32**Tã aa mẽ pahte mēhō kot mẽ no ho mex ã harěnh mar kêt tã nhũm ã Jejus inhmã inhno ho mex aně. **33**Kêp Tĩrtũm kwỳ hkêt ronhỹx pre inhno ho mex kêt nẽ. Aně.

34Hãmri nhũm mẽ kuma hãmri nẽ kãm:

—Tk. Kwa pěr ãm akator kôt ate amnhĩ tomnuj o ri apa htã na ka ã mẽ inhmã akapěr aně. Kwa ixkreja rũm akato nẽ ma atēm kurê kumrêx.

Anhỹr o kãm kapěr hãmri nẽ mẽ amnhĩ nê hano nhũm kato nẽ ma tẽ.

35Tã nhũm Jejus ra mẽ kot amnhĩ nê hanor ã harěnh ma nẽ ma hapêr o tẽ nẽ nhỹri omu. Hãmri nẽ amnhĩ tã hkukja nom te nhãm mēhō hã hkukjêr pyrã nẽ kãm:

—Pa? Xàn ka ra Tĩrtũm kot mẽ awỳr mēnh xwỳnhhta amnhĩ kaxyw hkôt ajamaxpěr nà? Aně.

36Hãmri nhũm kormã kot no ho omunh kêt jakamã kêp Jejus ã omunh kêt nẽ. Na pre kormã no hkre nẽ ãm kapěr pix ma. Tã ra akupỹm rĩt mex nom kormã no ho omunh kêt nẽ. Jakamã nhũm Jejus hwỳr tẽ nẽ ã kãm kapěr aně nhũm omu nẽ kormã kêp Jejus ã omunh kêt nẽ kãm:

—Tỳ kot kaj inhmã ahkre pa omu nẽ hkôt amnhĩ xãm kurê kumrêx. Aně.

37Hãmri nhũm kãm:

—Kwa paa. Ixte amã ixkapěr xwỳnhhta pa na pa. Aně.

38Hãmri nhũm kãm:

—Kwa xōwehe Pahihti? Nà kot paj amnhĩ kaxyw akôt pix mã ijamaxpěr nẽ akôt pix mã amnhĩ nhĩpêx o ri ixpa. Aně.

Hãmri nẽ kutã hkôn krã ho tēm nẽ nhỹ nẽ kãm mex o mex ã harěnh o nhỹ. **39**Hãmri nhũm Jejus kãm:

—Nà ixte mẽ apiitã tanhmã mẽ ajarěnh to kaxyw na pa pre kaxkwa rũm man mẽ awỳr wrỳ. Ahpỹnhã mẽ amã ixprãm xwỳnhjê jarěnh nẽ ahpỹnhã mẽ kãm ixprãm kêt xwỳnhjê jarěnh kaxyw. Mẽ kãm ixprãm kêt xwỳnhjaja kot hprĩ hã Tĩrtũm kapěr mar mex kêt tã na htem htỳx ri kot mar mex ã amnhĩ jarěnh o pa. Jakamã te mẽ nohkre xwỳnhjaja kot amnhĩ nhĩpêx pyrãk. Nom kojã mẽ Tĩrtũm kapěr ma nẽ ixkôt amnhĩ

xunhwÿr japêr. Hãmri nê te ra rît mex pyræk o amnhĩ nhĩpêx. Jao ra hprĩ hã Tirtũm kapêr mar mex o pa. Anê.

40Nhũm pre ã Jejus kãm kapêr anê. Nhũm Parijew nhõ xwÿnh kwÿjaja kot kuri mar o kuhê xwÿnhjaja ã kapêr anhÿr ã kuma nê amnhĩ tã kãm:

—Kwa nà. Xà we mẽ pajaja na ka ã mẽ inhnokre hã mẽ ijarênh anê? Xà mẽ ixte ixprĩ hã Tirtũm kapêr mar mex kêt ã na ka mẽ ijarê nà? Anê.

41Hãmri nhũm mẽ kãm:

—Ûÿ kop apu mẽ ate aprĩ hã kapêr mar mex kêt ã amnhĩ jarênh ronhÿx ja mẽ amã mex nê. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj tÿx nê. Na hte Tirtũm ja hã mẽ apumu nê amnhĩm mẽ ate amnhĩ tomnuj xwÿnh ã mẽ ajarê. Anê.

Ôwêhti jarênh

Matêwre 9.36, 12.11-12; Rukre 15.3-7

10 ¹Nhũm Jejus arĩ Ijaew mã kapêr nê mẽ kãm:

—E pa mẽ amã awjarê ka mẽ inhma nê amnhĩ krã him haxàr tÿx nê ho apa. Mẽ hkrit ôwêhti kot paj mẽ amã harê ka mẽ inhma. Na hte ôwêhti jamãr o pa xwÿnhjaja ôwêhti apkur kaxyw mẽ o pa hãmri nhũm kamàt nhũm akupÿm kahê hwÿr mẽ o pa. Kahê jakwakreja ãm pixii. Tã koja mẽhõ kahê xà hkôt hwÿr àr kêt nê axtem nê tẽ nê nhÿhÿnh kahê hã api nê ôwêhti hwÿr àr japêr nhũm mẽ omu nê kot hkwy ho àhkĩnh ã omunh kurê kumrêx.

2—No ôwêhti jamãr o pa xwÿnhja na hte mẽ kurom katàt kôt kahê jakwakre rũm ôwêhti hwÿr agjê. ³Nhũm kahê xà jamãr xwÿnhja amnhĩ wÿr omu nê kãm kahê xà rênh kurê kumrêx nhũm axà. Na hte apkati mẽ ma nhÿhÿm apkur kaxyw mẽ o pa. Nê nojarêt nê mẽ kãm akir. Ahpÿnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hãmri nhũm mẽ kuma nê hwÿr mra nê hã pikuprõnh pa nhũm mẽ



Juãw 10.1-5

ho hapôj nê ma nhÿhÿm ri mẽ apkur kaxyw mẽ o pa. 4Ma mẽ apkur kaxyw nhÿhÿm mẽ o pa. Nhÿm ôwêhti ra kot kapêr mar mex jakamã ma amnhix ri hkôt apkur o pa.

5—Na hte hamãr o pa xwÿnh pix kapêr ma nê hkôt pa nê nhãm mẽhõ hkôt ri pa hkêt nê. Kot kapêr mar kêt jakamã tee ri kuma nê umaj axkakhÿm nê hprôt nê ma mra. Na hte ôwêhti ã amnhĩ nhĩpêx anê. Anê.

Jejus te kêp ôwêhti gjênh xà hã hakwakre pyræk

6Nhÿm pre ã Jejus mẽ kãm ujarênh anê. Nê ujarênhja kamã amnhĩ kwÿjê jarê nê mããnên tãm amnhĩ jarê. Nom mẽ amnhĩ tã kuxi nê mẽ kãm amnhĩ jarênh o te ho ôwêhti jarênh pyræk nhÿm mẽ tee ri kuma nê mar mex kêt nê. 7Jakamã nhÿm axte mẽ kãm awjarê nê mẽ kãm:

—E pa ixprĩ hã mẽ amã ixujarênhja jarê ka mẽ inhma. Te ixpê ôwêhti jagjênh xà hã hakwakre pyræk. Kwa mẽ ja ma nê amnhĩ krã him haxàr tÿx nê. 8Na pre ra ixkukamã mẽ ohtô nê te ãm hãmri mẽ amã Tirtÿm kapêr jarênh pyræk o mẽ akôt ri pa. Nom mẽ amã hêx o pa. Te mẽ kot ôwêhti o àhkĩnh xwÿnhja kot amnhĩ nhĩpêx pyræk. Nom na hte ôwêhtija ãm hamãr xwÿnh pix kapêr ma nê nhãm mẽhõ kapêr mar kêt nê. Ja pyræk nê mẽ kot ixkôt amnhĩ xunhwÿr xwÿnhjaja na htem Tirtÿm kapêr o hêx o mẽ pa xwÿnhjê ma nê ãm mẽ kuma nê mẽ hkôt amnhĩ nhĩpêx kêt nê. Na htem ãm ixkapêr pix ma nê ixkôt pix mã amnhĩ nhĩpêx o pa.

9-10—Te ixpê ôwêhti gjênh xà hã hakwakre pyræk. Na hte ôwêhti mẽmoj punuj pymaj kahê hwÿr agjê nê kamã mex nê kuhê. Nê kurÿm hapôj nê ma apkur o pa. Ja pyræk nê mẽ kot ixkôt amnhĩ xunhwÿr xwÿnhjaja koja mẽ ixkukwak ri hkĩnh nê mex nê hamakêtkati nê pa ho pa. Nê nhÿrmã Tirtÿm mẽ wa ixri htĩr tÿm nê pa ho pa. Ja kaxyw na pa pre man mẽ awÿr pika hwÿr wrÿ.

—No ôwêhti ho àhkĩnh xwÿnhjaja na htem amnhĩm ho ahkĩ nê kupa nê ma amnhĩm o pa. Tã mẽ kot Tirtÿm kapêr o hêx o mẽ pa xwÿnhjaja te mẽ kot jajaja kot amnhĩ nhĩpêx pyræk. Anê.

Jejus te kêp ôwêhti jamãr xwÿnh pyræk

Eprêw 13.20; Apokarip 7.17

11—Nê ôwêhti jamãr mex xwÿnhja koja nhÿri mẽhõ kêp ôwêhti hõxpĩr kaxyw hwÿr htêm ã omu nê wa hã axpu. Nhÿm ho àhkĩnh mã xwÿnhja ôwêhti jamãr xwÿnh pĩ nhÿm ôwêhti nê ty. Tã ixkwÿjaja hamakêtkati nê mex nê pa kaxyw na pa pre amnhĩ grõnh kôt mẽ hwÿr wrÿ. Jakamã kot paj te ôwêhti jamãr xwÿnh kot amnhĩ nhĩpêx pyræk o amnhĩ nhĩpêx.

12-13—Nê na htem tõhã ôwêhti jamãr xwÿnh nhÿhÿm pa kaxyw nê mẽhõ mã amnhĩre nhÿm wakre kamã kãm hkrit jamãr o pa. Kãxpore pix prãm xaj kãm hamãr o pa. Jakamã koja nhÿhÿnh mry xoprê ra hwÿr

kato nhũm amnhĩ wỳr omu nẽ umaj ôwêhti re nẽ ma hprôt nẽ tẽ. Kãm ôwêhti japê hkêt âm kãm htĩr pix prãm xaj ôwêhti mã hamaxpêr kêt nẽ rer pa nẽ ma tẽ. Nhũm mry xoprêta ôwêhti hwỳr hprôt nẽ hkwỳ pynê nhũm hkwỳ umaj axkakhkũm nẽ hprôt nẽ ma mra. No kêt pa na te ixte ôwêhti mã hamaxpêr kêt nẽ kot rer nẽ ma hprôt nẽ htẽm xwỳnhhta pyræk kêt. Kot paj aa ixkwỳjê rer kêt nẽ. Kot paj mẽ hkôt ixpa ho ixpa rãhã nẽ.

14-15—Te ixte ôwêhti jamãr xwỳnh mex pyræk jakamã na pa hte uræk nẽ ahpỳnhã mẽ kot ixkôt amnhĩ xunhwỳr xwỳnhjê pumunh mex o ri mẽ hkôt ixpa. Te mẽ kêp ixkrit ôwêhti pyræk nhũm te ixpê mẽ hamãr mex o ri mẽ hkôt ixpa nẽ aa mẽ rer kêt xwỳnhhta pyræk.

—Nẽ mẽ kot ixkôt amnhĩ xunhwỳr xwỳnhjaja ra mẽ ixte amnhĩ nhĩpêx kôt axpẽn pumunh mex. Nẽ mẽ inhmã axpẽn japêê. Te Inhĩpêêxà mẽ wa inhmã axpẽn japê pyræk. Tã kot paj nhỹrmã mẽ nẽ tanhmã amnhĩ nhĩpêx to.

16—Mẽ kot ixkôt amnhĩ xunhwỳr xwỳnhjaja piitã kêp Ijaew pix kêt. Koja Ijaew kêt xwỳnh kwỳjaja mããnẽn ixkapêr ma nẽ ixkôt amnhĩ xunhwỳ nẽ ixkôt amnhĩ nhĩpêx. Jao ra te kêp ixkrit ôwêhti pyræk. Tã kot paj mẽ ho ixpimràa tã mẽ ho tipxi nẽ mẽ hamãr o ri mẽ hkôt ixpa.

17—Nẽ mẽ kot ixkôt amnhĩ nhĩpêx o mẽ pa xwỳnhjaja mẽ mex kaxyw na pa pre amnhĩ grôn h kôt mẽ hwỳr wrỳ. Jakamã kot paj nhỹrmã mẽ nẽ ty. Tã inhmã mẽ nẽ ixtyk puma hkêt jakamã na Inhĩpêêxà kãm ijapêê. Koja akupỹm ixto ixtĩr. 18Kop apu inhmã mẽ nẽ ixtyk prãm kêt ronhỹx mẽ kãm ixkurê xwỳnhjaja tee ri kãm ixpĩr prãm kaprỳ. Nom ixte mẽ kot ixkôt amnhĩ nhĩpêx xwỳnhjê nẽ amnhĩ grôn h kôt mẽ hwỳr ixwrỳk kênã. Jakamã kot paj arĩ mẽ kãm amnhĩ grôn h kôt amnhĩ gô nẽ arĩ mẽ kãm xa nhũm mẽ ixpĩ. Nom kot paj akupỹm ixtĩr. Mẽhõ koja tanhmã ixto nẽ ixpĩr o ixpĩ? Nà koja mẽhõ ixpĩr o ixpĩr kêt nẽ. Inhĩpêêxà nhỹ hã kot paj nhỹrmã ã amnhĩ nhĩpêx anẽ nẽ akupỹm ixtĩr. Anẽ.

Nhũm pre ã Jejus mẽ kãm amnhĩ jarẽn h anẽ. 19Hãmri nhũm Ijaew tee ri ã kot amnhĩ jarẽn anhỹr ã kuma nẽ kê axte axpẽn kwỳm ri tanhmã harẽn h to ho kuhê. 20Nẽ kamã mẽ hkwỳjaja harẽn h o:

—Tk. Kwa mẽ mar kêt nẽ. Satanasti nhỹ hã na hte htỳx ri ã mẽ pamã amnhĩ jarẽn anhỹr o pa. Anẽ.

21Hãmri nhũm mẽ hkwỳjaja mẽ kuma nẽ mẽ kãm:

—Nà kot anhỹr kêt. Xà na htem Satanasti nhỹ hã ã kapêr mex anẽ nẽ ã mẽ no hkre xwỳnhjê ho mex anẽ? Nà kot anhỹr kêt. Satanastija ukapĩre hã. Anẽ.

Ijaew nhõ pahijaja kot Jejus kaga hã mẽ harẽn h

Juãw 5.18, 8.59

22Tã nhũm ra amgrà hapêx pa mẽ ixpê Ijaew akupỹm krĩ pê Jerujarê kamã axpẽn wỳr akuprô. Axte mẽ ixte mẽ ixkĩnh kaxyw axpẽn wỳr

akuprõ. Amnepê mē inhġêtjaja kot akupÿm Tġrtũm mã amnhġ jarēnh xà hã ixkre ho mex pa nē ho Tġrtũm wÿr mã hamaxpēr nē hã ixkġnh ã arġgroja ã pa mē hwÿr akuprõ. **23**Hãmri nhũm Jejus ma mē ixkõt Tġrtũm mã amnhġ jarēnh xà hã ixkreta wÿr tē no ãm hwÿr àr kêt nē. ãm ixkre hpu hã kahê xà kape hã ri pa. Mē kot kãm: “Pahi finat Sarumãw pa xà” anhÿr xwÿnhnta kamã ri pa. **24**Hãmri nhũm kê ra mē inhõ pahijaja omu nē hã akuprõ nē hêx rom kãm kapēr nē kãm:

—Kwa tokyx aprġ hã mē inhmã amnhġ jarē. Xà apê Tġrtũm Kra na ka na? Xà ka na pre Tġrtũm mē ixkaxyw axãm? Kwa aprġ hã mē inhmã amnhġ jarē pa mē ama. Mon ka hte aprġ hã mē inhmã amnhġ jarēnh kêt nē? Na pa mē tee ri ate amnhġ nhġpêx ã apumu nē akukamã ijamaxpēr rũnh kumrêx o ri ixpa. Xà ãm hãmri apê Tġrtũm kot mē ixkaxyw axãm xwÿnhnta na ka? Anē.

25Hãmri nhũm mē kãm:

—Tk. Ra ixte mē amã amnhġ jarēnh xohtõ htã ka mē inhma nē ãm inhma. Na pa hte xatã Inhġpêêxà nhÿ hã mē amã mē ate aa mēmoj pumunh kêt kwÿ ho anhÿr o ri ixpa ka mē ja hã ixpumu nē ãm ixpumu nē ixkõt ajamaxpēr kêt nē. **26**Mē apê ixkwÿ hkêt jakamã na ka mē ixkõt ajamaxpēr kêt nē. Te mē apê ixkrit ôwêhti pyrãk kêt. **27**Ixkwÿjaja na te ho ôwêhti kot hamãr xwÿnh kapēr mar nē hkõt ri pata pyrã nē ixkapēr ma nē ixkõt amnhġ nhġpêx o pa. Ixpê mē õ pahihiti hã mē kot ixpumunh mex jakamã na htem ixkõt amnhġ nhġpêx mex o pa. Ixte ja hã mē omunh mex nē. **28**Koja mē nhÿrmã htyk tã no ãm ixkukwak ri akupÿm htġr hãmri nē Tġrtũm mē wa ixri htġr tũm nē pa ho pa nē aa hapêx kêt nhũm mēhõ ixpê mē utàr kêt nē. Te inhġhkra hpo nhġpõk ri mē hkrġ nhũm te mē hã inhġhkra pikamÿr pyrãk nhũm mēmoj tee ri ixpê tanhmã mē ho hprãm kaprÿ. **29-30**Inhġpêêxà tãm kot inhmã mē õr kênã. Hihtÿx o kot mē piitã mē hakrenh par jakamã koja mē inhġhkra po nhġpõk ri hkrġ nē mããnen Inhġpêêxà nhġhkra hpo nhġpõk ri hkrġ. Te ixpê Inhġpêêxà Tġrtũm pyrãk jakamã mēhõ kot wa ixpê wa inhġhkra rũm mē utã? Nã amrakati kumrêx.

Anhÿr o mē kãm amnhġ jarē. **31**Hãmri nhũm mē te kêp Tġrtũm pyrãk ã amnhġ jarēnh ã kuma nē kamã gryk tÿx nē. Hãmri nē kot kên o htak kaxyw ra kaxyw hkwy kawrà ho ri hprõt. **32**Hãmri nhũm amnhġ tã mē omu nē mē kãm:

—Kwa ra ixte Inhġpêêxà nhÿ hã mē amã aa mē ate mēmoj pumunh kêt kwÿ ho anhÿr rax o ixpa. Jao tanhmã mē ho mex to pix o ri ixpa. Tã ka mē axtem nē ã inhġpêx anhÿr kaxyw. Anē.

33Hãmri nhũm mē kãm:

—Nã ã ate amnhġ nhġpêx anhÿr ja mÿrapê hkêt. Kêt apê mē inhõ htã ri axtem nē te apê Tġrtũm pyrãk ã amnhġ jarēnhja mÿrapê na pa mē kên o atak kaxyw. Na pu htem ã amnhġ jarēnh anhÿr o papa hkêt nē. Anē

34Hãmri nhũm mē kãm:

—No ãm hãmri ixte ã amnhĩ jarẽnh anhỹr kẽnã. Tanhmã na Tĩrtũm kapẽr ã kagã htũm kot ja jarẽnh to wehe? Na pre Tĩrtũm Ijaew nhõ pahijê mã kapẽr nẽ mẽ kãm:

E mẽ ate inhỹ hã mẽ ho amnhĩptàr jakamã te mẽ apê pa ixpê
Tĩrtũm pyrãk.

Anhỹr o kot mẽ harẽnh. 35 ãm hãmri na Tĩrtũm kapẽrja. Tãm kot ã mẽ harẽnh kot anhỹr. Mẽ kot ÿ hã mẽ kãm kapẽr jakamã te mẽ kêp urãk ã mẽ harẽnh anhỹr kẽnã. 36 Tã tãm kot ã mẽ harẽnh anhỹr tã hpãnhã mẽ akaxyw pa ixpê Kra hã ixãm nẽ mẽ awỹr inhmẽnh nhũm ixwryk nẽ ixpê Kra hã amnhĩ jarẽnh tã ka mẽ ja hã inhma nẽ ãm inhma nẽ ixkõt ajamxpẽr kêt nẽ. Kwa mon ka mẽ ja hã ixpumunh nẽ ixkõt ajamxpẽr kêt nẽ? 37 Kot paj Inhĩpêêxã mẽ wa ixãhpumunh kõt mẽ amã aa mẽ ate mẽmoj pumunh kêt kwỹ ho anhỹr kêt ka mẽ ja hã ixpumu nẽ mẽ rĩ kam nẽ mãmri ixkõt ajamxpẽr kêt nẽ. 38 Mẽ amã ixkapẽr mar prãm kêt tã kwa ixte Tĩrtũm pyrã nẽ aa mẽ ate mẽmoj pumunh kêt kwỹ ho anhỹr ã ixpumu nẽ Inhĩpêêxã mẽ wa ixte amnhĩ nhĩpêx tipxi hkõt ajamxpẽr. Anẽ.

39 Hãmri nhũm mẽ kuma nhũm ja mẽ kêp omnuj tỳx nẽ. Te kot Tĩrtũm pyrãk ã amnhĩ jarẽnhja nhũm mẽ kêp omnuj nẽ. Jakamã nhũm mẽ ra kot unẽnh nẽ ixkre rũm ho kator nẽ kapõt ã mẽnh nẽ kẽn ho hta kaxyw nhũm kê axte mẽ kêp akunok nẽ ma nhỹhỹm nẽ.

Jejus kot Jotãw nhĩhkjê hã ri pa hã harẽnh

40 Tã nhũm Jejus ma tẽ nẽ pyhti pê Jotãw ã rê. Pa mẽ hkõt ri ixpa ho ixpa xwỹnhjaja ma hkõt mõ. Finat Juãw Paxis kot Tĩrtũm mã wam mẽ hkrã kumrãr o pa xãta wỹr. 41 Hãmri nhũm mẽ ohtõ nẽ mẽ ixwỹr mra nẽ Jejus kapẽr ma nẽ kot tanhmã amnhĩ nhĩpêx to hã omunh o kuhê. Hãmri nẽ hã tanhmã axpẽn mã kapẽr to nẽ axpẽn mã:

—Kwa ãm hãmri na pre finat Juãw Paxisja mẽ pamã Jejus jarẽnh o pa. Aa kot mẽ pamã mẽ pahte mẽmoj pumunh kêt kwỹ ho anhỹr kêt tã ãm xatã hkukamã mẽ pamã harẽnh o pa. Kêp Tĩrtũm Kra hã Juãw rom hihtỳx o hihtỳx ã harẽnh o pa. Nẽ Tĩrtũm kot mẽ pakaxyw ãm xwỹnh ã nhũm mẽ pamã harẽnh o pa. Nã ãm hãmri na pre ã mẽ pamã harẽnh anẽ. Anẽ.

42 Hãmri nhũm mẽ ohtõ nẽ amnhĩ kaxyw Jejus kõt hamxpẽr nẽ hkõt amnhĩ xunhwỹ.

Rajare htyk jarẽnh

Juãw 5.21-29, 6.40

11 1 Rõm nhũm krĩ pê Petãn kamã mẽhõ my pê Rajareja ra à htỳx nẽ nõ. Na pre htõx wa hamẽxkrut. Hõ kêp Matre nhũm hõ kêp Marir. 2 Marir na pre kormã arĩgro hõ hã kot Jejus o mex kaxyw mẽ

hkuxwaxà ho hkuxwa nê amnhĩ kĩ ho hpar põnh kaxyw. Nom kormã. Jakamã nhũm wa hkamyja wa kêp à htỳx nê nõ. 3Hãmri nhũm wa tee ri hkukamã hamaxpêr nê ma krĩ hõ hwỳr Jejus wỳr mễhõ mễ nhũm ma hwỳr tễ. Nê hwỳr pỏj nê omu nê kãm:

—Pa Pahihti. E ot pa awỳr tễ. Na ra amã akràmnhwỳ japê htỳx xwỳnhta à htỳx nê nõ nhũm htỏx wa tee ri hkukamã hamaxpêr nê awỳr inhmê pa tễ. Kwa tokyx pu ma hwỳr tễ ka akupỳm wa kãm ho mex nà? Anê.

4Hãmri nhũm kuma nê kãm:

—Nà à htỳx nê nõr tã koja akupỳm mex. Mễ kot akupỳm mex ã harênh mar hãmri nê Tỉrtũm mễ wa ixtã hpijaàm nê wa ixihtỳx o wa ixihtỳx ã wa ixpumunh kaxyw na ã à htỳx nê nõr anê. Nê pa ixpê Tỉrtũm Kra hã akupỳm ho mex ã ixpumunh nê ixkỏt hamaxpêr kaxyw na ã à htỳx nê nõr anê. Anê.

5Na pre Jejus kãm Rajare mễ htỏx wa mễ hapê nê. 6Tã à htỳx ã harênh ma nê hwỳr mỏr tokyx anhỳr kêt nê. Pa mễ arĩ amnhĩm hikranh xà kamã ri ixpaja o ixtã axte apkati axkrut. 7Hãmri nhũm rĩ kormã hwỳr nojarêt nê mễ inhmã:

—E ma pu mễ jarãhã akupỳm Jutej kamã Rajare hwỳr mỏ nê omu. Anê.

8Hãmri pa mễ tee ri ja hã kuma nê kãm:

—Kwa ham mễ panhõ pahijaja kot kên o atak o apĩr mã tã ka ra akupỳm mễ hwỳr akrà. Kwa pu mễ hwỳr pamỏr kêt nê nà? Anê.

9Hãmri nhũm mễ inhmã:

—Nà koja mễ kormã tanhmã ixto hkêt nê. Kormã ixte Tỉrtũm mã tanhmã amnhĩ nhĩpêx to jatur xàm mễnhre hã. Te ixte kormã arĩgro hã ixrĩt mex nê ixpa pyrà nê kormã Tỉrtũm kot mễmoj tã inhmã karỏ xà hkỏt pix mã tanhmã amnhĩ nhĩpêx to ho ri ixpa. 10Tã kot paj hatur xàm kumê nhũm te myt àr nhũm ra kamàt kỏ pyràk nhũm mễ rĩ kormã tanhmã ixto nê ixpĩ. Jakamã e ma pu mễ hwỳr. Koja mễ tokyx tanhmã ixto hkêt nê. Anê.

11Hãmri nê mễ inhmã Rajare jarênh o:

—Na mễ pahkràmnhwỳ Rajareta ra gỏr nê nõ. Tã kot puj mễ ma hwỳr mỏ pa kumra. Anê.

12-13Ra htyk ã omunh tã ã mễ inhmã harênh anê. Pa mễ kuma nê ixtỳx ho ãm ỏt nê nõr ã hkamnhĩx nê kãm:

—Kwa mãn ra akupỳm amnhĩ kãm hamak o mỏr jakamã na ra amnhĩ krit nê gỏr nê nõ. Kwa pu mễ awjanã nê hwỳr pamỏr kêt nê nà? Anê.

14Hãmri nhũm mễ inhma nê hprĩ hã mễ inhmã harê nê mễ inhmã:

—Nà na pre ty. 15Nom kormã à nê hikwỳta ã na pa hwỳr inhmỏr kêt nê. Tã kot paj ma hwỳr mỏ nê hã mễ amã ixàhpumunh tỳx ã amnhĩ to

amnhĩrit. Ka mẽ ja hã ixpumu nẽ amnhĩ kaxyw ixkõt ajamaxpẽr tỳx o ri apa. ã mẽ ate amnhĩ nhĩpêx anhỹr kaxyw na pa kormã à nẽ nõr ã hwỳr inhmõr kêt nẽ. E ma pu mẽ hwỳr. Anẽ.

16Hãmri nhũm mẽ inhĩõ pê Tomas pihpohti tee ri ã kapẽr anhỹrja ã kuma nẽ mẽ inhmã:

—Tõe ma pu mẽ hkõt. Kê mẽ mamrĩ hkõt mẽ pahto hpimràatã mẽ panhĩmex pa ri. Anẽ.

17Tã pa mẽ ma hkõt mẽ hwỳr mõ nẽ ra Rajare nhõ krĩ hwỳr ixpõx o mõ hãmri nẽ harẽnh ma. Ra htyk nhũm mẽ kot haxàr ã arĩgro pê kwat ã harẽnh ma. 18-19Nhũm Matre mẽ Marir wa hkamy ho hamak xàj arĩ mỳr o hkrĩ. Jakamã nhũm Ijaew kwỳjaja Jerujarẽ rũm ma wa hwỳr mra. Mẽ kot wa kãm kapẽr nhũm tokyx akupỹm tãm wa hkrã kaxyw nhũm mẽ wa hwỳr mra. Wa õ krĩ pê Petãnja Jerujarẽ hwỳr ãm 3 kirõm pix jakamã nhũm mẽ ma wa hwỳr mra nẽ wa kuri wa kãm kapẽr o hkrĩ. 20Rõm nhũm Matre Jejus hpõx o mõr ã harẽnh ma nẽ kànhmã xa nẽ man mẽ ixkutã tẽ. No nhũm Marir arĩ mỳr o nhỹ nẽ hkõt htẽm kêt nẽ. 21Hãmri nhũm Matre mẽ ixkutã tẽ nẽ mẽ ixkaxpa nẽ Jejus pumu nẽ mỳr kamã kãm kapẽr nẽ kãm:

—Hêxta gàu nẽ Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhỹx pre htyk kêt nẽ. Xê mon ka pre we tokyx mẽ ixwỳr atẽmre hkêt nẽ? 22Tã na pa arĩ akõt ijamaxpẽr tỳx nẽ. Kot kaj mẽmoj tã tanhmã Tĩrtũm wỳr to nhũm ama nẽ tanhmã amã mẽmoj to. Ra ixte ja hã apumunh mex kẽnã. Anẽ.

23Hãmri nhũm Jejus kuma nẽ kãm:

—Kwa tee ri ajamaxpẽr nẽ akaprĩ hkêt nẽ. Koja akamy akupỹm war amã htĩr kãm ga. Anẽ.

24Hãmri nhũm kuma nẽ kãm:

—Ma koja anẽ. Nhỹrmã Tĩrtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anẽ.

Kamy akupỹm htĩr ã harẽnh mar tã Jejus kot akupỹm ho htĩr tokyx anhỹr ã hkamnhĩx kêt nẽ ã kãm kapẽr anẽ.

25-26Jakamã nhũm kãm:

—Nà pa na ixpê akupỹm mẽ ho mẽ htĩr xwỳnh. Jakamã mẽ kot amnhĩ kaxyw ixkõt hamaxpẽr nẽ ixkõt amnhĩ xunhwỳr xwỳnhjaja koja mẽ htyk tã koja mẽ hkarõ Tĩrtũm mẽ wa ixri htĩr tũm nẽ mex nẽ pa ho pa. Xà ate ja kaxyw ixkõt ajamaxpẽr tỳx nà? Anẽ.

27Hãmri nhũm Matre kuma nẽ kãm:

—Xê nhũm. Apê Tĩrtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anẽ.

Hãmri nhũm Jejus kãm:

—Nà ãm hãmri na ka ã ijarẽnh anẽ. E ma akupỹm tẽ nẽ atõx mã anẽ kê tokyx man ixwỳr tẽ pa omu. Anẽ.

28Hãmri nhũm kuma nẽ ma akupỹm tẽ. Hãmri nẽ Marir wỳr axà nẽ kãm Jejus jarẽ. Kõt mẽ hkrĩ xwỳnhjê hkàx ã kãm harẽ nẽ kãm:

— An xê hãmri amỳr kêt nẽ. Na ra mẽ pajahkre xwỳnhhta hpôx o mỗ nẽ mũtar nhỹ nẽ atã karõ. Anẽ.

29Hãmri nhũm kuma nẽ kànhmã xa nẽ ma mẽ ixwỳr htẽm kurê kumrêx. 30Hãmri pa mẽ kormã krĩm ixpôx kêt nẽ. Arĩ Matreja Jejus wỳr htẽm xà kamã arĩ ixkrĩ. 31Jakamã nhũm Matre ma tẽ nẽ Marir mã Jejus jarẽ nhũm kato nẽ man mẽ ixwỳr tẽ. Hãmri nhũm Jerujarẽ rùm wa hwỳr mẽ mrrar xwỳnhjaja omu nẽ htỳx kot hkamy hã pika pumunh nẽ mỳr kaxyw htẽm ã hkamnhĩx nẽ man hkõt mra. 32Hãmri nhũm Marir mẽ hkukamã mẽ ixwỳr tẽ nẽ Jejus pumu nẽ hpar pê tẽm nẽ kãm kapêr pê hipô nẽ mỳr o nhỹ. Nẽ kãm:

— Hêxta gàu nẽ Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhỹx pre htyk kêt nẽ. Hô mon ka pre we tokyx man mẽ ixwỳr atẽmre hkêt nẽ? Anẽ.

33Hãmri nhũm Jejus kuma nẽ mỳr ã omu. Nẽ hkõt mẽ mrrar xwỳnhjaja mẽ mỳr ã mẽ omu nẽ kãm mẽ hkaprĩ nẽ. 34Hãmri nẽ mẽ kãm:

— Nhỹri na ka prem haxà? E mẽ hwỳr ixto tẽ pa omu. Anẽ.

Hãmri nhũm mẽ kuma nẽ ma hã pyka hwỳr mẽ ixto mỗ 35nhũm Jejus mẽ urak nẽ hwỳr mỳr o tẽ 36nhũm mẽ ja hã omu nẽ axpẽn mã:

— Kwa mãn kãm hapê htỳx. Hã na ho ama nẽ hwỳr mỳr o tẽ. Anẽ.

37Nom nhũm mẽ hkwyjaja axtem nẽ mẽ kãm:

— Tk. Ra kot no hkre xwỳnhhta o mex tã mo na we tokyx man kormã htĩr ri hwỳr htẽm nẽ omunh nẽ akupỹm ho mex kêt nẽ? Anẽ.

Jejus kot akupỹm Rajare ho htĩr ã harênh

38Tã pa mẽ ra kẽn kre kamã mẽ kot Rajare jaxàr xàta wỳr ixpôx o mỗ nhũm Jejus hkaprĩ nẽ hwỳr tẽ nẽ omu. Nhũm prem ra kẽn rax o hitom 39nhũm omu nẽ mẽ kãm:

— E mẽ akwỳjaja nhãm inhmã nê kahê xà mẽ. Anẽ.

Hãmri nhũm Matre kuma nẽ tee ri hamaxpêr nẽ kãm:

— Xê ma Jejus. Mẽ ri ã anhỹr kêt nẽ. Ra htyk ã arĩgro kêp 4 kênã. Mãn ra hkatõk nẽ hkro htỳx kumrêx. Anẽ.

40Hãmri nhũm kuma nẽ kãm:

— Kwa ri ã ajamaxpêr anhỹr kêt nẽ Matre. Na pa ra amã ixkapêr nẽ amã ixkapêr o: “Kot kaj amnhĩ kaxyw ixkõt ajamaxpêr tỳx nẽ. Hã kot kaj Tĩrtũm mẽ wa ixihtỳx o wa ixihtỳx xàja pumu.” Anhỹr o amã ixkapêr. Jakamã kwa ja kaxyw Tĩrtũm mẽ wa ixkõt mãn ajamaxpêr tỳx nẽ hkêt wehe. Anẽ.

Hãmri nhũm kuma nẽ kãm:

— Ma ãm hãmri na ka inhmã akapêr. Ma kot paj kaxyw war amã ijamaxpêr tỳx nẽ. Anẽ.

41Rôm nhũm mẽ kãm nhãm kën jakwa kre kahê xà mẽ. Hãmri nhũm Jejus Tirtũm mã amnhĩ jarênh kaxyw kànhmã kaxkwa hwỳr rít nê kãm:

—Pa Papaj. Nà na pa hte tanhmã mẽmoj tã awỳr to ka inhma nê tanhmã inhmã mẽmoj nhĩpêx to. Amex o amex Papaj. 42Na ka hte ã inhmã amnhĩ nhĩpêx anê. Tã pa jajê noo mã ã amã ixkapêr anê. Ate inhmar nê tanhmã Rajare hto nhũm mẽ kot ja hã ixpumunh nê ixte anhỹ hã pix mã tanhmã amnhĩ nhĩpêx to ho ri ixpa hã ixpumunh kaxyw. Nê ka ate mẽ hwỳr inhmênh ã apumunh kaxyw. Anê.

43Nhũm pre ã Tirtũm mã kapêr anê. Hãmri nê kỳx pê Rajare mã kapêr nê kãm:

—Pa Rajare. Kwa tokyx kànhmã nhỹ nê amnê mẽ ixwỳr tẽ nê akato. Anê.

44Puh nhũm akupỹm htĩr nê hkupu xà rãhã tẽ nê mẽ ixwỳr kato nê xa. Arĩ hkuk nê ihkra nê hpar kupu rãhã mẽ ixwỳr kato nê xa. Hãmri nhũm Jejus mẽ kãm:

—Kwa mẽ atõ nê kupu xà hpôt kê ma akupỹm òrkwỹ hwỳr tẽ. Anê.

45Hãmri nhũm mẽ kot Marir mẽ Matre wa hwỳr mrar xwỳnh kwỳjaja ã Jejus kot Rajare nhĩpêx anhỹr ã omu nê amnhĩ kaxyw hkôt hamaxpêr nê hkôt amnhĩ xunhwỳr kurê kumrêx. 46Nom nhũm mẽ hkwỳjaja axtem nê omu nhũm ja mẽ kêp omnuj nê. Jakamã nhũm mẽ ma Parijew nhõ xwỳnhjê hwỳr mra nê mẽ kãm harê.

Mẽ kot Jejus pĩr ã amnhĩ grõnh

Matêwre 26.1-5; Makre 14.1-2; Rukre 22.1-2

47Hãmri nhũm Parijew nhõ xwỳnhjaja tee ri Jejus kot akupỹm Rajare ho htĩr ã harênh ma hãmri nê patre krãhtũmjê mẽ amnhĩ wỳr mẽ inhõ juisti ho akuprõ nê axpên mã Jejus o kapêr punuj pê hã axpên mar o hkrĩ. Hãmri nhũm mẽhõ mẽ kãm:

—Kwa tanhmã kot puj mẽ ho? Na ra mẽ kãm mẽmoj pumunh kêt kwỳ ho anhỹr rax o pa. 48Kot puj mẽ ãm omu nê tanhmã ho hkêt nhũm mẽ pahkwỳjaja kot ã amnhĩ nhĩpêx anhỹr ã omu nê htỳx ãm hãmri ã kot



Juãw 11.1-44

amnhĩ nhĩpêx anhÿr ã hkamnhĩx. Hãmri nê amnhĩ kaxyw hkôt hamaxpêr nê hkôt amnhĩ xunhwÿ. Jao ra amnhĩ kaxyw kêp mē õ pahihtĩ hã ãm. Koja mē ã amnhĩ nhĩpêx anê nhũm Rôm kamã pahihtija mē kot kator nê hpãnhã Jejus xãm ã harênh ma. Hãmri nê gryk xaj mē pahwÿr õ pôristi hkwȳ rē nhũm mē pahwÿr mra nê mē panhĩmex pa nê Tĩrtũm nhõrkwȳ grãnh pa. Kwa tanhmã kot puj wem tokyx amnhĩ nê ho? Anê.

49Hãmri nhũm Kajpas mē kãm kapêr. Kajpasja na pre amgrãja kamã kêp mēõ patre nhõ pahi maati. Jakamã mē kãm:

— Nà na pa ra ijamaxpêr. Kwa mē inhma. 50Nà kot puj mē hpĩr tokyx anê kê tapxipix ty pu mē arĩ mÿrpê pahpiitã pajamakêtkati nê ri papa. Anê.

51Nhũm pre ã mē kãm kapêr anê. Nom amnhĩ krã hkôt ã mē kãm kapêr anhÿr kêt nê. Arĩ kêp mēõ patre krãhtũmjê nhõ pahi maati jakamã Tĩrtũm nhÿ hã Jejus kot Ijaew nê tykja kukamã ã harênh anê. Nom ja hã amnhĩ pumunh kêt nê. 52Na pre Jejus mē ixpê Ijaew pix nê htyk kêt nê. Krĩ piitã hkôt Tĩrtũm krajê nê na pre ty. Mē piitã mē kot axpên to hkwȳ nê ri axpên to pa kaxyw na pre mē nê ty. 53Hãmri nhũm ã Kajpas mē kãm kapêr anê nhũm mē inhõ pahijaja kuma nhũm ja mē kãm mex nê. Jakamã nhũm mē kot tanhmã Jejus ã ãmnênh to nhũm mē kot mē kãm tanhmã hpĩr to kaxyw ã axpên mar anhÿr o pa. 54Jakamã nhũm Jejus axte mē noo mã ri pa hkêt nê. Hãmri ma krĩ pê Epraĩ hwÿr ma mō. Pa mē hkôt ixpa ho ixpa xwÿnhjaja ma hkôt ixpa. Epraĩja kapôt ã krĩ na pre. Jakamã pa mē ma hwÿr mō hãmri nê kamã ri ixpa.

55Tã nhũm arĩgro pê Pasja ra ahtêp o mō. Amnepêm finat Mojes kot Ejit rúm mē panhĩgêjtê kator mã hamaxpêr kaxyw na pa pre htem hã ixkĩnh kaxyw Pas ã Jerujarê hwÿr akuprõ. Na pa pre htem hwÿr pøj nê kamã Tĩrtũm noo mã mē inhmex kaxyw tanhmã amnhĩ nhĩpêx to.

56-57Jakamã nhũm ra Ijaew ohtô nê ma Jerujarê hwÿr pa. Nê kãm Jejus pumunh prãm xaj Tĩrtũm mã amnhĩ jarênh xà hã ixkre wÿr mra nê hwÿr agjê nê kamã hapêr nê axpên mã:

— Kwa nok? Xà koja mē hpakĩnh wÿr mōr kêt nê nà? Anê.

Nhũm Parijew nhõ xwÿnhjê mē mē inhõ patre krãhtũmjaja haxwÿja hapêr o kuhê. Nom mē kot axtem nê unê nê haxàr kaxyw. Jakamã mē kãm hã karõ nê mē kãm:

— E kêr ka mē nhÿri Jejus pumu nê man mē ixwÿr mra nê mē inhmã harênh kurê kumrêx. Anê.

Marir kot Jejus kuxwa hã harênh

Matêwre 26.6-13; Makre 14.3-9; Rukre 7.36-50

12 1Tã nhũm ra Pas wÿr apkati grêre. Ra hwÿr apkati kêp 6. Jakamã pa mē ma akupÿm krĩ pê Petãn wÿr Jejus kôt mō. Jejus kot akupÿm Rajare ho htĩr xwÿnhnta mē õ krĩ hwÿr pa mē akupÿm mō

nê Rajare nhõrkwỹ hwỳr pøj nê mẽ hwỳr agjê. 2Hãmri nhũm mẽ Jejus pumu nê hkĩnh nê. Nê mẽ inhmã mẽmoj mex nhĩpêx pa mẽ ixàpkur o ixkrĩ. Nhũm Rajare haxwỳja mẽ ixkutã apkur o nhỹ. Nhũm htõx Matre mẽ inhmã mẽõ ho pa nê mẽsti hã unhwỳr o xa. 3Hãmri nhũm wa htõx Marir Jejus kukamã tanhmã hamaxpêr to nê hamaxpêr o:

—Ma kot paj tokyx mẽ kot mẽ ixpê hpĩr kukamã mẽ hkuxwaxà ho hkuxwa. Anê.

Hãmri nê kàx rax kãm mẽ hkuxwaxàja py nê o tẽ. Ra rit kahti hkõt hitep xà nhũm kupy nê hwỳr o tẽ. Mẽ kot mẽmo htwỳm o mẽ hkuxwaxà mex nhĩpêxja na pre hã kàxpore xohtô rax kumrêx. Jakamã nhũm kupy nê Jejus wỳr o tẽ nê hpar ã hkapĩr pa nê amnhĩ krã hkĩ ho hpar grà ho nhỹ nhũm ra ixkre kuxwa htỳx kumrêx. 4Hãmri nhũm mẽ inhĩõ pê Jut Kariotja. Kot kormã mẽ ìhkram Jejus nhõr mã xwỳnhta tee ri ã kot amnhĩ nhĩpêx anhỹr ã omu nhũm ja kêp omnuj nê 5nhũm mẽ inhmã:

—Tk. Kwa pêr mẽ hkuxwaxà hã kàxpore xohtô rax kumrêx tã nhũm ri axtem nê Jejus par ã hkapĩr pa. Mo na ma o htẽm nê ho wẽnê nê hpãnhã kàxpore ho rax nê hpyr nê ho mẽ kêp amrakati xwỳnhjê nhĩpêx kêt nê? Kot ho wẽnê ronhỹx hpãnhã kàxpore ho rax kumrêx nê kupy nê ho mẽmoj japrõr rax o rax. Tã axtem nê amarĩ Jejus par ã hkapĩr pa. Anê.

6Te kãm mẽ kêp amrakati xwỳnhjê japê pyræk tã kãm mẽ hapê hkêt. ãm hêx rom ã kapêr anê. Na pre hte mẽ inhmã mẽ ixkàxpore jamỳ nê mẽ ixkõt mẽ inhmã hamãr o pa. Nom tõhã axtem nê mẽ ixpê hkwỳ ho ahkĩ nê ho amnhĩm mẽmoj japrõ. Jakamã Marir kot mẽ hkuxwaxà ho hapêx par ã omu nê tee ri hpãnhã kàxpore rax mã hamaxpêr nê kamã gryk nê ã mẽ inhmã kapêr anê. 7Hãmri nhũm Jejus amnhĩ tã hamaxpêr ã omu nê kãm:

—Tk. Kwa tanhmã kãm akapêr to hkêt nê. Ixtyk nhũm mẽ kot ixkuxwa hkukamã na ã inhĩpêx anê. 8Na hte mẽ kêp amrakati xwỳnhjaja mẽ akõt pa rãhã nê. Ka mẽ amã mẽmo arĩgro hã tanhmã mẽ ho ajuta hto hprãm nê rĩ mẽ ho ajuta nê mẽ kãm mẽmoj gõ. No kêt pa kot paj ri mẽ akõt ixpa ka mẽ ixto mex ry ho apa hkêt nê. Kot paj tokyx mẽ apiitã mẽ are. Jakamã ãm hãmri na ã inhĩpêx anê. Anê.

Patre krãhtũmjaja kot Rajare hã àmnênh ã harênh

9Rôm nhũm Jerujarê nhõ xwỳnhjaja ra Jejus Petãn wỳr hpõx ã harênh ma nê kot omunh mã ma hwỳr mra. No ãm tapxipix pumunh mã hwỳr mrar kêt nê. Mãânên kot akupỹm ho htĩr xwỳnhta pumunh mã nhũm mẽ ma hwỳr mra. 10-11Na pre ra Ijaew ohtô nê Jejus kot akupỹm Rajare ho htĩr ã harênh ma hãmri nê mẽ inhõ patre kaga nê Jejus kõt amnhĩ xunhwỳ. Jakamã nhũm patre krãhtũmjaja tee ri ja hã mẽ omu nê axpên mã:

— Nà kot puj mẽ Jesus pix pĩr kêt nẽ. Kot puj mẽ mããnẽn hkõt Rajare pĩ hãmri nhũm wa hixi hamẽ mẽ kêp hapêx japêr. Anẽ.

Jesus kot Jerujarẽ hwỳr àr ã harênh

Matêwre 21.1-11; Makre 11.1-11; Rukre 19.28-40

12Tã nhũm apkati nhũm Ijaew Jerujarẽ kamã mẽ hkĩnhja kryx nẽ Jesus ra mẽ hwỳr àhtêp o mõi ã harênh ma. 13Hãmri nẽ axpẽn mã:

— Kwa ma pu mẽ mõi nẽ pô hkwỳ jakà nẽ kutã ho mra. Anẽ.

Hãmri nẽ hkwỳ jakà nẽ hamỳ nẽ ma kutã ho mra. Hãmri nẽ ra hkaxpa nẽ omu nẽ hkĩnh nẽ. Nẽ kãm:

Pa. Nã ãm hãmri na ka mẽ ixwỳr mõi. Tĩrtũm na pre mẽ ixwỳr amẽ ka ã amõi anẽ.

Tĩrtũmja mex o mex. ãm hãmri na pre mẽ ixwỳr amẽ.

Kot kaj mẽ inhõ pahi hpãnhã mẽ ixto amnhĩptar o ri apa. Anẽ.

14Hãmri nhũm Jesus nhỹri jumẽnre pumu nẽ hwỳr tẽ nẽ hã nhỹ nhũm mẽ pimràatã ma akupỹm Jerujarẽ hwỳr mõi. Tĩrtũm kapêr ã kagà htũm ra kot ja jarênh kot:

15 Pa Jerujarẽ nhõ xwỳnhjaja. Kwa mẽ tee ri amnhĩ kukamã ajamxpêr ho amã ma hkêt nẽ.

Ota mẽ anhõ pahi nyw ra mẽ awỳr jumẽnre hã nhỹ nẽ hpõx o tẽ. Anẽ.

16No Jesus kõt mẽ ixpa ho mẽ ixpa xwỳnhjaja pa mẽ ã kot amnhĩ nhĩpêx anhỹrja ã omu nẽ tee ri hkukamã ijamxpêr nẽ axpẽn mã:

— Kwa mo na ri ã amnhĩ nhĩpêx anẽ nẽ jumẽnre hã nhỹ nẽ mẽ hkõt mõi? Anẽ.



Juãw 12.12-15

Tã nhũm arĩgro hõ hã ty nẽ akupỹm kaxkwa hwỳr api pa prem hã omu hãmri nẽ kormã Tĩrtũm kapẽr ã kagà htũm kot hkukamã ã harẽnh kot anhỳrja mã ijamaxpẽr kurẽ kumrẽx. Hãmri nẽ axpẽn mã harẽnh o:

—Kwa ãm hãmri na Tĩrtũm kapẽr ã kagà htũm kot ra ã Kraja jumẽnre hã ỹr nẽ mẽ hkõt mõr ã hkukamã kot harẽnh anhỳrta. Anẽ.

17Hãmri nhũm Jejus kot Rajare mã kapẽr pẽ akupỹm ho htĩr ã omunh xwỳnhjaja arĩ nhãm mẽ hkwỳjẽ mã ujarẽnh o pa. 18Nhũm mẽ kuma nẽ ma Jejus wỳr omunh mã mra. 19Hãmri nhũm Parijew nhõ xwỳnhjaja tee ri ja hã mẽ omu nẽ axpẽn mã:

—Kwa na pu mẽ tee ri Jejus nẽ mẽ kãm pakapẽr kaprỳ nhũm mẽ pamar kêt nẽ ra piitã hkõt amnhĩ nhĩpẽx o pa. Kwa nà. Anẽ.

Ijaew kêt xwỳnhjẽ jarẽnh

20Tã nhũm ra Gres kwỳjaja Ijaew kõt hkĩnh kaxyw ma Jerujarẽ hwỳr mẽ hkõt mra nẽ mẽ ãhkõ hã Tĩrtũm mã mex o mex ã harẽnh o hkõt mra.

21Jakamã nhũm mẽ nhỹri mẽ inhõ pẽ Firipti pumu nẽ hwỳr mra. Firipti kęp pyka pẽ Garirej kamã krĩ pẽ Pesẽj nhõ xwỳnh nhũm Gres nhõ xwỳnhjaja omu nẽ hwỳr mra nẽ kãm:

—Pa. Kwa na pa mẽ inhmã Jejus pumunh prãm nẽ. Tanhmã kot pa wem amnhĩ to nẽ omu nẽ kãm ixkapẽr? Anẽ.

22Hãmri nhũm mẽ kuma nẽ ma Andre hwỳr mẽ o mra nẽ kãm mẽ harẽ. Hãmri nẽ wa ma Jejus wỳr mẽ o mra nẽ kãm mẽ harẽ nẽ kãm:

—Pa Pahihti. Ota Gres nhõ xwỳnhjaja kãm apumunh prãm nẽ awỳr mõ. Mẽ pahkĩnhã mẽ kęp Ijaew kêt tã mẽ kãm apumunh prãm nẽ. Anẽ.

Jejus kot amnhĩ kukamã amnhĩ jarẽnh

Matêwre 16.24-28; mããnẽn Apokarip 2.10, 12.11

23Hãmri nhũm Jejus mẽ omu nẽ mẽ kãm tanhmã amnhĩ jarẽnh to. Kot mẽ ohtõ nẽ mẽ nẽ htyk nhũm mẽ kukwak ri Tĩrtũm wa kuri htĩr tũm nẽ pa ho pa hã mẽ kãm amnhĩ jarẽ nẽ mẽ kãm:

—Nà na ra ixtyk ã arĩgro hwỳr apkati grẽre. Ixpẽ Tĩrtũm kot mẽ akaxyw ixãm xwỳnh jakamã kot paj mẽ apiitã mẽ anẽ ty hãmri nẽ akupỹm ixĩr nẽ ma kaxkwa hwỳr akupỹm api. 24Mẽ axohtõ nẽ nhỹrmã Tĩrtũm mẽ wa ixri atĩr tũm nẽ apa ho apa kaxyw kot paj ã amnhĩ nhĩpẽx anẽ. Kwa mẽ ã ixte amnhĩ jarẽnh anhỳrja ma nẽ mẽ amnhĩ krãm haxàr tỳx nẽ ri hã apa. Te ixte mẽmo hy kot amnhĩ nhĩpẽx pyræk. Na htem pikap hagjẽ nhũm te htyk pyrã nẽ pika kaxwỳnh kãm hikwỹ. Tã gaa nẽ higrõt nẽ hprêk nẽ ô. Nẽ ô rax kumrẽx. Hyja pyxire nẽ hikwỹ htã kamã ô rax kumrẽx. Nom koja mẽ hkre hkêt nẽ nhũm ô hkêt nẽ. Na hte ã mẽmo hyja amnhĩ nhĩpẽx anẽ. Ja pyrã nẽ kot paj mẽ anẽ ixtyk kêt nẽ te mẽ kot mẽmo hy hkre hkêt nhũm hprêk nẽ ô hkêeta pyræk ka mẽ ixkukwak ri

Tĩrtũm mẽ wa ixri atĩr tũm nẽ apa hkêt nẽ. Jakamã kot paj mẽ anê ty nhũm mẽ ijaxà. Hãmri pa akupỹm ixtĩr ka mẽ axohtô nẽ ixkukwak ri wa ixri atĩr tũm nẽ apa ho apa.

25—Nẽ koja mẽ ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỹnhjaja. Koja mẽ ixtã mẽ apar mã tã kwa kêr ka mẽ atyk pymaj ixkaga hkêt nẽ. Kwãr mẽ mãmrĩ tanhmã ixtã mẽ ato ka mẽ nhỹrmã Tĩrtũm mẽ wa ixri axte amnhĩ xà kamã ajamak kêt kumrêx nẽ atĩr tũm nẽ amex nẽ apa ho apa. No kot kaj mẽ ixkĩnhã jar amã amex pix prãm hãmri nẽ nhỹrmã wa ixri atĩr tũm nẽ apa hkêt nẽ. 26Kot kaj mẽ ã ixkôt amnhĩ nhĩpêx anhỹr o ri apa hãmri nhũm mẽ kot inhĩpêx pyræk o mẽ anhĩpêx. Hãmri ka mẽ nhỹrmã ma ixkôt kaxkwa hwỹr api nẽ kamã ixri atĩr tũm nẽ apa ho apa. Hãmri nhũm Inhĩpêêxà ixtã mẽ apumu nẽ mẽ ato mex kumrêx. Anẽ.

Tĩrtũm kot Jejus mã kapêr ã harênh

Matêwre 3.17, 17.5

27Tã nhũm Jejus tee ri amnhĩ kukamã htyk mã hamaxpêr nẽ hkaprĩ htỹx nẽ. Nẽ hkôt mẽ ixpa ho mẽ ixpa xwỹnhjê mã amnhĩ jarê nẽ mẽ inhmã:

—Hêxta waa nẽ. Na pa tee ri amnhĩ kukamã ijamaxpêr. Nẽ tee ri amnhĩ xà htỹx kamã ijamak kukamã ijamaxpêr pê ra amnhĩ kamã ixkahak nẽ. Nom ixte pika piitã hkôt mẽ kot ixkôt amnhĩ xunhwỹr xwỹnhjê nẽ ixyk kaxyw ixwryk kênã. Jakamã kot paj Inhĩpêêxà kot mẽ kêp ixpytâr kaxyw tanhmã amnhĩ to hwỹr to hkêt nẽ. Anẽ.

28Hãmri nẽ hpãnhã Hipêêxà mã kapêr nẽ kãm:

—Pa Papaj. ãm mẽmoj pixi na inhmã hprãm. Kê mẽ piitã ixkukwak ri amex o amex ã apumu. Ja na kêt inhmã hprãm tỹx kumrêx.

Anhỹr o Tĩrtũm mã amnhĩ jarê. Hãmri nhũm kuma nẽ kaxkwa rũm kãm kapêr. Kỹxpê kãm kapêr nẽ kãm:

—Nà na pa pre ra ã mẽ kãm amnhĩ to amnhĩrĩt anê nhũm mẽ ja hã ixpumu. Tã kot paj axte akukwak ri amnhĩ to amnhĩrĩt nhũm mẽ piitã axte inhmex o inhmex ã ixpumu. Anẽ.

29Nhũm pre ã Tĩrtũm Jejus mã kapêr anê. Hãmri nhũm mẽ kot mẽ ixkuri mar o kuhê xwỹnhjaja kuma no ãm hprĩ hã kot kãm tanhmã kapêr toja mar mex kêt nẽ. Nẽ htỹx ho ãm mẽmoj tã hkamnhĩx. Jakamã nhũm mẽ hkwyjaja axpên mã:

—Kwa mo na wehe? Na mãn katõtøk nà? Anẽ.

Nhũm mẽ hkwyjaja mẽ kãm:

—Nà na katõtøk kêt. Tĩrtũm kapêr o wryk xwỹnh mãn tanhmã kãm kapêr to. Anẽ.

30Hãmri nhũm Jejus mẽ kãm:

—Nà Tirtũm tãm na inhmã kapêr. Nom pa ixte mar kaxyw inhmã kapêr kêt nê. Mê kajaja mê ate ixtã mar kaxyw na kÿx pê ã inhmã kapêr anê. Anê.

Hãmri nê mê kãm:

31—E hãmri. Kot paj tokyx mẽ apiitã mẽ ate amnhĩ tomnuj pãnhã amnhĩrer kaxyw tanhmã amnhĩ nhĩpêx to. Jao mãânên Satanasti pê hihtÿx xà ho ijapêx. 32Koja mẽ pĩ kahpa hã inhô pa kÿxpê ajêt. Tirtũm kot mẽ awÿr inhmênh tã nhũm mẽ ã inhĩpêx anê pa ty. Jakamã koja pika piitã hkôt mẽ ohtô nê ixkôt amnhĩ xunhwÿ nê amnhĩ kaxyw inhmã hamaxpêr rãhã ho pa. Anê.

33Mê ixte tanhmã htyk to hã harênh mar kaxyw nhũm pre ã mẽ inhmã amnhĩ jarênh anê. 34Hãmri nhũm mẽ kot mẽ ixkuri mar o kuhê xwÿnhjaja tee ri kot htyk ã amnhĩ jarênhja ma nê kãm:

—Kwa mẽ ixte amnhĩ wÿr kamã ijamak o ixpa xwÿnhja htĩr tũm nê pa ho pa xwÿnh na. Tirtũm kapêr ã kagà htũm kot ã harênh kot anhÿr tã ka ã ri mẽ kot apĩr nhũm atyk ã amnhĩ jarênh anê. Ate Tirtũm kot mẽ ixwÿr amênh xwÿnh ã amnhĩ jarênh tã ã ri atyk ã amnhĩ jarênh anê. Kwa xà apê mẽ ixte amnhĩ wÿr kamã ijamak o ixpa xwÿnh kêt? Anê.

35Hãmri nhũm mẽ kuma nê amnhĩ tã mẽ kãm:

—Tÿ ixpê tãm kênã. Tã kot paj tokyx mẽ are. Jakamã kêr ka mẽ ixte arĩ mẽ akamã ixpa ri ixkôt amnhĩ xunhwÿ nê amnhĩ kaxyw ixkôt ajamaxpêr o ri apa. Te ixpê kanê hpôk pyrãk jakamã na pa hte mẽ kãm Tirtũm kapêr o mẽ ahkre o ri ixpa. Nom kot paj kritpêm mẽ akôt ixpa ry hkêt nê. Jakamã kwa kêr ka mẽ tokyx te mẽ kot kanê hpôk nhĩrã kamã ri mẽ pa xwÿnh kot amnhĩ nhĩpêx pyrã nê Tirtũm kôt amnhĩ nhĩpêx o ri apa. Kormã mẽ akôt ixpa ri. Kot paj tokyx ma mỗ nhũm te ra kamàt kô pyrãk. Na hte kamàt kô kamã mẽ pa xwÿnhjaja tee ri rĩt mex mã nom rĩt mex kêt nê. Nê mẽmoj pumunh mex kêt nê. 36Jakamã kwa mẽ tokyx ixte arĩ mẽ akamã ixpa ri amnhĩ kaxyw inhmã ajamaxpêr nê ixkôt amnhĩ xunhwÿ. Te ixpê kanê hpôk nhũm kamã mẽ arĩt mex pyrãk. Jao ixpyrà nê te mẽ apê kanê hpôk nhĩrã mex pyrãk o amnhĩ nhĩpêx. Nê ixpyrà nê tãm ri amnhĩ nhĩpêx o apa. Anê.

Nhũm pre ã mẽ kãm kapêr anê hãmri pa mẽ kêp ixkato nê ma nhãm mỗ.

Mê hkwÿjaja kot Jejus kôt hamaxpêr kêt ã mẽ harênh

37Na pre hte Jejus mẽ noo mã mẽ kot aa mẽmoj pumunh kêt kwÿ ho anhÿr rax o pa. Tã nom nhũm mẽ ohtô nê hã omu nê ãm hã omu nê kêp Tirtũm kot mẽ pahwÿr mênh xwÿnh ã hkôt hamaxpêr kêt nê. 38Nom ra mẽ hkukamã Tirtũm nhÿ hã kapêr jarênh o pa xwÿnh pê finat Ijaisja mẽ hkukamã ja hã mẽ harê nê hã kagà. Nê hã kagàja o:

Pa Pahi Maati. Nà ra ixte mẽ kãm ajarēnh o ixpa ryy htã no nhũm mẽ inhma nê ãm inhma.

Nê mẽ kot axihtỳx o axihtỳx ã ajarēnh mar tã no ãm ajarēnh ma nê amnhĩ kaxyw akôt hamaxpěr kêt nê. Anê.

39Mẽ kãm Tĩrtũm kapěr mar prãm kêt jakamã na prem mããnēn Jejus kệp Tĩrtũm kot mẽ pahwỳr mēnh xwỳnh hkôt hamaxpěr kêt nê. Nhũm pre finat Ijaisja axte mẽ hkukamã ja hã mẽ harē nê mẽ hã kagà. Nê hã kagà ho:

40 Na pre Tĩrtũmja tanhmã amnhĩ nê mẽ hkrã hto nhũm mẽ hkôt hamaxpěr kêt nê.

Ra mẽ kot hihtỳx o hihtỳx ã omunh tã omu nê ãm omu.

Nê mẽ kot kapěr mar tã amnhĩ tomnuj kaga hkêt nê.

Nê Tĩrtũm kot mẽ nê mẽ kot amnhĩ tomnuj o hapêx prãm xàj hkôt amnhĩ xunhwỳr kêt nê. Anê.

41Kormã Jejus mẽ hwỳr wrỳk kêt ri nhũm finat Ijaisja hpimtir kãm kot amnhĩ to rax kumrēx ã omu nê hkukamã ã harēnh nê hã kagà anê.

42Hãmri nhũm Ijaew krãhtũm kwỳjaja hkwỳjê rom amnhĩ kaxyw Jejus kôt hamaxpěr nê hkôt amnhĩ xunhwỳ. Tã Parijew nhõ xwỳnhjaja kot ã mẽ kot amnhĩ nhĩpêx anhỳr ã mẽ harēnh mar pymaj ja hã amnhĩ to amnhĩrĩt kêt nê. Mẽ kot Tĩrtũm kapěr o mẽ ahkre xà hã ixkreja nê mẽ kator pymaj nhũm mẽ kãm amnhĩ to amnhĩrĩt kêt nê. 43Na prem hamaxpěr o:

— Nà kot paj ja hã amnhĩ to amnhĩrĩt nhũm mẽ amnhĩ nê ixtomnuj nê. Hãmri nê amnhĩ pyrã nê axpēn mã inhmex ã ijarēnh kêt nê.

Anhỳr o mẽ umaj amnhĩ kukamã hamaxpěr o pa. Nom Tĩrtũm tãm kot amnhĩm mẽ mex ã mẽ harēnhja nhũm mẽ hkukamã hamaxpěr kêt nê.

Jejus kot Hipêêxà nhỹ hã kapěr ã harēnh

44Nhũm Jejus axte mẽ kãm kapěr nê kỳx pê kapěr nê mẽ kãm:

— Nà koja mẽhõ amnhĩ kaxyw ixkôt hamaxpěr hãmri nê ixkôt pix mã hamaxpěr kêt nê. Mããnēn amnhĩ kaxyw kot mẽ awỳr inhmēnh xwỳnhja kôt hamaxpěr. 45Wa ixte amnhĩ nhĩpêxja te tipxi pyrãk jakamã koja mẽ tanhmã ixte amnhĩ nhĩpêx to hã ixpumu nê te kot Tĩrtũm kot amnhĩ nhĩpêx ã omunh pyrãk.

46— Nê te ixpê kanê hpôk nhũm inhĩrã kamã mẽ apa pyrãk kaxyw na pre Inhĩpêêxà mẽ awỳr inhmē pa mẽ awỳr wrỳ. Ixte kapěr o mẽ ajahkre ho ri mẽ akôt ixpa kaxyw. Jakamã koja mẽhõ amnhĩ kaxyw ixkôt hamaxpěr nê ixkôt amnhĩ xãm hãmri nê te kanê hpôk nhĩrã kamã rĩt mex o pa pyrãk o amnhĩ nhĩpêx. Jao amnhĩ nhĩpêx nyw o amnhĩ nhĩpêx o pa. 47-48No mẽ kot ixkapěr mar nê ãm mar xwỳnhjaja te mããnēn Inhĩpêêxà kapěr mar nê ãm mar pyrãk. Mỳrapê koja mẽ nhỹrmã

ma kuwy hwÿr pa nê mẽ kot amnhĩ tomnuj mÿrapê kamã pa ho pa. Tã no ã mẽ ate amnhĩ nhĩpêx anhÿr o ri mẽ apa kaxyw na pa pre mẽ awÿr ixwryk kêt nê. Ixte mẽ ate amnhĩ tomnuj pãnhã amnhĩrer par kaxyw na pa pre mẽ awÿr wrÿ.

49—Nê na pa hte amnhĩ krã hkôt tanhmã ri mẽ amã ixkapêr to ho ri ixpa hkêt nê. ãm kot mẽ awÿr inhmênh xwÿnhja nhÿ hã na pa hte tanhmã mẽ amã ixkapêr to ho ri mẽ akôt ixpa. 50Tã mẽ kot Tĩrtũm kapêr mar nê amnhĩ kaxyw hkôt hamaxpêr xwÿnhjaja koja mẽ nhÿrmã wa ixri htĩr tũm nê mex nê pa ho pa. Jakamã na pa hte tanhmã kot inhmã karõ hto xà hkôt pix mã tanhmã mẽ amã ixkapêr to ho ri ixpa. Anê.

Jejus kot hkwyjê hpar kuhõnh ã harênh

Rukre 22.24-27

13 1Tã nhũm ra Pas ã mẽ ixkĩnhta ahtêp. Pas ã na hte mẽ ixpê Ijaewjaja axpên wÿr akuprõ nê hã ôwêhti hkra nyw pa nê ho anê nê hkur o ixkrĩ. Amnepê m Tĩrtũm kot pika pê Ejit rũm mẽ inhĩgêxjê kator kaxyw nhũm mẽ nojarêr nê ã hkwy hpar nê ho anhÿr nê hkwy hkurta pyrãk. Na prem nojarêr nê mẽ hkra my kot wa mẽ kêp htyk pumaj ôwêhti hkra nyw kwÿ hpa nê ho anê nê ĩ hku. Jakamã nhũm arĩ mẽ ixpê mẽ hkanrêhã mẽ htãmnhwÿjaja ã mẽ kot amnhĩ nhĩpêx anhÿrja mã ijamaxpêr nê hã ixkĩnh kaxyw mẽ urãk nê hkwy hpa nê kuku. Jakamã nhũm ra Pas ahtêp nhũm Jejus amnhĩ kukamã tanhmã hamaxpêr to kurê kumrêx. Ra ma akupÿm Hipêêxà hwÿr àpir xà hã arĩgro hwÿr apkati grêre. Jakamã nhũm akupÿm nojarêr ã amnhĩ pumu nê kãm mẽ pahte hkôt amnhĩ xunhwÿr xwÿnhjê japê jakamã kãm mẽ pajapê rãhã mẽ panê htyk mã. 2Tã nhũm myt axà pa mẽ Pas ã ixàpkur o ixkrĩ. Nhũm Simãw Kariot kra Jut Kariotja mããnen mẽ ixkutã apkur o nhÿ. Kêp mẽ ixkwÿ htã nhũm pre Satanasti tanhmã hkrã hto nhũm ra axtem nê kot mẽ kãm Jejus kurê xwÿnhjê nhĩhkram haxàr kaxyw.

3-4Tã pa mẽ kormã axpên kutã ixàpkur kaxyw ixkrĩ hpa nhũm Jejus kãnhmã xa nê hinõkà kapa nê toajti py nê ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pê tanhmã ri mẽ inhnoo mã amnhĩ nhĩpêx to ho pa hkêt. Kêp mẽ inhõ pahi htã te kêp mẽ inhmã àpênh xwÿnh pyrãk o amnhĩ nhĩpêx o pa. 5Jakamã toajti py nê ho amnhĩ krax pre nê pasiiti hõ py nê kamã gô hkwy ru nê ho mẽ ixpar kuhõ nê toajti o mẽ ixpar grã ho mõ. 6Ã mẽ inhĩpêx anhÿr o mõ. Pê ra hpãnhã Simãw Pêtre hpar kuhõnh kaxyw nhũm tee ri amnhĩ tã omu nê kãm:

—Tk. Kwa apê inhmã axàpênh xwÿnh kêt kênã kot ka kêt ri axtem nê ixpar kuhõ Pahihti. Apê mẽ inhõ Pahi kênã kot ka kêt ã mẽ inhĩpêx anê. Anê.

7Hãmri nhũm kãm:

—Kwa nà. Kormã ate ja hã amnhĩ tã ixpumunh mex kêt. Nom kot kaj nhỹrmã aprĩ hã amnhĩ tã ixpumu. Anẽ.

8Hãmri nhũm kãm:

— Nà nom kot kaj ãm ixpar kuhõnh kêt nẽ. Kwarĩ. Anẽ.

Hãmri nhũm Jejus kãm:

— Tôe. Kot paj apar kuhõnh kêt nẽ ka te apê ixkwý hkêt pyræk. Anẽ.

9Hãmri nhũm tee ri kuma nẽ kãm:

— Tôe mamrĩ ixpar kuhõ. Nom ixpar pix kuhõnh kêt nẽ. Mãänën inhĩkra kuhõ nẽ ixkuk kuhõ. Inhmã ixte apyræk prãm tỳx kumrëx kênã. Anẽ.

10Hãmri nhũm Jejus kãm:

— Nà amỹkry hkõt mẽ wỳr xwỳnhjaja na htem mex nẽ axte wỳr kêt rãhã hikwỳ. Na htem ãm amnhĩ par pix kuhõ nẽ hikwỳ. Ja pyrã nẽ Tĩrtũm kot mẽ anê mẽ ate amnhĩ tomnuj ho hapêx par xwỳnhjaja te amỹkry hwỳr mẽ axwỳr nẽ amex pyræk. Ka mẽ te mẽ kot amnhĩ par pix kuhõnhhta pyrã nẽ axte tanhmã amnhĩ tomnuj to hãmri nẽ Tĩrtũm mã amnhĩ jarënh kurê kumrëx kê anê amnhĩ katut kõt ate amnhĩ tomnujta mẽ nẽ ho hapêx. Na pre ra mẽ anê mẽ ate amnhĩ tomnuj o hapêx. No ãm mẽ apiitã hkêt. Ota arĩ mẽ anhĩõja pyxire nẽ arĩ amnhĩ tomnuj rãhã ri pa. Jakamã te wỳr kêt nẽ arĩ grã htyk rax kãm ri pa pyræk. Anẽ.

11Nhũm pre ã Jejus mẽ inhmã kapêr anẽ. Ra kot hprĩ hã mẽ kot kãm hkurê xwỳnhjê mã õr mã xwỳnhja pumunh jakamã te wỳr kêt nẽ arĩ grã htyk rax kãm ri pa pyræk ã ã harënh anẽ.

12Tã mẽ ixpar kuhõnh pa nẽ akupỹm hinõkà py nẽ haxà nẽ nhỹ hãmri nẽ mẽ inhmã:

— E mẽmo kaxyw na pa we ã mẽ apar kuhõnh anẽ? Kot paj ixprĩ hã mẽ amã amnhĩ jarê ka mẽ inhma. 13-14Na ka htem ixto “mẽ ijahkre xwỳnh” nẽ ixto “pahihti” anhỹr o ijarënh o ri apa. ãm hãmri na ka htem ã axpën mã ijarënh anẽ. Ixpê mẽ ajahkre xwỳnh nẽ mãänën ixpê mẽ anhõ pahihti htã inhmã mẽ ate tanhmã axpën nhĩpêx to ho apa hprãm xaj na pa ã mẽ apar kuhõnh anẽ. Tã kêr ka mẽ ixpyrà nẽ tanhmã axpën to mex to ho ri apa. 15Jao amnhĩ kuxwar axpën to mex pê mẽmoj to axpën kutã anojarêt rãhã ho ri apa. 16Kwa mẽ ixkapêr ma nẽ kãm amnhĩ krãm haxàr tỳx rãhã ho ri apa. Mẽ ate amnhĩ to rax o ijakrenh kêt. Te ixpê mẽ anhõ patrãw nhũm mẽ ate inhmã tanhmã amnhĩ nhĩpêx to ho apa xwỳnh pyræk. Nẽ te ixte mẽmoj tã mẽ amã karõ nhũm mẽ ate inhmar nẽ inhmã tanhmã mẽmoj nhĩpêx to pyræk. Tã te ixpê mẽ anhõ patrãw pyræk tã pa ã mẽ apar kuhõnh anẽ. Ka mẽ amnhĩ tã ixpumu hãmri nẽ amnhĩ xwar tanhmã axpën to ajuta hto ho ri apa. No ri axpën pumu nẽ ajamaxpêr o: “Tk. Nà ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhỹr o ajamaxpêr o ri apa hkêt nẽ.

17—E na pa ã mẽ amã ixujarênh anê. Kot kaj mẽ inhma nê ixujarênh kôt ã axpên nhîpêx anhÿr o ri apa. Hã kot kaj mẽ akînh nê ri apa. Anê.

Jejus kot amnhî tâ hã àmnênh xwÿnh o amnhîrit ã harênh

Matêwre 26.20-25; Makre 14.17-21; Rukre 22.21-23

18Nhũm Jejus arî mẽ inhmã kapêr nê mẽ inhmã:

—Kot kaj mẽ apiitã mẽ akînh nê apa hkêt nê. Ixte mẽ arênh xwÿnhjaja mẽ apiitã mẽ apumunh mex. Jakamã na pa Tirtũm kot mẽ apiitã mẽ ate amnhî tomnuj o hapêx par kêt ã mẽ anhîõja jarê. Tirtũm kapêr ã kagà htũm kot harênh kot:

Ixkutã apkur o ÿr xwÿnhjê hõ koja axtem nê mẽ kot kãm ixkurê xwÿnhjê nhîhkram ijaxà. Kêp ixkôt pa ho pa xwÿnh tâ koja axtem nê ã inhîpêx anê.

Anhÿr o kot harênh. Tã koja tokyx ã inhîpêx anê. 19Nom kormã kot ã inhîpêx anhÿr kêt ri na pa hkukamã mẽ amã harê. Jakamã koja ã inhîpêx anê ka mẽ ja hã ixpumu nê ra ixte amnhî kukamã mẽ amã amnhî jarênhhta mã ajamaxpêr nê ixpê Tirtũm rũm mẽ awÿr ixwrÿk xwÿnh kôt ajamaxpêr tÿx kurê kumrêx.

20—Kwa mẽ ixkapêr ma nê amnhî krã kamã kãm ajamaxpêr tÿx o ri apa. Koja mêhõ ixte mẽ hwÿr mẽ arênh xwÿnhjê hã tanhmã mẽ ato mex to. Hãmri nê te pa kot tanhmã ixto mex to pyrãk. Nê koja mêhõ tanhmã pa ixto mex to nê mãânên te kot mẽ awÿr inhmênh xwÿnhhta tanhmã ho mex to pyrãk. Anê.

21Nhũm pre ã Jejus mẽ inhmã kapêr anê. Hãmri nê tee ri amnhî kukamã hamaxpêr nê hkaprî nê mẽ inhmã:

—Hêxta waa nê. Nà kot kaj mẽ atõ mẽ kot kãm ixkurê xwÿnhjê nhîhkram ijaxà. Kwa mẽ amnhî krã kamã ixkapêrja mã ajamaxpêr tÿx nê. Anê.

22Hãmri pa mẽ amnhî tâ kuma nê tee ri axpên pumunh o ixkrî. 23Ixpê Juãw na pa pre ixpê Jejus kràmnhwÿ mex ã ìhkô hã ixàpkur o inhÿr 24nhũm Simãw Pêtreja ixpumu nê inhmã nomgôr nê kawax pê inhmã:

—Kwa mẽ pahtõ nhîxi hã hkukja nà? Anê.

25Hãmri pa kuma nê Jejus mã kãm:

—Kwa Pahihti. Mê ixtõ koja we ã anhîpêx anê? Anê.

26Hãmri nhũm mẽ inhmã:

—Nà kot paj pãwti hõ py nê guhkrax kãm ho mry kagô nhek nê kot mẽ ìhkram ijaxàr mã xwÿnhhta mã kugô ka mẽ hkôt omu. Anê.

Hãmri nê kupy nê ho mry kagô nhek nê Simãw Kariot kra Jut Kariotja mã kugô nhũm kupy. 27Pyrja kôt nhũm Satanasti tanhmã hkrã hto. Hãmri nhũm Jejus te kot kãm amnhî to nojarêt pyrãk o amnhî tâ kãm kapêr nê kãm:

—E kwa tokyx nã. Anẽ.

28-30Hãmri nhũm kuma nẽ kato nẽ ma kamàt kô kamã htẽm kurê kumrẽx. Hãmri pa mẽ ixàpkur o ixkrĩ xwỳnhjaja Jejus kot ã kãm kapẽr anhỹrja ã kuma nẽ tee ri hkukamã ijamaxpẽr. Hãmri nẽ kot ma mẽ hkĩnh ã mẽõ hkwỹ japrôr kaxyw ma htẽm ã hkamnhĩx. Nhũm mẽ ixkwỳjaja axtem Jejus kot mẽ kêp amrakati xwỳnhjê mã mẽmoj nhõr ã kãm karõ nhũm ma mẽ hwỳr htẽm ã hkamnhĩx. Kêp mẽ inhmã mẽ ixkàxpore jamãr o pa xwỳnh jakamã pa mẽ ã ixtỳx mẽmoj tã hkamnhĩx anẽ.

Jejus akupỹm nojarêt nẽ mẽ kãm mẽmoj tã karõ hã harẽnh

Matêwre 22.39-40; mãânẽn Wam Juãw 3.11-24

31-32Hãmri nhũm Jejus mẽ inhmã:

—Nã kot kaj mẽ tokyx mẽmoj pumu nẽ Tĩrtũm mã mex o mex ã harẽ nẽ ijaxwỳja inhmã inhmex o inhmex ã ijarẽ. Kot kaj mẽ tokyx mẽmojta pumu kãm ga.

33—Te mẽ apê ixkra pyrãk tã kot paj arĩ ri mẽ akôt ixpa grire hãmri nẽ ma akupỹm api. Kot kaj mẽ tee ri jar ijapêr o ri apa nom nhỹri ixpumunh kêt nẽ. Nẽ kormã tokyx ma ixkôt apa hkêt nẽ.

34—E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã axpẽn kĩnh o ri apa. Te pa inhmã mẽ ajapê pyrãk o axpẽn nhĩpêx rãhã ho ri apa. **35**Kot kaj mẽ ã amnhĩ nhĩpêx anẽ nhũm mẽ akwỳjaja ja hã mẽ apumu nẽ mẽ apê ixkwỳ hã mẽ apumunh kurê kumrẽx. Anẽ.

Simãw Pêtre kot Jejus ã amnhĩ to hêx kukamã harẽnh

Matêwre 26.31-35; Makre 14.27-31; Rukre 22.31-34

36Nhũm Jejus ã kot mẽ ixrer nẽ ma nhỹhỹm mõr ã amnhĩ jarẽnh anẽ hãmri nhũm Simãw Pêtre tee ri kot amnhĩ jarẽnh ma nẽ kãm:

—Kwa Pahihti. Nhỹhỹm kot kaj kêt mõ pa mẽ akôt ixpa hkêt nẽ? Anẽ.

Hãmri nhũm kãm:

—Nã ma inhmõr xàta wỳr kot kaj mẽ kormã ma ixkôt apa hkêt nẽ. Nom kot kaj mẽ nhỹrmã ma ixkôt apa. Anẽ.

37Hãmri nhũm Simãw Pêtre kãm:

—Kwa mo kot pa mẽ omu nẽ tokyx ma akôt inhmrar kêt nẽ? Inhmã akôt ixyk puma hkêt kênã. Kwãr mẽ mãmrĩ atã ixpĩ. Inhmã ajapê htỳx kumrẽx kênã. Anẽ.

38Hãmri nhũm Jejus kãm:

—Xà ãm hãmri na ka ã inhmã amnhĩ jarẽnh anẽ Simãw Pêtre? Xà amã ixkôt atyk puma hkêt? Kwa o kora. Kojã apkati hkôt krãhyre hkàr kêt ri ka ra mẽ umaj ate ixkôt apa hkêt ã amnhĩ tã axãprãr o axkrunẽpxi kãm ga. Kwa amnhĩ krã kamã ixkapêrja mã ajamaxpêr tỳx nẽ. Anẽ.

Jejus kot Tirtũm nhõ krĩ jarẽnh

Eprêw 11.16

14 ¹Nhũm Jejus arĩ mẽ inhmã kapêr nẽ mẽ inhmã: —Kwa ã ixte mẽ amã amnhĩ jarẽnh anhỹrja ma nẽ tee ri amnhĩ kukamã ajamaxpêr nẽ akaprĩ hkêt nẽ. Arĩ amnhĩ kaxyw Tirtũm mẽ wa inhmã ajamaxpêr tỳx rãhã ho ri apa. ²Inhĩpêêxà nhõ krĩ kamã ixkre xohtôô. ãm hãmri na pa ã mẽ amã harẽnh anẽ. Tã kot paj ma akupỹm hwỳr api nẽ mẽ akutêp mã amã mẽ anhõrkwỹ ho mex. ³Hãmri nẽ ho mex pa nẽ rĩ man akupỹn mẽ awỳr wrỳ. Hãmri nẽ ma akupỹm amnhĩ kôt mẽ ato ixàpir pa ka mẽ Tirtũm mẽ wa ixkôt apa rãhã apa ho apa. Jakamã kwa mẽ ri akaprĩ nẽ apa hkêt nẽ. Anẽ.

Jejus te kêp Tirtũm wỳr pry pyræk

Epes 2.18

⁴—Nẽ ma nhỹhỹm inhmõr xàta ra mẽ ate harẽnh mar mex. Nẽ hwỳr pryja mããnẽn mẽ ate harẽnh mar mex. Anẽ.

⁵Hãmri nhũm Tomas tee ri kuma nẽ kãm:

—Kwa mẽ ixte nhỹhỹm amõr xàta pumunhre hã kot pa kêt mẽ hwỳr pryja pumu. Anẽ.

⁶Hãmri nhũm kãm:

—Kwa paa. Te ixpê Inhĩpêêxà hwỳr pry pyræk. Na htem amnhĩ kaxyw inhmã hamaxpêr nẽ ixkôt amnhĩ xunhwỳ hãmri nẽ nhỹrmã ixkukwak ri pix mã ma Inhĩpêêxà mẽ wa inhõ krĩ hwỳr api. Ixkukwak ri pix mã na htem hprĩ hã Tirtũm kapêr ma. Nẽ ixkukwak ri pix mã na htem wa ixri htĩr tũm nẽ pa ho pa. ⁷Kot kaj mẽ aprĩ hã ixpumũ nẽ mããnẽn te aprĩ hã Inhĩpêêxà pumunh pyræk. Tã ra mẽ ate tanhmã ixte amnhĩ nhĩpêx to hã ixpumunh mex jakamã mããnẽn te ra mẽ ate Inhĩpêêxà kot amnhĩ nhĩpêx ã omunh mex pyræk. Anẽ.

Jejus mẽ Tirtũm wa kot amnhĩ nhĩpêx tipxi hã wa harẽnh

Juãw 1.1, 10.30; Piripos 2.6; Korosẽ 2.9

⁸Nhũm Jejus ã mẽ inhmã kapêr anẽ nhũm Firipti kuma nẽ kãm:

—Kwa nom mẽ inhmã inhno ho Anhĩpêêxà pumunh prãm. Kot pa mẽ omũ nẽ ixkĩnh tỳx kumrêx. Anẽ.

⁹Hãmri nhũm Jejus kãm:

—Kwa na pa pre ra mẽ akôt ri ixpa ryy nẽ. Ka mẽ aprĩ hã ixpumunh mex nẽ. Kêt ra mẽ kot ixpumunh mex xwỳnhjaja te mẽ kot mããnẽn Inhĩpêêxàja no ho omunh mex pyræk. ¹⁰Wa ixte amnhĩ nhĩpêxja ãm tipxi. Xà ate kormã amnhĩ krã hi mã ixkapêr jaxàr tỳx kêt? Inhĩpêêxà mẽ wa ixte amnhĩ nhĩpêxja ãm tipxi. Nẽ kot axpên pyræk. Jakamã na pa hte amnhĩ krã hkôt ri tanhmã amnhĩ nhĩpêx to ho ri ixpa hkêt nẽ. ãm

Inhĩpêêxà nhỹ hã na pa hte ri tanhmã mẽ amã ixkapêr to ho ri ixpa. Nê hihtỳx xà ho tanhmã amnhĩ nhĩpêx to ho ri ixpa. Ka mẽ ja hã ixpumu nê te ano ho Inhĩpêêxà pumunh pyràk. 11Kwa mẽ ixkapêr ma nê hkôt ajamaxpêr tỳx nê. Inhĩpêêxà mẽ wa ixte amnhĩ nhĩpêxja ãm tipxi. Nê kot axpên pyràk. Rỳ ka mẽ tee ri ja kukamã ajamaxpêr japêr hãmri nê ixte aa mẽ ate mẽoj pumunh kêt kwỳ ho anhỳr ã mãn ixpumu nê ja hã wa ixte amnhĩ nhĩpêx tipxi kôt ajamaxpêr.

12—Kwa mẽ ixkapêr ma nê amnhĩ krã kamã amnhĩ krãm haxàr tỳx nê. Mẽ ate amnhĩ kaxyw ixkôt ajamaxpêr xwỳnhjaja kot kaj mẽ ixte tanhmã amnhĩ nhĩpêx to ho ixpa hã ixpumu nê ixkôt ã amnhĩ nhĩpêx anhỳr o ri apa. Kot paj akupỳm Inhĩpêêxà hwỳr api nê kuri ixpa ho ixpa. Ka mẽ ixwakre kamã ixihtỳx xà ho tanhmã mẽ akwỳjê mã amnhĩ nhĩpêx to ho ri apa.

13—Nê kot kaj mẽ apê ixkwỳ hã tanhmã mẽoj tã ixwỳr to pa mẽ ama nê mẽ amã tanhmã mẽoj nhĩpêx to. Mẽ kot omunh nê Inhĩpêêxà mex o mex ã omunh kurê kumrêx kaxyw. 14Nà kot kaj mẽ apê ixkwỳ hã mẽoj tã ixwỳ pa mẽ ama nê mẽ amã tanhmã mẽoj to. Anê.

Jejus kot mẽ pahwỳr Tĩrtũm mẽ wa Karõ rênh ã kot amnhĩ jarênh

Juãw 7.37-39, 16.7-17; Atre 2.1-4;

mãänên Rõmãn 5.5; Wam Korĩt 12.7-11; Epes 3.16; Wam Juãw 2.27

15Nhũm Jejus arĩ mẽ inhmã kapêr nê mẽ inhmã:

—Nà kot kaj mẽ amã ixkĩnh hã kot kaj mẽ ixkapêr kôt pix mã ri amnhĩ nhĩpêx rãhã ho ri apa.

16—Kot paj akupỳm kaxkwa hwỳr api hãmri nê mẽ ato Inhĩpêêxà wỳ nhũm inhma nê mẽ awỳr kot mẽ ato ajuta xwỳnh maatita rê nhũm man mẽ awỳr wrỳ nê mẽ akaxwỳnh mã agjê. Hãmri nê mẽ akôt tanhmã mẽ ato ajuta hto ho pa rãhã ho pa. 17Wa Ixkarõ koja mẽ awỳr kurê nhũm mẽ amã agjê. Hãmri nê hprĩ hã mẽ amã Tĩrtũm kapêr o amnhĩrĩt o mẽ akôt pa ka mẽ aprĩ hã mar mex nê. No mẽ kêp Tĩrtũm kra hkêt xwỳnhjaja koja hprĩ hã wa Ixkarõ jarênh mar kêt nê. Mẽ kot wa ixkôt amnhĩ xunhwỳr kêt jakamã koja mẽ hkarõ mã gjêx kêt nê. ãm mẽ ate ixkôt amnhĩ nhĩpêx o apa xwỳnhjê pix wỳr koja wrỳ nê mẽ awỳr agjê nê mẽ akamã pa ho pa.

18—Nê ixte mẽ arer nê ma inhmõr mã tã kot kaj mẽ te mẽ hã awrãre pyrã nê ahte atỳx ri apa pyrãk kêt nê. Kot paj te pa akupỳn mẽ awỳr ixwrỳk pyrã nê mẽ awỳr wa Ixkarõ rê nhũm mẽ akãm agjê nê mẽ akamã pa ho pa.

19—Nê koja tokyx mẽ kot amnhĩ kaxyw Tĩrtũm mã hamaxpêr kêt xwỳnhjaja axte ixpumunh kêt nê. No mẽ papajaja kot puj mẽ tokyx axte nhỹri axpên pumu.

—Nê kot paj akupÿm ixtîr hãmri nê ixtîr tûm nê ixpa ho ixpa ka mē ixkukwak ri ajaxwÿja nhÿrmã Tîrtûm mē wa ixri atîr tûm nê apa ho apa.

20—Tã koja wa Ixkarõ mē awÿr wrÿ nê mē akarõ mã agjê ka mē aprî hã Tîrtûm mē wa ixte amnhî nhîpêx ã wa ixpumunh mex kurê kumrêx. Te wa ixte amnhî nhîpêx tipxi pyrãk o ka mē hã wa ixpumu. Nê mãânên mē papajaja te ra mē pahtipxi nê ri mē papa pyrãk ka mē hã amnhî pumunh mex kurê kumrêx.

21—Nê mē kãm ixkînh xwÿnhjaja na htem ixkapêr ma nê hkôt amnhî nhîpêx o pa. Jakamã nhûm Tîrtûm ixtã mē omu nê kãm mē hapê htÿx nê. Pa mãânên amnhî tã mē omu nê inhmã mē hapê htÿx nê. Jakamã kot paj mē kãm amnhî to amnhîrît nhûm te mē kot no ho ixpumunh pyrãk. Anê.

Nhûm pre ã Jejus hkôt mē ixpa ho mē ixpa xwÿnhjê mã amnhî jarênh anê. 22Hãmri nhûm Jutre hôja. Jut Kariot kêt axtem Jutre hôja Jejus axte kot mē inhmã pix mã kot amnhî to amnhîrît ã harênhja ma nê kãm:

—Kwa aprî hã mē inhmã mēmoj jarê mē ijahkre xwÿnh. Mon ka mē kêp akwÿ hkêt xwÿnhjê mã axte amnhî to amnhîrît kêt ã amnhî jarê? Nê ãm mē papxipix mã amnhî to amnhîrît ã amnhî jarê? Anê.

23Hãmri nhûm kãm:

—Nã mē amã ixkînh xwÿnhjaja na ka htem ixkapêr ma nê hkôt amnhî nhîpêx. Nhûm Inhîpêêxà ja hã mē apumu nê ixtã kãm mē ajapê htÿx nê. Hãmri pa wa mē akôt ixpa ho ixpa. Jao mē amã amnhî to amnhîrît mex o ixpa. 24Na pa hte amnhî krã hkôt ri mē kãm ixkapêr o ixpa hkêt nê. ãm Inhîpêêxà nhÿ hã na pa hte mē kãm ixkapêr o ri ixpa. Kot mē awÿr inhmênh xwÿnhhta nhÿ hã. Tã nhûm mē kãm inhmar prãm kêt jakamã na pa hte wa mē kãm mē apyrã nê amnhî to amnhîrît o ixpa hkêt nê.

25—E na pa kormã ixte mē akôt ri ixpa ri ã mē amã amnhî jarênh anê. 26Tã koja Inhîpêêxà ixpãnhã mē awÿr wa Ixkarõ rê. Ixte hã mē amã ixàhwÿr xà hkôt. Hãmri nhûm man mē awÿr wrÿ nê mē akaxwÿnh mã agjê nê mē akôt ri tanhmã mē ato ajuta hto ho pa. Nê ra ixte ã mē amã ixkapêr anhÿrja koja hprî hã mē amã ho amnhîrît mex nê. Ka mē amnhî krã kamã kãm ajamaxpêr nê hã ano htÿx nê ho apa. Anê.

Jejus kêp mē pajamakêtkati nhôr xwÿnh

Rômãn 5.1; Karatas 5.22; Piripos 4.7; Korosê 3.15

27Nhûm Jejus arî mē inhmã kapêr nê mē inhmã:

—Nê mē kêp ixkwÿ hkêt xwÿnhjaja na htem tee ri amnhî kukamã hamaxpêr o ri pa. Jao hkaprî nê pa. No pa na pa hte mē kurom ijamakêtkati nê ixkînh nê ri ixpa ho ixpa. Tã kot paj tanhmã mē ato ka mē ixpyrã nê ajamakêtkati nê axãmnhîx akînh nê ri apa. Jakamã kwa

mẽ ixte amnhĩ jarẽnh ma nẽ tee ri amnhĩ kukamã ajamaxpẽr o amã ma ho ri apa hkêt nẽ.

28—Na pa pre ra mẽ amã ma ixàpir nẽ nhỹrmã man akupỹn mẽ awỳr ixwryk ã mẽ amã amnhĩ jarẽ. Tã na pa ra ma akupỹm Inhĩpêêxà hwỳr ixàpir mã. Kot amnhĩ to rax o kot ijakrenh. Kot paj akupỹm hwỳr api nẽ kuri inhmex nẽ ixpa ho ixpa. Tã ka mẽ amã ixkĩnh hã kot kaj mẽ ma akupỹm hwỳr ixàpir ã ijarẽnh ma nẽ inhỹ hã akĩnh nẽ.

29—Kormã ma akupỹm ixàpir kêt ri na pa ã mẽ amã amnhĩ kukamã amnhĩ jarẽnh anẽ. Kêr pa mẽmo arĩgro hã ma akupỹm api ka mẽ ja hã ixpumu nẽ ajamaxpẽr o: “Nà ãm hãmri na pre mẽ inhmã amnhĩ kukamã akupỹm Hipêêxà hwỳr àpir ã amnhĩ jarẽ.” Anhỹr o ajamaxpẽr. Jao ixkôt ajamaxpẽr tỳx rãhã ho ri apa.

30—Kot paj tokyx axte tanhmã mẽ amã ixkapẽr to hkêt nẽ. Mẽ kêp ixkwỳ hkêt xwỳnhjê nhõ pahшти Satanastija na ra kot tanhmã ixto kaxyw. Nom koja tee ri tanhmã kãm ixto hprãm kaprỳ. Kurom ixihtỳx o ixihtỳx o ixte hakrenh par jakamã koja tanhmã ixto hkêt nẽ. 31Kwãr kãm tanhmã ixto hprãm xà hkôt tanhmã ixto pa omu. Inhmã Inhĩpêêxà hkôt ixte amnhĩ nhĩpêx prãm jakamã kot paj jahti mã arĩ xa nhũm te tanhmã kot ixto pyrãk o inhĩpêx nom tanhmã ixto hkêt nẽ. Mẽ ate inhmã Inhĩpêêxà japê htỳx ã ixpumunh kaxyw kot paj ã mẽ anoo mã amnhĩ nhĩpêx anẽ. Nẽ mẽ ate ixte kãm tanhmã amnhĩ nhĩpêx to ho ri ixpa rãhã mẽ kot ixpĩr ã ixpumunh kaxyw. E hãmri. Ma pu mẽ mỗ nẽ amnhĩ to Tĩrtũm wỳ. Anẽ.

Nhũm pre ã Jejus hkôt mẽ ixpa ho mẽ ixpa xwỳnhjê mã kapẽr anẽ. Pa mẽ kuma nẽ kãnhmã ixkuhê nẽ inhnojarêt nhũm axte mẽ inhmã awjarẽ.

Jejus te kêp mẽmo krô pyrãk

Karatas 2.20; Wam Juãw 2.28

15 1Nhũm Jejus arĩ mẽ inhmã kapẽr nẽ mẽ inhmã: —Nà te ixpê mẽmo pĩ pê “uwa” anhỹr xwỳnhhta kakhô maati pyrãk. Nẽ Inhĩpêêxàja te kot uwa hkre nẽ hamãr o pa xwỳnhhta pyrãk. 2Nẽ mẽ kot ixkôt amnhĩ xunhwỳr xwỳnhjaja te mẽ kot uwa kakhô rũm krô pyrãk. Na hte mẽ hkwỳjaja htỳx ri kêp ixkwỳ hã amnhĩ jarẽnh ã amnhĩ to hêx. Jao te kot krôja rã htã ô hkêt pyrãk. Koja rã htã ô hkêt nẽ nhũm kot hamãr xwỳnhja tee ri omu nẽ kakhô nẽ krãhta nẽ kumẽ. No koja ô mex nẽ nhũm omu nẽ hkĩnh nẽ. Hãmri nẽ rã nẽ ô rax kaxyw tanhmã ho mex to. Tã na hte Tĩrtũm uwa krô jamãr xwỳnhhta pyrã nẽ ã mẽ ate ixkôt amnhĩ xunhwỳr xwỳnhjê nhĩpêx anẽ. 3No mẽ kajaja na ka prem mẽ kot ixkwỳ hã amnhĩ to hêx xwỳnhjê rom ixkapẽr mar tỳx nẽ. Nẽ amnhĩ kaxyw inhmã ajamaxpẽr nẽ ixkôt amnhĩ nhĩpêx mex o apa. Jao te mẽ ate krô rã nẽ ô rũnh pyrãk o amnhĩ nhĩpêx.



Juãw 15.1-10

4—Na hte krôja amnhĩ krã hkôt ô hkêt nê. Âm kakhô pix kukwak ri na hte rã nê ô. Ja pyrã nê kot kaj mẽ ixkukwak ri pix mã inhmã hprãm xà hkôt ri tanhmã amnhĩ nhĩpêx to ho apa. Jakamã kwa kêr ka mẽ ixkapêr pix mãn mar o apa pa mẽ akôt ixpa ho ixpa. 5Te ixpê kakhô nhũm te mẽ apê krô pyrãk jakamã kot kaj mẽ inhmã hprãm xà hkôt tanhmã amnhĩ nhĩpêx to ho ri apa nê te krô rã nê ô rũnh pyrãk o amnhĩ nhĩpêx. No kot kaj mẽ amnhĩ krã hkôt ri amnhĩ nhĩpêx o ri apa nê te krô grã nê ô hkêt pyrãk o amnhĩ nhĩpêx.

6Na hte uwa krô nhô dônja nhỹri hã krô grã pumu hãmri nê kakhô nê hakà nê ma o mra nê kuwy kamã kurê nê ho hxêt pa. Ja pyrã nê mẽ kot htỳx ri ixkôt amnhĩ xunhwỳr ã amnhĩ jarênh xwỳnhjaja koja mẽ nhỹrmã amnhĩ xà htỳx kamã hamak rãhã ho pa.

7—Tã no mẽ kajaja. Kêr ka mẽ ixkapêr kôt pix mã amnhĩ nhĩpêx rãhã ho ri apa. Te mẽ pahtipxi nê ri papa pyrãk o amnhĩ nhĩpêx. Hãmri nê mãmri amã hprãm xà hkôt mẽmoj tã Tĩrtũm wỳ nhũm ama nê amã mẽmoj tã ate hwỳr xàta kôt kugô. 8Kot kaj mẽ Inhĩpêêxà mẽ wa ixkapêr kôt amnhĩ nhĩpêx o ri apa nhũm mẽ piitã ja hã mẽ apumu nê hamaxpêr o: “Hêxta waa nê. Jajaja na htem Tĩrtũm kot amnhĩ nhĩpêx o amnhĩ nhĩpêx o pa. Mãn Tĩrtũmja mex o mex.” Anhỹr o hamaxpêr.

9—Nê na pa hte Inhĩpêêxà kãm ijapê pyrãk o inhmã mẽ ajapê nê. Tã kêr ka mẽ amarĩ inhmã mẽ ajapê hã ri ixkôt amnhĩ nhĩpêx mex o apa. 10Na pa hte âm Inhĩpêêxà kapêr kôt pix mã ri amnhĩ nhĩpêx o ri ixpa. Jakamã na pa hte kãm ijapê hã ixkĩnh nê ri ixpa. Tã kêr ka mẽ ixpyrà nê ixkapêr kôt pix mã tanhmã amnhĩ nhĩpêx to ho ri apa. Nê ixpyrà nê inhmã mẽ ajapê hã amnhĩ pumu nê akĩnh nê ri apa.

11—E na pa ã mẽ amã ixkapêr anê. Mẽ ate inhmar nê ixpyrà nê axãmnhĩx ajamakêtkati nê akĩnh nê ri apa kaxyw. Tã kêr ka mẽ ã amnhĩ nhĩpêx anê nê te pa ixte ã amnhĩ nhĩpêx anhỹr pyrãk. Anê.

Jejus kot mẽ pamã axpên kĩnh tỳx ã mẽ pamã karô

12Nhũm Jejus arĩ mẽ inhmã kapêr nê mẽ inhmã:

—E kêr ka mẽ te inhmã mẽ ajapê pyrãk o mẽ amã axpên japê ho mẽ

amã axpën kính o ri apa. Jao axpën to mex o ri axpën kôt apa. **13**Koja mēhō kām hkràmnhwỳ japê htỳx nē nhũm ra mēhō mēmo mỳrapê kot kēp hpĩr mã nhũm tee ri hã omu nē nē kām amnhĩ mē nhũm kupĩ. Hãmri nhũm mē ja hã omu nē kām hkràmnhwỳ japê htỳx ã nē htyk ã axpën mã harē.

14-15—E kot paj axte mē apê inhmã mē axàpēnh xwỳnh ã mē ajarēnh kêt nē. Na hte mē ò patrãwjaja hprĩ hã kām mē apēnh xwỳnhjê mã amnhĩ jarēnh kêt nē. Na htem ãm mē apēnh pix ã mē kurē. Nom mē kajaja mē ate ixkapēr mar nē hkôt pix mã amnhĩ nhĩpêx jakamã kot paj hpãnhã mē apê ixkràmnhwỳ hã mē ajarē. Na htem axpën to hkràmnhwỳ nē ma nhỹhỹm pa kaxyw nē tanhmã amnhĩ kukamã hkràmnhwỳ mã amnhĩ jarēnh to. Tã mē apê ixkràmnhwỳ jakamã na pa hte ã amnhĩ kukamã mē amã amnhĩ jarēnh anē. Nom ja pix jarēnh kêt nē. Na pa hte mãänēn Inhĩpêêxà xô ri mē amã mēmoj piitã ho amnhĩrit o mē akôt ixpa.

16—Nē mē kajaja na ka prem ixpê mē akràmnhwỳ kaxyw ixãm kêt nē. Pa na pa pre amnhĩ kaxyw inhmã mē aprãm. Ixkapēr kôt pix mã ri mē ate tanhmã amnhĩ nhĩpêx to ho apa kaxyw. Te uwa krô ò rũnh nē aa grã hkêeta pyrãk. Jakamã kot kaj mē mēmoj tã Inhĩpêêxà wỳ nhũm mē ama nē mē ate mēmoj tã hwỳr xà hkôt amã kugô.

17—E. Kwa kêr ka mē amã axpën kính nē tanhmã axpën to ajuta hto ho axpën mã mēmoj kutã anojarêt pix o mãn kêt ri apa. Nà ja na kêt inhmã hprãm. Anē.

Mē kot Jejus kwỳjê kamã gryk xwỳnhjê jarēnh

Matêwre 10.22; mãänēn Juãw 7.7, 17.14; Wam Juãw 3.13

18—Nē koja ixkwỳ hkêt xwỳnhjaja kām mē aprãm nōkati. Tã kêr ka mē amnhĩ tã mē omu nē tee ri amnhĩ kukamã ajamaxpēr kêt nē. Ixkumrêx na prem kām ixprãm nōkati. Tã koja mē mã ixtã mē ato anē nē kām mē aprãm kêt nē. **19**Mē apê mē hkwỳ ronhỹx mē amnhĩ tã mē apumu nē kām mē ajapê nē. Nom apê mē hkwỳ hkêt. Ra ixte amnhĩ kaxyw mē arēnh jakamã na htem tee ixtã mē apumu nē kām mē akĩnh kêt o kām mē akurê nē. **20**Koja mē ixtã hpijaàm kêt nē nē mãänēn mē atã hpijaàm kêt nē. Nē mē anhĩpêx o te mē kot pa ixpê mē anhō patrãw nhĩpêx pyrãk. Ka mē ixpyrà nē amnhĩ xà htỳx kām ajamak o ri apa. Na pa pre ra mē amã ja jarē. Nom koja mē akwỳjaja jajê rom te ra mē kot ixkapēr mar nē hkôt amnhĩ nhĩpêxta pyrã nē mãänēn mē akapēr ma nē hkôt amnhĩ nhĩpêx o pa. Kwa kêr ka mē ixkapērja mã mãn ajamaxpēr tỳx rãhã ho ri apa.

21—Koja mē ixtã tanhmã mē anhĩpêx to. Mē kot Tĩrtũm kapēr kôt amnhĩ nhĩpêx kêt jakamã koja mē ã ixtã mē anhĩpêx anē. Tĩrtũm kot mē awỳr inhmēnh kôt hamaxpēr kêt nē ã mē anhĩpêx anē. **22**Ixwỳrỹk nē mē

kãm Tirtũm kapẽr jarẽnh o ri ixpa htã nhũm mẽ inhma nẽ ãm inhma nẽ ixkõt amnhĩ nhĩpêx kêt nẽ. Jakamã koja mẽ kot amnhĩ tomnuj xwỳnh ã amnhĩ to hpimxur kêt nẽ.

23—Nẽ koja mẽhõ kêp ixprãm nõkati nẽ mããnẽn te kêp Inhĩpêxà prãm nõkati pyræk. 24Na pa pre mẽ piitã mẽ hkõt aa mẽ kot mẽmoj pumunh kêt kwỳ ho anhỹr o ri mẽ hkõt ixpa nhũm mẽ hã ixpumu. ãm papxipix na pa pre ã amnhĩ nhĩpêx anhỹr o ri mẽ hkõt ixpa nhũm mẽ hã ixpumu. Kêp ãm mẽ kot ja hã ixpumunh kêt ronhỹx prem axpẽn mã ijarẽnh o: “Tk. Mẽ pahte mẽhõja nhỹhỹnh mẽ pahwỳr hpõx ã omunhre hã kot puj kêt mẽ ri hã pahpijaàm o ri papa.” Anhỹr o nhỹx prem axpẽn mã ijarẽ. Tã ra mẽ kot ja hã ixpumunh mex tã axtem nẽ Inhĩpêxà mẽ wa mẽ kãm wa ixkurê nẽ. Jao mẽ kot amnhĩ tomnuj xwỳnh ã amnhĩ to hpimxur kêt nẽ. 25No Tirtũm kapẽr ã kagà htũm kot mẽ hkukamã mẽ harẽnh nẽ mẽ hã kagà nẽ kot mẽ hã kagà kot:

Mẽmo tanhmã kute mỳrapê na htem kãm ixkurê? Nã ãm amarĩ na htem kãm ixkurê ho pa. Anẽ.

Tã ã ixtã kagà kot anhỹr xà hkõt na htem ã kãm ixkurê anẽ. Jakamã koja mẽ mããnẽn ixtã kãm mẽ akurê nẽ. Nom kêr ka mẽ arĩ mẽ kãm ixkapẽr jarẽnh o ri mẽ hkõt apa nẽ tee ri amnhĩ kukamã ajamaxpẽr kêt nẽ.

26—Nẽ tokyx ma akupỹm Inhĩpêxà hwỳr ixàpir mã tã kot paj hwỳr pøj nẽ aa mẽ ato ijamakêtkati hkêt nẽ. Kot paj amnhĩ pãnhã mẽ awỳr wa Ixkarõ rẽ. Mẽ kot kãm: “Mẽ kutã nojarêt xwỳnh maati” anhỹr xwỳnhhta kot paj mẽ awỳr kurẽ nhũm ixpãnhã mẽ awỳr wrỳ nẽ mẽ amã agjê nẽ hprĩ hã mẽ amã Tirtũm mẽ wa ixto amnhĩrit o ri mẽ akõt pa. 27Kot kaj mẽ ama hãmri nẽ ma mẽ piitã mẽ hkõt ri mẽ kãm ixkapẽr jarẽnh o ri apa. Na pa pre ra mẽ kãm Tirtũm kapẽr jarẽnh ryy ho mẽ hkõt ri ixpa ka mẽ ixkõt ri inhmar o apa ry nẽ. Jakamã kêr ka mẽ ixwakre kamã arĩ mẽ kãm ixkapẽr jarẽnh o ri mẽ hkõt ri apa. Anẽ.

16 ¹Nhũm Jejus arĩ mẽ inhmã kapẽr nẽ mẽ inhmã: —Nẽ mẽ kot nhỹrmã ixtã tanhmã mẽ anhĩpêx to nhũm mẽ ate tee ri amnhĩ kukamã ajamaxpẽr nẽ mẽ umaj ixkaga pymaj na pa hte ã mẽ amã ixprĩ hã mẽmoj jarẽnh ry anẽ. ²Kot kaj mẽ kãm ixkapẽr jarẽnh o ri apa nhũm mẽ hkwỳjaja tee ri mẽ ama nhũm ja mẽ kêp omnuj nẽ. Nhũm mẽ Tirtũm kapẽr o mẽ ahkre xà hã ixkreja rũm amnhĩ nẽ mẽ ajano nẽ mẽ akwỳjê hpar o pa. Hãmri nẽ hamaxpẽr o: “E pu mẽ axte mẽ hkwỳjê pynê nẽ mẽ kupa. Tirtũm kãm ja mex kênã.” Anhỹr o htỳx hamaxpẽr o pa. ³Mẽ kot hprĩ hã Inhĩpêxà mẽ wa ixkapẽr mar mex kêt nẽ ã htỳx wa inhmã ja mex ã wa ijarẽnh anẽ. ⁴Nom mẽ ate ixkõt amnhĩ xunhwỳrta krax kãm na pa pre ã mẽ amã mẽ harẽnh anhỹr kêt nẽ. Arĩ mẽ akõt ixpa kênã. Kot ka mẽ ixkõt apa rãhã amã mẽ uma hkêt nẽ. Tã pa ra akupỹm inhnojarêt nẽ ã mẽ amã mẽ harẽnh anẽ. Jakamã koja mẽ nhỹrmã ã mẽ anhĩpêx anẽ ka mẽ amnhĩ tã mẽ omu nẽ ra ixte mẽ

akukamã ã mẽ harēnh anhỹrja mã ajamaxpēr kurê kumrēx nē tee ri amnhĩ kukamã ajamaxpēr kêt nē. E kwa ixkapērja mãn mẽ amnhĩ krã him haxàr tỳx nē ri hã apa. Anē.

Jejus mẽ Tirtũm wa hkarõ jarēnh

5-6Nhũm Jejus arĩ mẽ inhmã kapēr nē mẽ inhmã:

—E na pa ra kot mẽ awỳr inhmēnh xwỳnhnta wỳr ra akupỹm inhnojarēt ka mẽ ixte amnhĩ jarēnh ã inhma nē akaprĩ nē. Nē tee ri amnhĩ kukamã ajamaxpēr tã mẽ atõ aprĩ hã ma inhmõr xà ã ixkukjêr kêt nē. Rỳ inhmã: “Kwa mo kaxyw kot kaj kêt mẽ ixre nē ma akupỹm mõi? Xà we ja amã mex?” Anhỹr o mẽ atõ ixkukjêr kêt nē. 7Kêt ma akupỹm ixàpirja mẽ amã mex kumrēx. Kop ãm akupỹm ixàpir kêt ronhỹx mẽ amã mẽmoj kutã nojarēt xwỳnhnta ixpãnhã mẽ awỳr wrỳk kêt nē. Tã kot paj ma akupỹm api nē amnhĩ pãnhã mẽ awỳr kurê. Jakamã kwa mẽ ja ma nē tãm ajamaxpēr o ri apa. 8Koja ixpãnhã mẽ awỳr wrỳ hãmri nē mẽ kêp ixkwỳ hkêt xwỳnhjê mã mẽmoj to axkrunēpxi nē ho amnhĩrīt. Koja mẽ kãm mẽ kot tanhmã amnhĩ tomnuj to xà ho amnhĩrīt. Nē mãânēn mẽ kãm tanhmã mẽ kot amnhĩ to mex to xà ho amnhĩrīt. Nē mãânēn Tirtũm kot nhỹrmã mẽ kot amnhĩ tomnuj mỳrapê tanhmã mẽ homnuj to xàta nhũm mãânēn mẽ kãm ho amnhĩrīt. Koja mẽ kãm ja piitã ho amnhĩrīt.

9—Jakamã koja mẽ ja kukamã tanhmã hamaxpēr to nē hamaxpēr o: “Kwa kot paj xep amnhĩ tomnuj kaga nē amnhĩ kaxyw Tirtũm Kra Jejus mã ijamaxpēr nē hkõt amnhĩ xãm kêt nhũm Tirtũm nhỹrmã ixte amnhĩ tomnuj mỳrapê tanhmã ixto. 10Nà kot paj hkõt amnhĩ xãm hãmri nē ra urak nē Tirtũm kapēr kõt tãm ri amnhĩ nhĩpêx o ixpa. Na pre Jejus tãm ri amnhĩ nhĩpêx o pa nhũm Tirtũm amnhĩ wỳr ho api pa mẽ axte jar nhỹri omunh kêt nē. 11Na xep Tirtũm nhỹrmã kot ma kuwy hwỳr mẽ kêp Jejus kwỳ hkêt xwỳnhjê nhõ pahi maatija mēnh ã ra amnhĩ kukamã hã amnhĩ jarē. Jakamã kwa arĩ ixpê hkwỳ jakamã kot paj tokyx Jejus kõt amnhĩ xãm kêt nhũm hkõt kuwy hwỳr inhmē.” Anhỹr o hamaxpēr. Koja ã wa Ixkarõja mẽ kêp ixkwỳ hkêt xwỳnhjê mã mẽmoj to amnhĩrīt mex anē.

12—Nē na pa kormã mẽ amã mẽmoj piitã ho amnhĩrīt kêt nē. Kormã mẽ ate aprĩ hã mẽmoj pumunh nē mar mã tãm kêt. 13Tã koja ixpãnhã wa Ixkarõ mẽ awỳr wrỳ nē mẽ akarõ mã agjê hãmri nē hprĩ hã mẽ amã Tirtũm kot amnhĩ nhĩpêx o amnhĩrīt o mẽ akõt pa ho pa. Nom koja amnhĩ krã hkõt tanhmã mẽ amã ho amnhĩrīt to hkêt nē. Koja ãm Tirtũm pix xõ ri mẽ amã ho amnhĩrīt o mẽ akõt pa. Jao hprĩ hã mẽ amã ixkõt mẽ ate amnhĩ nhĩpêx nyw o mẽ amã amnhĩrīt o mẽ akõt pa. ã koja hprĩ hã ra ixte mẽ amã ixujarēnh xà hkõt axte mẽ amã mẽmoj to amnhĩrīt mex o pa anē.

14—Ně koja hprĩ hã mẽ amã pa ixto amnhĩrĩt o pa. Jao mẽ amã inhmex o inhmex ã ixto amnhĩrĩt o mẽ akõt pa. 15Inhĩpêêxà mẽ wa ixkapêrja ãm htipxi. Tã koja wa Ixkarõ ixkapêr xõ ri ã mẽ amã mẽmoj to amnhĩrĩt anẽ. Jao ra wa ijamẽ wa ixkapêr o amnhĩrĩt mex o pa. Kojã ã wa mẽ apê ixkwỳ hã mẽ ato mex o pa anẽ. Anẽ.

Mẽ kot akupỹm Jejus tĩr ã omunh ã mẽ harẽnh

16Nhũm Jejus arĩ mẽ inhmã kapêr nẽ mẽ inhmã:

—Ně kot paj tokyx mẽ ano pê akunok ka mẽ axte amnhĩ kaêx ã ixpumunh kêt nẽ. Nom kwa kêr ka mẽ tee ri ixkapêrja kukamã ajamaxpêr kêt nẽ. Kot paj ixtã apkati grêre ka mẽ axte ixpumu. Anẽ.

17-18Nhũm pre ã Jejus hkõt mẽ ixpa ho mẽ ixpa xwỳnhjê mã kapêr anẽ. Pa mẽ tee ri ã kapêr anhỹr ã kuma nẽ axpẽn mã:

—Kwa mo na ri ã amnhĩ jarẽnh anẽ? Nẽ tokyx mẽ pano pê pikunor tã hã apkati grêre nhũm axte mẽ pahte omunh ã amnhĩ jarẽ nẽ akupỹm Hipêêxà hwỳr àpir ã amnhĩ jarẽ. Pêr kapêrja ãm ri katii. Anẽ.

19Nhũm amnhĩ tã mẽ inhma nẽ mẽ inhmã:

—Kwa xà na ka mẽ kormã aprĩ hã ixkapêr ã inhmar kêt nẽ? 20Kot paj ty nhũm mẽ kêp ixkwỳ hkêt xwỳnhjaja ijarẽnh ma nẽ hkĩnh nẽ. No mẽ kajaja kot kaj mẽ akaprĩ nẽ amỳr o apa. Nẽ gaa nẽ akupỹm akĩnh nẽ. Kwa mẽ ixkapêrja ma nẽ kãm ajamaxpêr tỳx o apa. 21Te mẽ ate mẽ hpijagri xwỳnh kot amnhĩ nhĩpêx pyrãk. Na htem õhy xà nẽ gaa nẽ ra õhy xà htỳx nẽ. Nẽ hkĩnh kêt nẽ tee ri amnhĩ nhĩpêx o hikwỳ. Tã gaa nẽ hpijagri nhũm hkrare kato nhũm omu nẽ akupỹm hkĩnh nẽ axte õhy xà htỳx mã hamaxpêr kêt nẽ. 22Tã ã mẽ ate amnhĩ nhĩpêx anhỹr kaxyw. Kot kaj mẽ akĩnh kêt nẽ ri apa. Tã kot paj akupỹm tokyx ixtĩr nẽ axte mẽ awỳr ixkato ka mẽ ixpumu nẽ akĩnh nẽ. Hãmri nẽ akĩnh rãhã ri apa ho apa. Nhũm mẽhõ mẽ apumu nẽ tee ri tanhmã mẽ akĩnh nẽ mẽ ato kaprỳ ka mẽ arĩ akĩnh rãhã ri apa ho apa.

23—Nẽ ixte akupỹm kaxkwa hwỳr ixàpir nẽ amnhĩ pãnhã mẽ awỳr wa Ixkarõ rẽnh nhũm mẽ awỳr wrỳk nẽ hprĩ hã mẽ amã mẽmoj piitã ho amnhĩrĩt jakamã kot kaj mẽ axte amã mẽmoj tã ixkukjêr prãm kêt nẽ. Anẽ.

Jejus kwỳjaja kot àmnhĩx mẽmoj tã Tĩrtũm wỳr

Matêwre 18.19-20; Juãw 14.13-14

Nhũm Jejus arĩ mẽ inhmã kapêr nẽ mẽ inhmã:

—E kwa mẽ ã ixkapêr anhỹrja ma nẽ amnhĩ krã kamã kãm ajamaxpêr tỳx nẽ ho apa. Kot kaj mẽ apê ixkwỳ hã mẽmoj tã Inhĩpêêxà wỳ nhũm mẽ ama nẽ mẽ ate hã axàhwỳr xà hkõt mẽ amã mẽmoj tanhmã ho rỳ mẽ amã mẽmoj gõ. 24Na ka mẽ kormã apê ixkwỳ hã mẽmoj tã axàhwỳr kêt nẽ. Tã kêr ka mẽ amã mẽmoj tã hwỳr prãm nẽ mãmri

mëmoj tã hwÿr o apa. Kê mẽ ama hãmri nê tanhmã mẽ amã mẽmoj nhÿpêx to ka mẽ amnhĩ tã omu nê akĩnh nê.

25—Nê na pa pre mẽ amã mẽmoj jarênh kaxyw nê mẽmoj tã haxwÿ nê mẽ amã ixujarênh rax nê. Nom kot paj axte ã mẽ amã ri ixujarênh anhÿr kêt nê. Kot paj tã ixprĩ hã mẽ amã tanhmã Inhĩpêêxà jarênh to ka mẽ aprĩ hã mar mex kurê kumrêx. 26Hãmri nê mẽ kamjaja mẽ apê ixkwÿ hã tanhmã amnhĩ to hwÿr to ho apa. Jakamã mo kaxyw kot pa kêt axte tanhmã mẽ ato hwÿr to? Kot kaj mẽ kamjaja amnhĩ to hwÿr jakamã arĩ ixte mẽ ato hwÿr kaxyw ixto presija hkêt nê.

27—Na ka mẽ ra amã ijapê nê. Nê ixte Inhĩpêêxà rûm mẽ awÿr ixwryk ã ixpumu. Jakamã nhùm Inhĩpêêxàja ixtã mãânên kãm mẽ ajapê nê. Tã kot kaj mẽ kamjaja mẽmoj tã amnhĩ to hwÿr o apa nhùm mẽ ama nê kãm mẽ ajapê htÿx kãm mẽ amã mẽmoj gô.

28—Na pa pre Inhĩpêêxà rûm amnê mẽ awÿr wrÿ. Hãmri nê kãm hprãm xà hkôt tanhmã amnhĩ nhÿpêx to hpar o mō nê ra akupÿm hwÿr inhnojarêt kaxyw. Anê.

Nhùm pre ã Jejus mẽ inhmã amnhĩ jarênh anê. 29Pa mẽ tã ixprĩ hã mar mex nê. Hãmri nê kãm:

—Tÿ. Nà na pa mẽ tã ixprĩ hã ate amnhĩ jarênh ma. Ka amnhĩ tã haxwÿr nê axujarênh kêt jakamã pa mẽ tã ixprĩ hã amar mex nê. 30Pêr ãm ate mẽmoj piitã omunh par xwÿnh na ka. Jakamã ate mẽ ijamaxpêr piitã hkôt aprĩ hã mẽ ixpumunh par kumrêx kênã kot ka tanhmã mẽ ijamaxpêr to hã mẽ ixkukja. ãm hãmri na ka Tirtûm rûm awryk ã amnhĩ jarê. Anê.

31Hãmri nhùm mẽ inhma nê mẽ inhmã:

—Xà ãm hãmri na ka mẽ ixkôt ajamaxpêr tÿx nê? 32Kwa mẽ o kora. Kot kaj mẽ tokyx mẽ umaj ixre nê anhgrà nê ma ahpÿnhã mẽ anhõ krĩ hwÿr mra. Mê kot ixkôt tanhmã mẽ anhĩmex to pymaj kot kaj mẽ ã amnhĩ nhÿpêx anê kãm ga. Kot paj ahte mẽ kãm ixãm pyrãk o amnhĩ nhÿpêx nom ahte ixãm kêt nê. Inhĩpêêxà aa kot ixrere hã.

33—E ixkukwak ri mẽ ajamakêtkati nê axãmnhĩx mẽ apa kaxyw na pa ã mẽ amã ixkapêr anê. Nom mẽ kêp ixkwÿ hkêt xwÿnhjaja koja nhÿrmã ixtã mẽ atomnuj tÿx o pa. Tã kêr ka mẽ amã mẽ uma nê tee ri amnhĩ kukamã ajamaxpêr o ri apa hkêt nê. Nhÿrmã ixte mẽmoj punuj piitã ho ijapêx par ã arĩgrota ã kot paj mẽ atã mẽ ho ijapêx par kumrêx. Anê.

Jejus kot amnhĩ to Tirtûm wÿr ã harênh

Rômãn 8.34; Eprêw 7.25

17 1Tã nhùm Jejus mẽ inhmã kapêr pa nê hpãnhã kaxkwa hwÿr rĩt nê Tirtûm mã amnhĩ jarê nê kãm:

“Pa Papaj. E na pa ra amã hprãm xà hkôt tanhmã amã amnhĩ nhÿpêx to hpar o mō nê akupÿm awÿr inhnojarêt kaxyw. Jakamã

kot kaj ixpê Akra hã ma akupým amnhĩ wÿr ixto api. Mẽ kot ja hã ixpumunh nẽ amã amex o amex ã ajarênh o pa kaxyw. ²Na ra pyka piitã hkôt ri mẽ pa xwÿnh kwÿjaja amnhĩ kaxyw ixkôt hamaxpêr nẽ ixkôt amnhĩ xunhwÿ nom ka na ka pre inhmã mẽ agõ. Ixte mẽ htír tũm nẽ mẽ pa mã xwÿnh ã mẽ harênh kaxyw. Jakamã koja mẽ nhÿrmã ixkukwak ri pakuri htír tũm nẽ pa ho pa. ³Na mẽ ra ixkapêr mar mex nẽ. Nẽ ixpê Jejus Kris pê ate mẽ hwÿr inhmênh xwÿnhja kôt hamaxpêr mex nẽ. Nẽ apê Tirtũm ã ãm apyxi mex ã mãânên akôt hamaxpêr mex nẽ. Nẽ amex o amex ã akôt hamaxpêr nẽ kãm akĩnh nẽ. Jakamã koja mẽ nhÿrmã pakuri htír tũm nẽ pa ho pa. Nà koja mẽ anẽ.

⁴Amnepêem amnẽ pyka ja hwÿr inhnojarêet nhũm ate tanhmã ixte amnhĩ nhĩpêx to hã inhmã karõta na pa ra hatur xãm mênh kaxyw. Na pa xatã mẽ kãm akapêr jarênh o ri mẽ hkôt ixpa. Jao ra mẽ kãm apê Pahi Maati hã apixi mex ã ajarê nẽ amex o amex nẽ axàhpumunh o axàhpumunh ã mẽ kãm ajarênh o ri ixpa. ⁵Jakamã e Papaj. Kêr ka tokyx ixpê akra hã ma akupým amnhĩ wÿr ixto api. Pa akupým awÿr pøj nẽ te amnepêem akuri ixpaja pyrã nẽ axte akuri ixpa ho ixpa.” Anẽ.

Jejus kot hkwÿjê ho Tirtũm wÿr ã harênh

Nhũm Jejus arĩ Tirtũm mã kapêr nẽ kãm:

⁶“E Papaj. Nà ra ate pyka hkôt inhmã mẽ õr xwÿnhjaja na pa ra mẽ kãm akapêr jarênh ryy ho ri mẽ hkôt ixpa nhũm mẽ akapêr kôt pix mã amnhĩ nhĩpêx o pa. ⁷Tã ixte anhÿ hã tanhmã amnhĩ nhĩpêx to ho ri ixpaja ra mẽ kot ja hã ixpumunh mex. ⁸Na pa pre hte axô ri mẽ ahkre ho ri ixpa nhũm mẽ amnhĩ kaxyw ixkôt hamaxpêr mex nẽ. Nẽ ate mẽ hwÿr inhmênh nhũm mẽ hwÿr ixwÿrkja ã mẽ kot ixpumunh mex.

⁹⁻¹⁰Tã ot pa mẽ ho awÿr o xa. Nom na pa mẽ kêp ixkwÿ hkêt xwÿnhjê ho awÿr kêt nẽ. ãm ate inhmã mẽ õr xwÿnhjê pix o na pa awÿ. Mẽ kêp akra jakamã mãânên mẽ kêp ixkraa. Jakamã na htem pamã pamex o pamex ã pajarênh o ri pa.

¹¹Axihtÿx o axihtÿx jakamã na ka pre amnhĩ xwar inhmã axihtÿx xà hkwÿ gõ pa te ixte axihtÿx pyrãk. Tã na pa ra akupým awÿr inhnojarêet kaxyw. Kot paj jar pyka hkôt ri ixpa ry hkêt nẽ. Nom ixkwÿjaja koja mẽ arĩ kamã pa jakamã kwa Papaj. Kêr ka inhmã mẽ omunh mex nẽ kê mẽ inhÿ hã tãm ri amnhĩ nhĩpêx o pa. Nẽ pahpyrã nẽ te ixkre tipxi kamã mẽ htipxi nẽ mẽ pa pyrãk o axpên kôt pa.

¹²Kormã mẽ kamã ixpata ã ate inhmã axihtÿx xà hkwÿ nhõrta o pa mẽ htãnopxar mex o ri mẽ hkôt ixpa. Jakamã nhũm mẽ ri ixkôt

amnhĩ nhĩpêx o pa. ãm Jut Kariot pix koja mẽ hkĩnhã tanhmã amnhĩ tomnuj to nê hapêx. No ãm ra akapêr ã kagã kot hkukamã ã kot amnhĩ nhĩpêx anhỹr ã harênh xàja kôt koja ã amnhĩ nhĩpêx anê nê hapêx.

13Tã na pa ra akupỹm awỹr inhnojarêť kaxyw jakamã na pa ixte tokyx mẽ rer mã xwỹnhjê ho awỹr o xa. Kormã mẽ hkôt ri ixpa ri. Mẽ kot inhmar nê ixpyrà nê hkĩnh nê hamakêtkati nê ri pa kaxyw.

14Na pa pre ra mẽ kãm akapêr jarênh ry nê nhũm mẽ ixpyrà nê akôt pix mã amnhĩ nhĩpêx o ri pa. Jakamã nhũm hte mẽ kêp ixkwỹ hkêť xwỹnhjaja tee ri ja hã mẽ omu nê axtem nê kãm mẽ hkurê nê. Nom mẽ kêp mẽ hkwỹ hkêť jakamã na htem ã mẽ kamã gryk anê.

15Tã na pa ã mẽ ho awỹr anhỹr o xa. Nom mẽ kot amnhĩ tomnuj xwỹnhjê hkàx ã mẽ pa kaxyw na pa mẽ ho awỹr kêt nê. Koja mẽ arĩ mẽ hkôt ri pa. Nom mẽ uràk nê amnhĩ tomnuj o pa pumaj na pa ã mẽ ho awỹr anê. 16Mẽ kêp mẽ hkwỹ hkêť. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyràk jakamã kê mẽ amarĩ mẽ hkôt pa htã mẽ kot amnhĩ nhĩpêx kôt amnhĩ nhĩpêx o pa hkêť nê. ãm pahkôt pix mã amnhĩ nhĩpêx o pa. 17Akapêr pix na mex o mex jakamã koja mẽ hkôt amnhĩ nhĩpêx o pa nê gaa nê te pahte amnhĩ nhĩpêx pyràk o amnhĩ nhĩpêx.

18Na ka pre amnê mẽ hwỹr inhmê pa pre ixte mẽ kãm akapêr jarênh o ri ixpa kaxyw mẽ hwỹr wrỹ. Nê amnhĩ pyrà nê mẽ kot akapêr jarênh o mẽ hkôt pa kaxyw pa mẽ kurê nê ma mẽ hwỹr mẽ kurê. 19Inhmã mẽ hapê jakamã kot paj amnhĩ grônh kôt nhãm mẽ kot axpên mã ri inhgrônh o pa xwỹnhjê mã amnhĩ gô. Amã hprãm xà hkôt. Ixkwỹjaja kot ja hã ixpumunh nê ixpyrà nê amã hprãm xà hkôt pix mã tanhmã amnhĩ nhĩpêx to ho pa kaxyw.” Anê.

Jejus kot hkrajê piitã ho Tĩrtũm wỹr

20Nhũm Jejus arĩ Tĩrtũm mã amnhĩ jarê nê kãm:

“Tã na pa ã jajê ho awỹr anê Papaj. Nom ixkôt mẽ pa ho mẽ pa xwỹnhjê pix o na pa awỹr kêt nê. Mããnên mẽ ô ri nhỹrmã mẽ kot ixkôt amnhĩ xunhwỹr mã xwỹnhjaja na pa mẽ ho ixpimràã tã mẽ ho awỹ. 21Kê mẽ pahpyrà nê te hamaxpêr tipxi pyrà nê ri axpên to pa. Nê pahte amnhĩ nhĩpêx kôt pix mã amnhĩ nhĩpêx o pa. Koja mẽ ã amnhĩ nhĩpêx anhỹr o pa nhũm mẽ kêp pahkwỹ hkêť xwỹnhjaja pahtã mẽ omu nê ate mẽ hwỹr inhmênh ã apumunh kurê kumrêx.

22Nê koja mẽ ixkukwak ri panhỹ hã te pahpyrà nê hamaxpêr tipxi nê ri pa pyràk o amnhĩ nhĩpêx o pa. 23Na pa htem te ixkre tipxi kamã mẽ ixtipxi pyràk o axpên nhĩpêx o ri ixpa. Te pahte axpên nhĩpêxta pyràk. Tã koja mẽ ixwakre kamã ã axpên nhĩpêx anhỹr o pa nhũm mẽ kêp pahkwỹ hkêť xwỹnhjaja ja hã mẽ omu nê

hamaxpêr o: ‘Nà pêr âm hãmri na pre Tirtùm tãm mẽ pahwÿr Jejus mẽ. Kãm hapê htÿx tã mẽ pahwÿr kumê nhùm wrÿ nê amnhĩ xwar kãm hkwyjê japê nê.’ Anhÿr o koja axpên mã pajarênh o pa.

²⁴Amnepêm amrakati ri pa pre amã ijapê hã ri ixpa. Tã ot pa jajê ho awÿ. Ka na ka pre inhmã mẽ agô. Tã ma awÿr inhmôr mã xàta wÿr na pa inhmã mẽ àpir prãm nê. Koja mẽ nhÿrmã ma pahwÿr api pu mẽ pahpiitã pahpimràatã pamã axpên japê hã ri papa ho papa.

²⁵E Papaj. Amex o amex tã mẽ kêp ixkwÿ hkêt xwÿnhjaja na kormã ate mẽ hwÿr inhmênh xwÿnh ã ixkôt hamaxpêr kêt nê. Nom mẽ kot ixkôt amnhĩ xunhwÿr xwÿnhjaja na mẽ kurom ja hã ixkôt hamaxpêr mex nê.

²⁶Na pa ra ixprĩ hã mẽ kãm akapêr o amnhĩrĩt o ri ixpa. Tã kot paj axte mẽ kãm akapêr kwÿ jarê. Amã ijapêta pyrã nê mẽ kãm axpên kĩnh ã axpên to pa kaxyw na pa mẽ kãm hã karô. Kot paj inhĩ hã mẽ hkôt ixpa hkêt tã koja Pahkarôja mẽ hwÿr wrÿ nê mẽ hkarô mã agiê nê te pa mẽ hkôt ixpa pyrãk o mẽ hipêx. Ja na pa inhmã hprãm. Tã koja anê. Jakamã na pa ã mẽ ho awÿr anê. Tã âm ja pix Papaj.” Anê.

Nhùm pre ã Jejus ô Papaj mã mẽ inhnoo mã amnhĩ jarênh anê pa mẽ ixpiitã hã kuma.

Mẽ kot Jejus pynênh ã mẽ harênh

Matêwre 26.47-56; Makre 14.43-50; Rukre 22.47-53

18 ¹Tã nhùm Jejus mẽ ixto Hipêêxà hwÿr pa. Hãmri nê ixkreja rùm ma tẽ nê Jerujarê rùm kato nê ma gô pê Kirô hwÿr tẽ pa mẽ hkôt ixpa ho ixpa xwÿnhjaja ma hkôt mra. Nê gô hã rê nê hikjê hã mẽ kot mẽmo pĩ hkô hkre xwÿnhja wÿr mra nê parpê ixkrĩ hpa. ²Na pre hte Jejus xatã hwÿr amnhĩ kôt mẽ ixto pa ho kuhê. Jakamã nhùm Jut Kariot kot mẽ kãm ôr mã xwÿnhhta ra kot hwÿr mẽ ixpa ho ixkuhê xàta pumunh mex. ³Jakamã pa mẽ hwÿr pôj nê ixkrĩ hpa nhùm mẽ mẽ ixwÿr mra. Jut Kariot mẽ pôristijaja. Rôm nhô xwÿnhjê nhô pôristijê mẽ patre nhô pôristijaja nhùm mẽ mẽ ixwÿr Jut Kariot kôt mra. Ijaew nhô pahijê nhÿ hã mẽ ixwÿr mra. Piitã wapohti jamÿ nê pô hpôk nê kanê jamÿ nê mẽ ixwÿr hpôk o kato. ⁴⁻⁵Hãmri nhùm Jejus amnhĩ wÿr mẽ omu nê kànhmã xa nê ma mẽ kutã tẽ. Jut Kariot kot mẽ kãm ôr kaxyw nhùm amnhĩ tã omunh mex jakamã amnhĩ wÿr mẽ omu nê ma mẽ kutã tẽ. Hãmri nê mẽ hkaxpa nê mẽ omunh o xa nhùm Jut Kariot mẽ kuri xa nhùm Jejus mẽ omu nê mẽ kãm:

—Pa. Mêmioj japêr na ka mẽ pô hpôk o ri apa? Anê.

Hãmri nhùm mẽ kãm:

— Nà Jejus pê Najare nhõ xwÿnh japêr o na pa mẽ ri ixpa. Anê.

Hãmri nhũm mẽ kãm:

— Tỳ ot pa xa. Pa na ixpê Jejus. Anê.

6Hãmri nhũm mẽ kuma nê tee ri axpên pumu nê umaj katê ho axkamê nê kuhê. Nom katê ho pikamênh o ra rôrôk pa nê hikwÿ. 7Hãmri nê kànhmã kuhê hpa nhũm Jejus axte mẽ kãm:

— Kwa mẽ inhmã amnhĩ jarê. Mêhõ japêr o na ka mẽ apa? Anê.

Hãmri nhũm mẽ kãm:

— Jejus pê Najare nhõ xwÿnhnta japêr o na mẽ ri ixpa kênã. Anê.

8Hãmri nhũm mẽ kãm:

— Kwa ra ixte mẽ amã amnhĩ jarênh kênã. Paa. Ijapêr o na ka mẽ ri apa. Jakamã kwa kêr ka mẽ ixkôt ri mẽ pa xwÿnhntaja tanhmã mẽ ho hkêt nê. Kê mẽ mãmri anhrã nê ma mra.

9Anhÿr o mẽ inhnê mẽ kãm kapêr. Na pre ra ham Hipêêxà mã mẽ ixtã kãm amnhĩ jarê nê kãm:

— Kormã mẽ kamã ixpa ri ate inhmã ixihtÿx xà nhõrta o na pa mẽ htãnopxar mex o ri mẽ hkôt ixpa.

Anhÿr o mẽ ixtã kãm amnhĩ jarênh jakamã nhũm ã mẽ inhnê mẽ kot unênh mã xwÿnhjê mã kapêr anê.

Simãw Pêtre kot mêhõ pê hamak krãhyr ã harênh

Matêwre 26.51-54; Makre 14.47; Rukre 22.49-51

10Hãmri nhũm Simãw Pêtre tee ri Jejus ã mẽ omu hãmri nê õ wapo kapa nê jam ho apê nê ho hamak nhĩkjê krãhta. Mawti jamak krãhta. Mawtija mẽõ patre mã apênh xwÿnhjê hõ na pre nhũm Simãw Pêtre hamak krãhta. 11Hãmri nhũm Jejus ja hã omu nê nê kãm kapêr nê kãm:

— Tk. Kwa nà amarĩ xa nê akupÿm awapota hkàm haxà. Ixte mẽ anê amnhĩ xà htÿx kamã ijamak kaxyw na pa pre Inhĩpêêxà rũm amnê mẽ awÿr pika hwÿr wrÿ. Kê inhmã kãm hprãm xà hkôt pix mã na inhmã tanhmã amnhĩ nhĩpêx to ho ixpa hprãm. Jakamã kwãr mẽ mãmri tanhmã kãm ixto hprãm xà hkôt mãmri tanhmã ixto. Anê.

Mê kot Anas wÿr Jejus o htêm ã mẽ harênh

Matêwre 26.57-58; Makre 14.53-54; Rukre 22.54

12Tã nhũm pôristi mẽ mẽ hkrãhtũm nê mẽõ patre nhõ pôristijaja Jejus pynê nê hpa hpre hpa 13nê ma Anas wÿr o tẽ. Anasja Kajpas piinhõ na pre. Nhũm Kajpas kormã amgrãja ã Anas pyrã nê kêp mẽõ patre maati. 14Jakamã na pre ra Ijaew nhõ pahijê mã Jejus jarênh o:

— Nà kot puj mẽ Jejus pĩr tokyx anê. Kê tapxipix ty pu mẽ arĩ mÿrpê pahpiitã pajamakêtkati nê ri papa. Anê.

Jakamã nhũm mẽ Jejus pynê nê kormã ma patre maati hwÿr o tẽ.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Rukre 22.54-62

15Hãmri pa ixpê Juãw mẽ ixkràmnhwỳ Simãw Pêtre mẽ pa wa ma mẽ hkôt wa tẽ. Nhũm mẽ ra mẽ inhõ patre maati nhõrkwỹ hwỳr Jejus o axà. Nhũm patre maati kot ixpumunh jakamã nhũm kãm àpênh xwỳnhja ixpumu nẽ inhmã anẽ pa mẽ hkôt axà. 16Nom nhũm Simãw Pêtre arĩ kapôt ã hakwa krem xa. Hãmri pa omu nẽ akupỹm hwỳr tẽ nẽ mẽhõ niti kot hakwa kre jamãr o ãm xwỳnhja mã anẽ nhũm kãm kahê xà mẽ nhũm mẽ ixkôt axà. 17Hãmri nhũm nita hprĩ hã omu nẽ kãm:

— Xêê. Pêr apê mẽ kot unênh nẽ o mõi mũj kôt ri mẽ pa xwỳnhjê hõ na ka mê? Anẽ.

Hãmri nhũm kuma nẽ kãm:

— Tk. Nà ixte mẽhõ myti ata pumunhre hã. Anẽ.

18Hãmri nhũm ra kôt ã kamàt nẽ ra kryy nẽ nhũm mẽ àpênh xwỳnh kwỳ mẽ mẽõ patre nhõ pòristi hkwỳjaja amnhĩm kuto nẽ hã ànhunh o kuhê. Nhũm Simãw Pêtre mẽ omu nẽ mẽ hwỳr tẽ nẽ mẽ ìhkô hã ànhunh o xa.

Patre maati kot Jejus kukjêr ã harênh

Matêwre 26.59-66; Makre 14.55-64; Rukre 22.66-71

19Rôm nhũm Anasja hêx rom tanhmã Jejus kukjêr to nẽ kãm:

— E kwa inhmã amnhĩ jarê. Tanhmã na ka hte we akôt mẽ pa ho mẽ pa xwỳnhjê jahkre hto ho apa wehe? Anẽ.

20Hãmri nhũm amnhĩ tã kãm:

— Nà na pa hte mẽ piitã mẽ noo mã ri mẽ kãm ixkapêr o ixpa. Tĩrtũm kapêr o mẽ ahkre xà hã ixkre kamã nẽ Tĩrtũm mã amnhĩ jarênh xà hã ixkre kamã pa hte mẽ piitã mẽ noo mã ri mẽ kãm tanhmã ixkapêr to ho ri ixpa. Na pa hte nhỹri ixpimxur pê ri mẽ kãm tanhmã ixkapêr to ho ri ixpa hkêt nẽ. 21Tã ka ixtã mẽ kot inhmar o kuhê xwỳnhjaja tanhmã ixtã mẽ hkukjêr to hkêt nẽ. ãm papxipix ri ixkukja. Kwa ixtã mẽ hkukja kê mẽ kot tanhmã ixkapêr mar to xà hkôt tanhmã amã ijarênh to nà? Anẽ.

22Hãmri nhũm patre nhõ pòristi hõja kuma nẽ hwỳr tẽ nẽ kãm:

— Tk. Kwa na htem ã patre maati mã kapêr anhỹr kêt nẽ. Na htem hã hpĩaam o kãm kapêr. Tã na ka axtem nẽ ri ã kãm akapêr anẽ. Anẽ.

Hãmri nẽ hinep hkura.

23Hãmri nhũm Jejus amnhĩ tã omu nẽ kãm:

— Kwa kot pa tanhmã mẽ amã amnhĩ to ixêx to ka mẽ hã inhma nẽ rĩ kormã tanhmã axpên mã ixto akapêr to rỳ hã ixtak. Nom ãm hãmri ixte mẽ amã amnhĩ jarênh tã ka axtem nẽ ri inhĩnep ixtak. Anẽ.

24Hãmri nhũm Anas tanhmã mar to hpa hãmri nẽ umre Kajpas wỳr kumẽ. Na pre Kajpasja kormã hitom kãm ri tanhmã amnhĩ nhĩpêx to

ho nhỹ nhũm Anas mẽ kãm anẽ nhũm mẽ kuma nẽ hwỳr Jejus o tẽ nẽ ho axà. Arĩ hpa hpre rãhã hwỳr o tẽ nẽ ho axà nhũm xa nẽ kãm amnhĩ jarẽ.

Simãw Pêtre kot axte Jejus kôt pa hkêt ã amnhĩ tã aprãr ã harẽnh

Matêwre 26.71-75; Makre 14.69-72; Rukre 22.58-62

25Nhũm Simãw Pêtre arĩ mẽ ãhkô hã ànhunh o xa nhũm mẽhõja kãm kapêr nẽ kãm:

—Kwa pêr apê Jejus kôt ri mẽ pa xwỳnhjê hõ na ka. Anẽ.

Hãmri nhũm kuma nẽ kãm:

—Tk. Kokỹ ixte mẽhõ něj pumunhre hã. Anẽ.

26Hãmri nhũm hpãnhã mẽõ patre maati mã àpênh xwỳnhja mãănẽn omu. Simãw Pêtre kot kêp hamak krãhyr xwỳnhhta kwỳ na pre. Jakamã nhũm hprĩ hã omunh mex kurê kumrêx nẽ kãm:

—Kwa nà ka na ka mũtar pĩ hkôta kamã mẽ ãhkô hã xa pa apumu. Anẽ.

27Hãmri nhũm tee ri kuma nẽ axte mẽ kãm amnhĩ tã aprãr kãm hihtỳx nẽ. Jao ra mẽ kãm amnhĩ tã aprãr o axkrunêpxija mẽ nhũm krãhyre hkàr kurê kumrêx. Ra Jejus kot hkukamã harẽnh xà hkôt kêp hkwy hkêt ã amnhĩ tã aprãr o axkrunêpxi.

Jejus kot Pirat mã amnhĩ jarẽnh

Matêwre 27.1-2, 27.11-31; Makre 15.1-20; Rukre 23.1-5, 23.13-25

28Hãmri nhũm mẽ ixpê Ijaew hkrãhtũmjaja ra Kajpas rũm Jejus o kato nẽ ma Pirat wỳr o tẽ. Piratja na pre te Rômjê nhõ pahi pê Sesti mã mẽ ixpê Ijaew jamãr o pa nhũm mẽ ma hwỳr o tẽ. Nhũm ra myt kator grire nhũm mẽ hwỳr o tẽ nẽ òrkwỹ kapem o xa. Pirat kêp Ijaew kêt jakamã nhũm mẽ òrkwỹ hwỳr gjêx kêt nẽ kapôt ã kuhê. Na hte Ijaew kormã Pas ã hkĩnh hãmri nẽ nhãm mẽ kêp Ijaew kêt xwỳnhjê nhõrkwỹ hwỳr gjêx kêt nẽ. Koja mẽ hwỳr agjê nẽ amnhĩ tomnu nẽ Pas ã apkur kêt nẽ. Jakamã nhũm mẽ Pirat wỳr Jejus o tẽ no ãm hwỳr o àr kêt nẽ. ãm ixkre kapem o xa. 29Hãmri nhũm Pirat mẽ hwỳr kato nẽ omu nẽ hã mẽ hkukja nẽ mẽ kãm:

—Kwa tanhmã na we amnhĩ tomnuj to ka mẽ ixwỳr o tẽ? Anẽ.

30Hãmri nhũm mẽ kãm:

—Nà kot amnhĩ tomnuj o pa xwỳnh kênã. Jakamã na pa mẽ awỳr o tẽ. Ate tanhmã kot amnhĩ tomnuj to hã harẽnh mar nẽ mỳrapê tanhmã ho kaxyw. Anẽ.

31Hãmri nhũm mẽ kuma nẽ mẽ kãm:

—Tk. Kwa mẽ kamjaja ma amnhĩ kôt o tẽ nẽ amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anẽ.

Hãmri nhũm mẽ tee ri kuma nẽ kãm:

—Kwa amnepê mē ixpê Ijaewjaja na pa pre htem kên o mē kot amnhĩ tomnuj xwÿnhjê tak o mē kupa. Tã na ra Rôm nhõ pahihtija mē pamjaja mē ixte mē hpar nê mē ixkurê. Tapxipix kãm mē hpar ã àmnênh prãm. Jakamã kot kaj ÿ hã mē inhmã tanhmã hã axàmnênh to kê mē kupĩ. Ra ja kaxyw mē kot mē ixkaxyw axãm kênã. Anê.

32Rôm nhõ xwÿnhjaja na htem mē kot amnhĩ tomnuj xwÿnhjê hpar kaxyw nê pĩ kahpa hã mē hanhõ nê mē kupa. Nhũm Jejus amnhĩ kukamã tanhmã mē kot hpĩr to hã mē omunh mex jakamã ra hprĩ hã mē inhmã mē kot tanhmã hipêx to hã mē harê. Jakamã nhũm pre ã Ijaew Pirat kot mē kãm hpĩr prãm xaj ã kãm kapêr kãm xihýtix anê. 33Hãmri nhũm mē kuma nê akupÿm òrkwÿ hwÿr axà nê amnhĩ wÿr Jejus ã karõ nhũm hwÿr axà nhũm kãm:

—E kwa inhmã amnhĩ jarê. Xà apê Ijaew nhõ pahi na ka? Xà ka na htem amnhĩ wÿr akãm hamak o pa? Anê.

34-36Hãmri nhũm kãm:

—Tÿ ãm hãmri na ka ã ijarênh anê. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anê? Xà na pre mẽhõ ixte mē anhõ pahi Sesti kutã ixãm ã amã ijarê ka ama nê tee ri ixkukamã ajamaxpêr? Nà xà ãm hãmri amã Tĩrtũm kot Ijaew wÿr inhmênh ã ixpumunh prãm? Mo kaxyw na ka ã ixkukjêr anê? Anê.

Hãmri nhũm tee ri kuma nê kãm:

—Tk. Mo kot pa kêt ri axtem nê Tĩrtũm kot Ijaew wÿr amênh ã akukja? Mē apyrã nê ixpê Ijaew kêt kênã. Mē kot ixwÿr ato htêm xwÿnhjaja na mē ã ate amnhĩ jarênh anhÿr ã ajarênh anê. Nà mē akwÿjê mē mē anhõ patre krãhtũmjaja na mē ã inhmã ajarênh anê. Jakamã e aprĩ hã inhmã amnhĩ jarê. Tanhmã na ka we amnhĩ tomnuj to nhũm mē ixwÿr ato tẽ? Anê.

Hãmri nhũm kuma nê kê axte kãm:

—Nà ixpê pyka ja kamã mē õ pahi hkêt. Kop ãm ixpê pyka ja kôt mē õ pahi ronhÿx ra ixkôt ri mē pa xwÿnhjaja tanhmã ixtã mē ato. Nom jar ixpê mē õ pahi hkêt. ãm axtem ixpê mē õ pahi na pa. ãm hãmri na pa ã amã amnhĩ jarênh anê. Anê.

37Nhũm ã kãm amnhĩ jarênh anê hãmri nhũm tee ri kuma nê kãm:

—Xà apê mē õ pahi hõ na ka? Anê.

Hãmri nhũm kãm:

—Tÿ. Nà ãm hãmri na ka ã ijarênh anê. Na pa pre amnê pikaja wÿr wrÿ nê jar mē akamã ixkato nê mē akamã ixaptãr. Ixte tanhmã mē kãm ixkapêr to ho ri ixpa kaxyw na pa pre wrÿ nê mē akamã ixpa nê ãm hãmri mē kãm ixkapêr o ri ixpa. Na pa hte tãm ixkapêr o ri ixpa. Tã mē kot ixkapêr mar nê ixkôt ri amnhĩ nhĩpêx o mē pa xwÿnhjaja na htem ixpê mē õ pahihiti hã ijarênh o pa. Anê.

38Hãmri nhùm Pirat kot tãm kãm kapër ã amnhĩ jarẽnhja ã kuma nẽ kãm:

—Tk. Aa ixte pika ja kamã mẽhõ pumunh nhùm tãm kapër o pare hã. Anẽ.

Hãmri nẽ kapër ã kuma nẽ tee ri hkukamã hamaxpër. Hãmri nẽ akupỹm Ijaew wỳr ho kato nẽ mẽ kutã o xa nẽ mẽ kãm:

—Kwa tanhmã kot amnhĩ tomnuj tore hã. 39E mẽ inhma. Na pa hte amgrã mẽ arĩgro pẽ Pas kãm mẽ amã mẽ hagjẽnh xà rùm mẽ akwỳjẽ ho hpỹnh nẽ mẽ hapõj nhùm mẽ hamakẽtkati nẽ amnhĩx ri pa. Ka mẽ ja hã omu nẽ Pas ã akĩnh nẽ. Jakamã e. Pa mẽ amã mẽ anhõ “pahihti” jarẽnhja mã inhũre. E na pa ra kãm inhũre. Anẽ.

40Hãmri nhùm mẽ tee ri ã kapër anhỹr ã kuma nhùm ja mẽ kęp omnuj tỳx nẽ. Nhùm mẽ hã kàx pẽ gryk kamã kãm kapër kãm hihtỳx nẽ kãm:

—Tk. Kwa nà kãm anhũrer kêt nẽ. Kêt Parapas mã mãn anhũre. Anẽ.

Parapasja na pre hte tanhmã amnhĩ tomnuj tỳx to ho ri pa nhùm prem mỳrapẽ unẽ nẽ haxà. Tã nhùm mẽ axtem nẽ Pirat kot kãm urer prãm xaj Jejus kaga.

Mẽ kot Jejus tak ã mẽ harẽnh

Matêwre 27.27-31; Makre 15.16-21; Rukre 23.20-25

19 1Tã nhùm Pirat akupỹm òrkwỹ hwỳr Jejus o axà nẽ ò pòristijẽ mã hã amỳnẽ nhùm mẽ hwỳr mra nẽ htak o kuhẽ. 2Hãmri nẽ kęp pahi hã hpẽr o pikẽnh kaxyw kãm pahi hã mẽ ahkã nhĩpẽx nẽ hkrãm haxà. Nom axtem mẽmo mrõnhĩ te kot ronh kanẽre pyrãk xwỳnhja nhùm mẽ hikãx nẽ hkrãm haxà. Nẽ kęp pahi hã mẽ ê kamrêk py nẽ kãm haxà. 3Hãmri nẽ xatã hwỳr mra nẽ hinep htak nẽ hã hpẽr o pikẽnh o xa nẽ kãm:

—E apẽ Ijaew nhõ pahi punuti na ka. Anẽ.

4Hãmri nhùm Piratja akupỹm Ijaew wỳr kato nẽ mẽ kãm:

—E koja inhõ pòristi akupỹm mẽ awỳr ho kato ka mẽ omu. Na pa tee ri kot tanhmã amnhĩ tomnuj to hã hkukja. Pẽr tanhmã kot amnhĩ tomnuj to hkêt kẽnã. Anẽ.

5Hãmri nhùm Jejus kato nẽ arĩ pahi hã àhkã tu nẽ ê kamrêk jaxà nẽ o xa nhùm Pirat mẽ kãm:

—E kwa mẽ omu nẽ kamã axukaprĩ hkêt wehe. Anẽ.



Juãw 19.1-3

6Hãmri nhũm patre krãhtũmjê mẽ mẽõ pôristijaja tee ri ja hã kuma nhũm ja mẽ kêp omnuj nê. Hãmri nê hã kãm kapêr kãm hihtỳx nê kãm:

— Tk. Kwa nà pĩ kahpa hã mãn anhô. Kê pĩ kahpa hã mãn ajêr nê ty. Anê.

Hãmri nhũm tee ri hã mẽ kuma nê mẽ kãm:

— Nà mẽ kam nê ma amnhĩm o tẽ nê mẽ kam amnhĩm ho anê. No pa kot paj ho anhỳr kêr nê. Mo mỳrapê kot pa kêr hã amỳnê nhũm mẽ kupĩ? Nà kwarĩ kot pa ho anhỳr kêr nê. Anê.

7Hãmri nhũm mẽ tee ri kuma nê kãm:

— Kwa kêp Tĩrtũm Kra hã amnhĩ jarênh kênã. Mẽ inhĩgêjtaja na prem ã mẽ ixte amnhĩ jarênh anhỳrja nê mẽ inhmã kapêr pa htem ã amnhĩ jarênh anhỳr kêr nê. Kojã mẽhõ ã ri amnhĩ jarênh anê nhũm mẽ ja mỳrapê kupĩ. Anê.

8Hãmri nhũm Pirat tee ri Jejus kêp Tĩrtũm Kra hã amnhĩ jarênhja ma nê kãm uma nê kãm tanhmã ho hprãm kêr nê. 9Hãmri nê akupỹm ôrkwỹ hwỳr ho axà nê axte hkukja nê kãm:

— Kwa aprĩ hã inhmã amnhĩ jarê. Nhỹhỹnh na ka pre mẽ ixwỳr mỗ? Anê.

Nom nhũm axte tanhmã kãm nê hkêr nê. ãm arĩ akryk mar o xa.

10Nhũm tee ri omu hãmri nê kãm:

— Kwa xà ate ixpumunh kêr? Inhỹ hã na htem mẽ kupa nê inhỹ hã akupỹm mẽ hapôj. Tã ka pêr aprĩ hã inhmã tanhmã amnhĩ jarênh to hkêr nê ri akryk akuhê. Anê.

11Hãmri nhũm Jejus kãm:

— Nom Tĩrtũm nhỹ hã pix mã na ka hte ã amnhĩ nhĩpêx anê. Kêp ãm Tĩrtũm kãm ja prãm kêr ronhỹx ka tee ri tanhmã amã ixto hprãm hkapyrỹ. Tãm kot mẽ ixkaxyw axãm kênã. Tã mẽ kot awỳr inhmênh nê ri ixtyk ã ijarênh xwỳnh pê Ijaew nhõ pahijaja. Ra mẽ kot ixkaga jakamã na mẽ ã amã ijarênh anê. Jakamã mẽ kot amnhĩ tomnuj tỳx o ajakrenh. Anê.

12Hãmri nhũm Piratja tee ri ã kapêr anhỳr ã kuma nê kot kãm urer prãm nê. Hãmri nê akupỹm Ijaew wỳr kato nê hã mẽ kãm kapêr nhũm mẽ tee ri kot kãm urer kaxyw ã amnhĩ jarênhja ma nê kãm ja prãm kêr kumrêx. Jakamã kãxpê nê kãm kapêr nê kãm:

— Kwa nà ra kêp mẽ inhõ pahi hã kot amnhĩ to hêx kênã. Kot mẽhõ ã ri amnhĩ jarênh anê nhũm Rôm kamã mẽ panhõ pahi Sestija ja hã harênh ma nê kamã gryk tỳx nê. Tã kot kaj kãm anhũre nhũm ajarênh ma nê akamã gryk nê. Anê.

13Hãmri nhũm tee ri mẽ kuma hãmri nê ma pahi kot tanhmã mẽ harênh to xà hã kên pota wỳr ma tẽ nê hã nhỹ. Mẽ ixpê Ijaew kapêr kãm mẽ ixte kãm: “Kapata” jarênh xwỳnhhta wỳr kot tanhmã Jejus jarênh to kaxyw ma hwỳr tẽ nê hã nhỹ nhũm mẽ hwỳr o tẽ.

14Hāmri nhũm ra arĩgro pê sêsta. Mẽ ixpê Ijaewjaja mẽ ixte Pas ã amnhĩ tomnuj mỳrapê mry hkwỳ hpar nê Tĩrtũm kôt pix mã amnhĩ nhĩpêx ã amnhĩ jarênh xà hã arĩgroja kato. Jakamã nhũm kaxkwa nhĩpôk ri myt nhỹ nhũm Piratja mẽ kot Jejus kator ã harênh prãm xàj arĩ mẽ kãm ho mẽ õ pahi hã harê nê mẽ kãm:

—E ota mẽ anhõ Pahihtita. Anê.

15Hāmri nhũm mẽ tee ri ã harênh anhỹrja ã kuma nê kãm:

—Kwa apĩ ri. Ma o tẽ nê pĩ kahpa hã anhõ kê tokyx ty.

Anê nhũm tee ri mẽ kuma nê mẽ kãm:

—Kwa nà. Kêp mẽ anhõ pahi kênã kot paj kêt ri axtem nê mẽ apê kupĩ. Anê.

Hāmri nhũm mẽ kãm:

—Nà kêp mẽ inhõ pahi hkêt. Pahi Sesti pix na kêp mẽ inhõ pahi. Anê.

Mẽ kãm Sesti hkĩnh kêt tã ã kãm Jejus htyk prãm xàj ri harênh anê.

16Hāmri nhũm Pirat tee ri ja hã mẽ kuma nê tã Jejus ã pôristi mã karõ nê mẽ kãm:

—E mẽ mãmri ma o tẽ nê pĩ kahpa hã anhõ kê ty. Anê.

Hāmri nhũm mẽ kuma nê ma o tẽ.

Mẽ kot pĩ kahpa hã Jejus nhôr ã mẽ harênh

Matêwre 27.32-44; Makre 15.21-32; Rukre 23.26-43

17Hāmri nhũm pôristija Jejus mã õ pĩ kahpa gõ nhũm kutu nê ma mẽ hkôt hkjênh o mõ. Nhũm mẽ krĩ rũm ho kato nê ma hixêt prêk wỳr o tẽ. Hixêt prêkja mẽ kot harênh o: “Korkot” anê. No mẽ ixpê Ijaewjê kapêr kãm na pa pre htem harênh o “Mẽ hkrã hi xà” anhỹr xwỳnhhta wỳr nhũm mẽ ma o tẽ nê hã ho api. 18Hāmri nê pikap pĩ kahpa xi nê hã Jejus xi nhũm hã nõ nhũm mẽ prek o ãhkra ho htỳx nê hpar o htỳx. Hāmri nê kaxyw hkakwỳ nê hkakwỳnh pa nê kamã pĩ kahpata xãm nê hity hpa nhũm Jejus kỳx pê ajêt. Hāmri nhũm mẽ mãânên wa ho hamêxkrut nê pĩ kahpa hã wa kunhõ nhũm wa kuri ajêt. Wa kot tanhmã amnhĩ tomnuj to xwỳnhja wa ho akutã Jejus nhĩjê nhũm wa uræk nê kỳxpê ajêt.

19Hāmri nhũm Piratja õ pôristi mã anê nhũm mẽ tap õ py nê hã tanhmã kagà hto nê kagà ho:

IJAEW NHÕ PAHI JEJUS NA JA

KÊP NAJARE NHÕ XWỠNH

20Nom mẽ ixpê Ijaew kapêr pix kãm hã kagà hkêt nê. Mãânên Gresjê kapêr kãm nê Raxĩjê kapêr kãm nhũm mẽ mãânên hã kagà nê Jejus mỳri kunhõ. Hāmri nhũm Ijaew kwỳjaja Jerujarê rũm hwỳr mra nê mẽ kot ã hã kagà nhĩpêx anhỹrta pumu nê kamã harê. Jerujarêja hixêt prêta wỳr jawỳ jakamã nhũm mẽ kurũm ohtô nê hwỳr mra nê omunh o kuhê.

21Hāmri nhũm patre hkrãhtũmjaja tee ri ã Jejus jarênh anhỹr ã kagàta

pumu nhũm ja mẽ kêp omnuj nê. Jakamã nhũm mẽ ma Pirat wÿr mra nê kãm:

— Kwa mon ka ri hã mẽ kãm anê nhũm mẽ axtem nê ã ri kagà nhĩpêx anê? Kwa nà kêp mẽ inhõ pahi hkêt. ãm htÿx ri kot ã kot amnhĩ jarênh anhÿr o pa kênã. Kwa hã kagàja o anhĩpa nê hpãnhã hã kagà ho: “Kêp Ijaew nhõ pahi hã kot amnhĩ to hêx xwÿnh.” Anhÿr o hpãnhã hã hipêx nê anhõ nà? Anê.

22Hãmri nhũm mẽ kuma nê mẽ kãm:

— Tk. Nà pa ho ixpinhpanh kêt nê. Ra ixte hã kagà hpar kênã. Anê.

Pôristijaja kot axpên mã Jejus xê ho pigràn

Matêwre 27.35-36, 27.55-56; Makre 15.24; Rukre 23.34

23Hãmri nhũm pôristijaja kot axpên mã Jejus xê o pigràn kaxyw amnhĩ tã haxwÿr o tẽ. Mẽ kêp 4 no nhũm Jejus xê kêp 5 jakamã nhũm mẽ amnhĩ kôt ho 4 nê haxwÿ nhũm pyxi nê hprã. Ê rytita. Na pre hipêx muxre. Nhÿhÿnh hkayr xà pumunh kêt kumrêx. 24Jakamã nhũm mẽ omu nê kãm hkĩnh nê. Hãmri nhũm hõ kot amnhĩm hpyr nê ho arĩk kaxyw nhũm mẽ hã kênre ho jôka. Na pre ra Tirtũm kapêr ã kagà htũm kot mẽ hkukamã ja hã mẽ harênh nê mẽ harênh kot:

Na prem axpên mã ixê o anhgrà nê hã kênre ho jôka ho hkrĩ.

Anhÿr o kot mẽ hkukamã mẽ harênh. Tã nhũm mẽ ra hkôt ã amnhĩ nhĩpêx anhÿr o hkrĩ.

Jejus kot Juãw nhĩhkram katorxà jaxàr ã harênh

25Nhũm Jejus par pê katorxà xa. Nê htõx nê Kropti hprõ Marir nê Marir Matarên mẽ nhũm mẽ Jejus katorxà nhĩhkô hã Jejus pumunh o kuhê. Nhũm amnhĩ tã mẽ omu 26nê mẽ kuri pa ixpê Juãw pumu. Hãmri nê kêp ixkrãmnhwÿ mex ã ixtã katorxà mã kapêr nê kãm:

— E ota Juãwta. Kojã ixpãnhã te kêp akra pyrãk o anhĩpêx nê tanhmã ato ajuta hto ho pa. Anê.

27Hãmri nê hpãnhã pa inhmã kapêr nê inhmã:

— E Juãw. Kêr ka te kêp akatorxà pyrãk o inhmã hipêx mex o ri apa.

Anhÿr jakamã pa kuma nê kot inhmã hã karõ xà hkôt inhõrkwÿ hwÿr haxà nê amnhĩ kôt ri ho ixpa.



Juãw 19.25-27

Jejus htyk ã harênh*Matêwre 27.45-56; Makre 15.33-41; Rukre 23.44-49*

28Tã nhũm Jejus ra amnhĩ pumu hãmri nê hamaxpêr o:

— Nà Inhĩpêêxà kot mêmoj tã inhmã karõta na pa ra kãm ho anhÿr o hitep xà xir kaxyw. Anê.

Hãmri nê kãm kôr ã amnhĩ jarê. Nom ra hkukamã Tirtũm kapêr ã kagà htũm kot htyk kaxyw nê kãm kôr kukamã harênh jakamã nhũm ã amnhĩ jarênh anê nê kapêr o:

Nà na pa ra inhmã kôr nê. Anê.

29Nhũm hpar pê guhkrax kãm wĩhti punureta ãm jakamã nhũm mē ã kot amnhĩ jarênh anhÿrja ma nê kaxyw mēmo rerek py nê o tē nê kaxyw pĩ ryti hō py nê ho hkanhwÿ. Nê akupÿn o tē nê ho wĩhti mã haxà nê kãm kupê. 30Nhũm hkaō nê hkaōr pa hãmri nê kapêr o:

E nã hãmri na pa ra mē piitã mē kot amnhĩ tomnuj pãnhã
amnhĩrer pa. Jao ra Inhĩpêêxà kãm hprãm xà hkôt kãm
tanhmã amnhĩ nhĩpêx to jatur xàm kumê.

Anhÿr o amnhĩ jarênhja kôt ahpar mã hkrã nê ty.

Mê kot kô xwa ho Jejus kamnhwÿr ã harênh*Wam Juãw 5.6-8*

31Nhũm ra sêsta nhũm apkati nhũm mē inhō arĩgromnu pê sap kaxyw. Sapja ã na hte mē ixpê Ijaew mē ixkĩnh pê Pas ã ixkĩnh rũnh o ixpa. Nhũm mē kãm sap ã arĩ mē htyk nê mē harir xwÿnhjê pumunh prãm kêt jakamã nhũm Ijaew krãhtũmjaja ma Pirat wÿr mra nê kãm:

— Kwa pôristi mã anê kê mē tokyx mē hte hi kukê kê mē htyk tokyx anê. Kê mē tokyx mē o wrÿ nê ma mē o mra nê mē hagjê. Kormã sap kêt ri. Anê.

32Hãmri nhũm mē kuma nê õ pôristijê mã anê nhũm mē ma mē hwÿr mra nê akutã wa kot Jejus nhĩjê nê jêt xwÿnhnta wa kumrêx wa hte hi hkwÿr. 33Hãmri nê hpãnhã Jejus wÿr tē nê omu nhũm ra htyk mex nê ajêt nhũm mē ja hã omu nê kêp hte hi hkwÿnh kêt nê. 34Nhũm pôristi hōja kô xwa py nê ho ihkjê rũm hkanhwÿ nhũm hkamrô mē ĩ kagô ahkã nê hprôt nhũm mē hkwÿja omunh o kuhê. 35Nê ixpê Juãw na pa pre ijaxwÿja mē ĩhkô hã xa nê ja hã omunh jakamã pa ã mē amã hã kagà anê. ãm hãmri na pa mē amã harê nê hã kagà. Mē ate kamã harênh nê harênh mar nê hkôt ajamaxpêr kaxyw. 36Na pre ra Tirtũm kapêr ã kagà htũm kamã ra hkukamã tanhmã kot mē pahwÿr mēnh xwÿnhnta jarênh to nê hã kagà. Nê hã kagà kot:

Koja mē nhÿhÿnh hi hkwÿnh kêt nê. Anê.

Tã nhũm mē ra hã kagàja kôt ã hipêx anê nê kêp hi hkwÿnh kêt nê. 37Nê Tirtũm kapêr ã kagà htũmja mããnen ja hã harênh kot:

Mê kot hpîr nê hkanhwÿr xwÿnhja koja mẽ hpar pê omunh o kuhê. Anê.

Tĩrtũm kapêr ã kagà htũm kamã ã Jejus tyk kukamã harênh kot anhÿr.

Mê kot Jejus jaxàr ã mẽ harênh

Matêwre 27.57-61; Makre 15.42-47; Rukre 23.50-56

38Tã nhũm Juje pê Arimatej nhõ xwÿnhja Jejus ra htyk ã omu nê ma Pirat wÿr tẽ nê hã kãm kapêr. Kot ma o mõi nê tokyx haxàr kaxyw. Na pre ra Jejus kôt amnhĩ xãm nom Ijaew krãhtũmjê pymaj mẽ kãm amnhĩ to amnhĩrit kêt nê. Jakamã nhũm ma Pirat wÿr tẽ nê hã kãm kapêr nê kãm:

— Pa e ot pa awÿr tẽ. Ixte mẽmoj tã amã ixkapêr kaxyw. Kot kaj apu inhmã “ÿ” anhÿr japêr. Kwa xà kot pa ma Jejus o mõi nê haxà? Anê.

Hãmri nhũm kuma nê kãm: “Nà mãmrĩ ho anê.” Anê hãmri nhũm ma hwÿr tẽ nê ho wrÿ nê kumÿ nê ma haxàr mã o mõi. 39Nhũm Nĩkotêja ma hkôt tẽ. Amnepê mã kot kamàt kãm Jejus wÿr htêm nê wa axpên mã kapêr o ÿr xwÿnhja. Jakamã ma Juje hkôt tẽ. Nê amnhĩ kôt mẽ hkuxwa xà hkwÿ ho mõi. ãm ho mõi rax kumrêx. Ho 34 kir nê kutu nê o mõi. Mẽ hkuxwa xàja na pre mẽ kot mẽmo kuxwa xà mã “mĩra” nê “aroe” anhÿr jarênhja nhũm kaxyw hkwÿ jakà nê ho ahkà nê ho mẽ hkuxwa xà nhĩpêx. Hãmri nê kutu nê ma Juje kot Jejus jaxàr nhũm kot ho hkuxwa kaxyw hkôt o mõi. 40Hãmri nhũm wa ho kupêxê kukõnh pa nê ho Jejus kupu. Mẽ ixpê Ijaew mẽ ixte mẽ htykjê jagjênh kaxyw ã mẽ hipêx anhÿr xà hkôt nhũm wa ã hipêx anê nê haxà. 41Nhũm ra mẽ kot pĩ kahpa hã nhõr xà tã mẽ kot mẽmo pĩ ho pa nê hkre xwÿnh kwÿ kuhê. Nê kamã kên kre nyw. Kormã mẽ kot kamã mẽ htykjê hõ jaxàr kêt xwÿnhja. 42Jakamã nhũm wa omu nê axpên mã:

— E kwa pu hwÿr Jejus o tẽ nê kamã mãn tokyx haxà. Kêr pu kormã sap kêt ri ra tanhmã amnhĩ to hpa. Anê.

Hãmri nê hwÿr kumÿ nê o tẽ nê kamã haxà nê hã hitom pa hãmri nê ma akupÿm krĩm wa tẽ.

Jejus akupÿm htĩr ã harênh

Matêwre 28.1-10; Makre 16.1-8; Rukre 24.1-12

20 1Tã nhũm sap tẽ nê hapêx nê hpãnhã semãn nyw krax xà pê tãmĩk. Hãmri nhũm Marir Matarên kwÿhtã kãnhmã nhÿ. Kormã myt kator kêt ri kãnhmã nhÿ nê ma kên kreta wÿr tẽ. Nê hwÿr põi nê tee ri hitom xà hã kên rax pumu. Nhũm ra nhãm hakwa kre kuhpa hã ri hikwÿ nhũm omu nê tee ri hkukamã hamaxpêr pê omunh o xa. 2Hãmri nê awjanã nê ma akupÿm hprõt nê nhÿri Simãw Pêtre nê pa ixpê Jejus krãmnhwÿ mex ã wa ixpumu nê hkaprĩ kamã wa inhmã harê nê wa inhmã:

— Xê na pěr mẽ pahpê mẽ panhõ Pahihti kapa nê nhỹhỹm ma o tẽ. Xê nhỹhỹm mãn pre wem o tẽ? Anẽ.

3Hãmri pa wa kuma nê hwỳr ixprõt kurê kumrêx. 4Hãmri pa Simãw Pêtre mã wa nê ixkumrêx hwỳr pøj. 5Nom kormã kên kre hwỳr ixàr kêt ri kormã hakwa krem inhikõt nê kaxwỳnh kãm nõi xà kamã Jejus japêr ixrît o xa. Nhũm kupêxê nhĩrê pix nõ pa omu. 6Hãmri nhũm Simãw Pêtre ixkõt tẽ nê ixrom krem àr kurê kumrêx nê kupêxê nhĩrêta pumu. 7Nê hkrã kupu xà pumu nhũm axtem hkrã muxre nê ahte nõ. 8Hãmri pa hkõt axà nê nõr xà kaprỳ pumu nê ijamaxpêr o:

— Hêxta waa nê. Nà mãn akupỹm htĩr. Hã na nõr xà hkaprỳ mex nê. Nà mãn akupỹm htĩr kãm ga. Anẽ.

9Ra Tĩrtũm kapêr ã kagà htũm kot ja kukamã akupỹm htĩr ã harênh tã pa wa kormã ixprĩ hã ja hã omunh kêt nê. Tã kên kre kaprỳ pumu nê kãm ijamaxpêr kurê kumrêx. 10Hãmri nê wa ixkato nê awjanã nê ma akupỹm wa ixkwỳjê hwỳr wa tẽ.

Jejus kot Marir Matarên wỳr kator ã harênh

Makre 16.9-11

11No nhũm Marir Matarênja arĩ kên kre kapem hkaprĩ nê mỳr o xa. Nê mỳr pê hikõt nê kên kre kamu 12nê kamã Tĩrtũm kapêr o wrỳk xwỳnh wa ho axkrut nê wa omu. Nhũm wa ê jakajre kamã wa nhỹ. Nhũm hõja hkrãm nhỹ nhũm hõja htem nhỹ. 13Hãmri nê wa Marir Matarên mã kapêr nê kãm:

— Kwa mon ka ri omu nê amỳr o xa? Anẽ.

Nhũm kãm:

— Xê nhũm. Na prem ma nhỹhỹm mẽ ixpê mẽ inhõ Pahihtija mỳ nê ma o tẽ nê hpãnhã nhỹri kuxi. Anẽ.

14Rôm nhũm Jejus tãm tẽ nê hkatut kõt xa nhũm Marir Matarên ho hakêx nê omu nom hprĩ hã omunh kêt nê. Omu nê htỳx ho axtem mẽhõ hã hkamnhĩx. 15Hãmri nhũm kãm:

— Kwa mon ka ri amỳr o xa? Mẽhõ na ka ri hapêr arĩt pê amỳr o xa? Anẽ.

Hãmri nhũm kuma nê htỳx ho pĩ hkre jamãr xwỳnh ã hkamnhĩx nê kãm:

— Xê xà ka na ka mẽ ixpê mẽ inhõ Pahihti ho ahkĩ nê ma o tẽ nê nhỹri axi mẽ? Xê ka japêr nê akatàt kõt inhmã harê. Nhỹri inhmã nõr xà jarê pa ma hwỳr tẽ nê kumỳ nê man akupỹn o tẽ nê akupỹm kên kre kamã kuxi. Anẽ.

16Hãmri nhũm Jejus kãm hixi jarê nê kãm:

— Kwa Marir Matarên. Amnẽ ixpumu nê arĩ ã akapêr anẽ nà. Anẽ.

Hãmri nhũm jatã hprĩ hã kuma nê ho hakêx nê amnhĩ jaêr pê hprĩ hã omu nê kãm:

—Xê Pahihti. Xep ka na ka. Hêxta gâà nê. Anê.

Nom mê ixpê Ijaew kapêr kãm Pahita jarênh o: “Raponĩ” anê. Nhũm ã kãm kapêr anê hãmri nê axte ma nhỹhỹm kêp htêm pymaj hpa hã kupy. 17Hãmri nhũm kãm:

—Kwa inhmã anhũre. Na pa kormã ma akupỹm Inhĩpêêxà hwỳr ixàpir kêt nê. E tokyx ma akupỹm tẽ nê ixtõ nê ixtõxjê mã ijarê. Na ka prem apê ixkràmnhwỳ pix tã ra mê apê ixtõ nê ixtõx na ka mê. Jakamã ma akupỹm mê hwỳr tẽ nê mê kãm ijarê. Nê mê kãm: “Na Jejus mê awỳr pêr mênh o: ‘Kot paj tokyx ma akupỹm Inhĩpêêxà Tĩrtũm wỳr api. Nom kêp pa Inhĩpêêxà pix kêt mãânên kêp mê Anhĩpêêxà na. Nê mãânên kêp mê anhõ Tĩrtũm na.’ Anhỹr o mê awỳr pêr mê.” Anê. E ma akupỹm mê hwỳr tẽ nê tokyx ã mê kãm ijarênh anê. Anê.

18Hãmri nhũm kuma nê ma akupỹm mê ixwỳr tẽ nê mê inhmã awjarê nê mê inhmã:

—Xê na pa ham mê panhõ Pahihtita pumu. Na akupỹm mê pamã htĩr. Anê.

Hãmri nê mê inhmã kot tanhmã kãm kapêr to hã harê pa mê kuma nê tee ri hkukamã ijamaxpêr.

Jejus kot hkwỳjê hwỳr kator ã harênh

Rukre 24.36-43

19Tã nhũm tòmĩk nê kamàt pa mê Jejus kôt ixpa ho ixpa xwỳnhjaja xpên wỳr akuprõ hãmri nê Ijaew krãhtũmjê pymaj hakwakre kahê hpa nê xpên mã ixkapêr o ixkrĩ. Nhũm Jejus mê ijaêr pê nhỹhỹnh mê ixwỳr axà nê mê ixkuri xa nê mê inhmã:

—Pa. Xà kormã mê anhõt kêt? Anê.

20Hãmri nê mê inhmã amnhĩ nhĩhkra kamã prek tatak xà jahkre nê hakỳx kôt mê kot hkanhwỳr xàja nhũm mê inhmã hahkre. Pa mê akupỹm htĩr kãm omu nê ixkĩnh tỳx kumrêx. 21Hãmri nhũm mê inhmã:

—E kwa kêr ka mê tee ri amnhĩ kukamã ajamaxpêr o amã ma ho ri apa hkêt nê. Na pre Inhĩpêêxàja mê awỳr inhmê pa pre wrỳ. Tã kot paj amnhĩ pyrã nê mê piitã mê hwỳr mê arê. Anê.

22Hãmri nê mê ixkaxyw htyyxà mê nê mê inhmã Tĩrtũm mê wa Karõ jarê nê mê inhmã:

—E koja Tĩrtũm mê wa Ixkarõja wrỳ nê mê akarõ mã gjêx pa. 23Ka mê ÿ hã ma mê piitã mê hwỳr apa nê mê kãm Tĩrtũm kapêr jarênh o ri mê hkôt apa. Nê nhỹri mênhõ pumu nê inhỹ hã kãm: “Kot kaj Tĩrtũm kôt amnhĩ xãm nhũm amnhĩ tã apumu nê anê ate amnhĩ tomnuj rênh pa.” Anê. Ka mê ã kãm akapêr anê nhũm mê ama nê hkôt amnhĩ xãm nhũm Tĩrtũm amnhĩ tã omu nê nê kot amnhĩ tomnuj rênh pa. Nom koja mê ama nê ãm mê ama nê hkôt amnhĩ xãm kêt japêr ka mê inhỹ hã kãm: “Nà kot kaj Tĩrtũm kôt amnhĩ xãm kêt nê nhũm anê ate amnhĩ tomnuj

rênh kêt nê.” Anhÿr o kãm akapêr nhũm Tirtũm ho anê nê nê rênh kêt nê. E kêr ka mê ã inhÿ hã amnhĩ nhĩpêx anhÿr o ri apa. Anê.

Nhũm pre ã Jejus mẽ inhmã kapêr anê hãmri nê kato nê ma nhÿhÿm tẽ.

Jejus kot Tomas mã kapêr ã harênh

Matêwre 28.17

24No nhũm mẽ inhĩõ pê Tomas pihpohtita kormã mẽ ixkĩnhã akupÿm Jejus htĩr kãm omunh kêt nê. Na pre ma kape hã tẽ nhũm wakre kamã mẽ ixwÿr axà nê mẽ inhmã kapêr hãmri nê ma nhÿhÿm tẽ. Jakamã nhũm Tomas akupÿn mẽ ixwÿr tẽ nê axà pa mẽ kãm harê nhũm tee ri mẽ inhma nê mẽ ixkôt hamaxpêr kêt nê. 25Nê mẽ inhmã:

—Nà kot pa ãhkra kamã prek tatak xà pumu nê kamã inhĩhkra hkrã jaxà. Nê hakÿx kôt hkanhwÿr xàta pa mã ho anê nê omu nê kamã inhĩhkra hkrã jaxà nê rĩ kormã akupÿm htĩr kôt ijamaxpêr. Anê.

26Tã nhũm semãn pyxi nê hapêx pa mẽ axte axpên wÿr akuprõ nê axte Ijaew krãhtũmjê pymaj amnhĩ tã kahê htÿx nê ixkrĩ. Nhũm Tomas tã mẽ ixkuri nhÿ. Hãmri nhũm Jejus axte nhÿhÿnh mẽ ixwÿr axà nê mẽ inhmã:

—Pa. Na ka mẽ rĩ akrĩ. Anê.

27Hãmri nê Tomas pumu nê hwÿr tẽ nê kãm ãhkra pê nê kãm:

—E ota inhĩhkra kamã prek tatak xàta. Mãmrĩ kamã anhĩhkra hkrã jaxà. Nê hpãnhã ijakÿx kôt mẽ kot ixkanhwÿr xà kamã mã ho anê nê haxà nê akupÿm ixtĩr kôt ixpumunh kurê kumrêx. Anê.

28Hãmri nhũm kuma nê kãm:

—Nà pêr ãm hãmri apê inhõ Pahihti Tirtũm na ka. Anê.

29Hãmri nhũm kãm:

—Tÿ. ãm ano ho ixpumunh kôt pix mã na ka ixkôt ajamaxpêr. Tã no ãm koja mẽ nhÿrmã mẽ amÿr pê mẽ pa xwÿnhjaja mẽ akĩnhã mẽ no ho ixpumunh kêt tã akupÿm ixtĩr ã ijarênh mar pix tã ixkôt hamaxpêr. Ja na mex kumrêx. Anê.

Juãw kot tanhmã amnhĩ jarênh to hã harênh

Rômãn 15.4; Wam Juãw 5.13

30Na pre Jejus kormã mẽ ixto pa ri mẽ inhnoo mã mẽmoj tanhmã hipêx to rax nê nom kot paj kagàja kamã piitã hã kagà hpar kêt nê. 31Ãm hkwy pix na pa mẽ amã hã kagà. Mẽ ate mẽ ixpyrà nê omunh nê kêt Tirtũm Kra hã kot mẽ pakaxyw ãm xwÿnh ã omunh nê hkôt amnhĩ xunhwÿr kaxyw na pa ã mẽ amã harênh nê hã kagà anê. Tã kot kaj mẽ amnhĩ kaxyw hkôt ajamaxpêr nê hkôt amnhĩ xunhwÿr hãmri nê nhÿrmã atyk tã nhũm akupÿm mẽ ato mẽ atĩr ka mẽ ixpyrà nê kuri amex nê atĩr tũm nê apa ho apa. Tã pa ã mẽ amã mẽmoj piitã harênh nê hã kagà anê.

Jejus kot hkwyjê hwÿr kator ã harênh

Matêwre 26.32, 28.7, 28.10

21 ¹Tã nhũm Jejus axte hkôt mẽ ixpa ho mẽ ixpa xwÿnh kwÿjê hwÿr kato. Himô pê Tipeja mÿri. ²Pa mẽ ixpê 7 nê axpên wÿr akuprô. Na pre Simãw Pêtre nê Tomas pihpohti nê Natãnaew. Natãnaewja Garirej kamã krí pê Kanã nhô xwÿnh na pre. Nê wa pa wa ixpê Jepetew krata wa nê wa inhîô wa pijakruuta wa. Pa prem wa mẽ nhÿri axpên wÿr akuprô. ³Hãmri nhũm Simãw Pêtre mẽ inhmã:

— E pa jarãhã ma tep wÿr tẽ nê hkwÿmnê. Anê.

Pa mẽ kuma nê kãm:

— Tôe. Nà pa mẽ ijaxwÿja ma akôt mō. Anê.

Hãmri nê mẽ ma himô rax pê Tipeja wÿr mō nê kanôre mã agjê nê gôx kãm kryhti rênh o ixkuhê. Nom tee ri ho tep ômnênh kaxyw rênh o ixkuhê nê hōmnênh kêt nê ixtã apkati nhũm tep amrakati kumrêx.

⁴Tã nhũm myt kato nhũm Jejus gô mÿri xa. Pa mẽ ixpiitã omu no ãm ixprí hã kêp Jejus ã omunh kêt nê. Tã no nhũm tãm xa. ⁵Hãmri nê mẽ inhmã kapêr nê mẽ inhmã:

— Pa. E mãn ka mẽ ra tep kwÿmnênh rax nê nà? Anê.

Hãmri pa mẽ kãm:

— Tk. Nà mo tep? Amrakati kumrêx kênã. Anê.

⁶Hãmri nhũm mẽ inhmã;

— Xô wehe? Tôe. Axte mẽ axupôk rũm kryhti mẽ nê omu. Anê.

Hãmri pa mẽ mar xà hkôt ho anê nê kumê. Hãmri nhũm kamã tep hipu rax kumrêx nhũm utí rax nê. Pa mẽ tee ri ixte ho ixàpir kaxyw ri hkukjê. ⁷Hãmri pa kêp Jejus ã omunh kurê kumrêx nê Simãw Pêtre mã kãm:

— Kwa pêr mẽ panhō Pahihitita na. Anê.

Hãmri nhũm inhma nê hkĩnh tÿx nê akupÿm hinôkà jaxà nê gôx kãm mrô nê ma hwÿr ho nana ho tẽ. ⁸Hãmri pa mẽ hkôt kanôre kamã kryhti kjênh o mō. Ra amgrã hwÿr amgrire. Wÿr 100 met pix jakamã pa mẽ hwÿr ixpôx tokyx anê. ⁹Nê pàr o hkre kura nê kuxi nê ijapôx pa nê Jejus wÿr ixprôt nê mra. Nhũm ra mẽ ixkutêp kuto nê par nhípêx nê nhÿhÿnh tep kwÿ par kãm haxwÿ nê



Juãw 21.1-8

ho àr o nhỹ. Nẽ kaxyw pãwti nẽ amnhĩ ri haxwỳ nẽ o nhỹ. 10Hãmri nẽ mẽ ixpumu nẽ mẽ inhmã:

—E mẽ amně anhõ tep o mra pu mẽ hkuxôt nẽ kuku. Anẽ.

11Hãmri nhũm Simãw Pêtre akupỹm pàr wỳr tẽ nẽ kryhti ho htỳx xà hpôt nẽ amgrà hwỳr hkjênh o mỗ. Kamã tep rũnh pix. Nẽ ohtô nẽ. Kamã kệp 153 nẽ hikwỳ htã nhũm nhỹhỹnh kryhti hkwy pìkaxônh kêt nẽ. 12Hãmri nhũm Jejus mẽ inhmã:

—E kwa mẽ tokyx mra pu mẽ apku. Anẽ.

Hãmri pa mẽ kuma nẽ hwỳr mra nẽ ixkrĩ pa. Hãmri nẽ tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhỹr ã omu nẽ kệp mẽ inhõ Pahihti hkôt omunh kurê kumrêx jakamã hixi hã hkukjêr kêt nẽ. ãm akryk omunh o ixkrĩ. 13Hãmri nhũm mẽ inhmã pãwti ho hkry pa. Nẽ hpãnhã tep jamỳ nẽ mã ho anẽ nẽ ho hkry pa nẽ ho mẽ inhĩpêx pa pa mẽ ixàpkur o ixkrĩ.

14Nhũm Jejus akupỹm htĩr kãm ra ahpỹnhã mẽ ixwỳr hapôx o axkrunêpxi.

Jejus kot akupỹm tãm Simãw Pêtre xãm

Ate 20.28-31; Wam Pêtre 5.1-4

15Tã pa mẽ ra ixàpkur pa nẽ kànhmã ixkuhê nẽ gô mỳ ri mra. Hãmri nhũm Jejus Juãw hkra Simãw Pêtre mã tanhmã kapêr to. Nom ixpê Juãw nhũm kệp ixkra hkêt axtem Juãw õ hkra na pre. Jakamã nhũm Jejus kãm kapêr nẽ kãm:

—Kwa Simãw. Xà we amã ijapê ho ate pika hkôt mẽmoj piitã hakrenh par nà? Anẽ.

Hãmri nhũm kuma nẽ kãm:

—Tỳ inhmã ajapê htỳx kênã Pahihti. Ra ate ja hã amnhĩ tã ixpumunh mex. Inhmã ajapêê. Anẽ.

Hãmri nhũm kuma nẽ kãm:

—Tôe. Nà kêt ka inhmã mẽ kot ixkôt amnhĩ xunhwỳr xwỳnhjê jahkre mex o ri mẽ hkôt apa. Te ho ôwêhti hkrare jamãr xwỳnh kot hamãr mex o ri hkôt pata pyræk. Anẽ.

Hãmri nhũm kãm:

—Tôe. Nà kot paj amã mẽ ho anẽ. Anẽ.

16Tã nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê. Xà we amã ijapêê nà? Anẽ.

Hãmri nhũm kãm:

—Tỳ. Ra ate inhmã ajapê hã ixpumunh kênã. Anẽ.

Hãmri nhũm kê axte kãm:

—Tôe. Kêt ka inhmã mẽ kot ixkôt amnhĩ xunhwỳr mã xwỳnhjê

jahkre mex o ri mẽ hkôt apa. Te ho ôwêhti jamãr xwÿnh kot ôwêhti jamãr mex o hkôt pa xwÿnh kot amnhĩ nhĩpêx pyrãk. Anẽ.

Hãmri nhũm kãm:

— Nà kot paj amã mẽ ahkre mex o ri mẽ hkôt ixpa. Anẽ.

17Tã hãmri nhũm hã ahtũmre nhũm kê axte kãm:

— Kwa Simãw. Xà we ãm hãmri na ka inhmã amnhĩ jarẽ? Xà we amã ijapê htÿx kumrêx nã? Anẽ.

Hãmri nhũm tee ri amnhĩ tã kuma nẽ hkaprĩ nẽ. Ra kot amnhĩ tã hkukjêr o axkrunêpxi jakamã nhũm hkaprĩ nẽ tee ri hamaxpêr. Hãmri nẽ kãm:

— Kwa Pahihti. Ate mẽmoj piitã omunh par. Nẽ ate inhmã ajapê htÿx ã ixpumunh par kênã. Anẽ.

Hãmri nhũm kê axte kãm:

— Tôe. Kêr ka inhmã mẽ kot ixkôt amnhĩ xunhwÿr mã xwÿnhjê jahkre mex o ri mẽ hkôt apa. Te ho ôwêhti jamãr xwÿnh kot hamãr mex o ri pata pyrãk. Anẽ.

Hãmri nhũm kãm:

— Nà kot paj amã mẽ ho anẽ Pahihti. Anẽ.

Simãw Pêtre tanhmã htyk to hkukamã harênh

18Nhũm Jejus arĩ Simãw Pêtre mã kapêr nẽ kãm tanhmã htyk to hkukamã harênh to nẽ kãm:

— Kwa ixkapêr ma nẽ amnhĩ krã him haxàr tÿx nẽ hã apa Simãw Pêtre. Nà kormã anyw ri na ka pre hte ma nhÿhÿm apa kaxyw nẽ anojarêr hãmri nẽ anhĩnôhkà mex jagjê nẽ ma nhÿhÿm amã apa hprãm xà hkôt ri apa. Tã kot kaj apigêr nhũm mẽ apynê nẽ akahti hpre nẽ apa hpre nẽ ma nhÿhÿm ato mõi mẽ kãm amnhĩ gõi nẽ amnhĩ nê tanhmã mẽ kãm nẽ hkêr nẽ. Amã mẽ hkôt amôr prãm kêr tã mãmrĩ mẽ kãm amnhĩ gõi kê mẽ ma nhÿhÿm ato mõi. 19Tã kêr ka arĩ ixkôt amnhĩ xãm tÿx nẽ atĩr prãm xaj mẽ umaj axte ixkaga hkêr nẽ. Hãmri nhũm mẽ apĩ nẽ tanhmã atyk to hã apumu nẽ amã Tĩrtũm kĩnh ã apumunh mex kurê kumrêx. Hãmri nẽ atã Pahi Maati Tĩrtũm mex o mex ã harê. Anẽ.

Nhũm pre ã Jejus Simãw Pêtre tyk kukamã kãm ujarênh anẽ. Hãmri nẽ kãm:

— E kêr ka ixte amnhĩ to htÿx nẽ amarĩ mẽ kãm ixãm nhũm mẽ kot ixpĩrja pyrã nẽ ã amnhĩ nhĩpêx anẽ. Anẽ.

Hãmri nhũm kuma nẽ kãm:

— Tôe. Nà kot paj hãmri tã ã amnhĩ nhĩpêx anẽ Pahihti. Anẽ.

Juãw tyk kukamã tanhmã harênh to hkêr ã harênh

20Nhũm pre ã Jejus Simãw Pêtre mã tanhmã htyk to hkukamã harênh anẽ. Hãmri nhũm kuma nẽ ixpê Juãw ã ixto hakêx nẽ ixpê Jejus

kràmnhwỳ mex ã ixpumu. Kormã Jejus htyk kêt ri kamàt kãm mẽ ixàpkur o ixkríta ã na pa pre ìhkô hã ixàpkur o nhỹ nê kot mẽ kãm òr mã xwỳnhta nhĩxi hã hkukja. ²¹Jakamã nhũm Simãw Pêtre ixto hakêx nê ixpumu nê ixtã Jejus kukja nê kãm:

—Kwa no pêr pahkôt môr mũj? Tanhmã koja we htyk to? Anê.

Hãmri nhũm kãm:

22—Nà kot paj amã tanhmã htyk to hkukamã harênh hkêt nê. Kot pa inhmã arĩ kritpêm pa rãhã pa akupỹn ixwrỳk prãm nhũm arĩ pa nê htyk kêt rãhã pa akupỹn wrỳ. Kêr ka ri htyk kukamã tee ri tanhmã ajamaxpêr to hkêt nê. ãm ixkôt pix mã ate amnhĩ nhĩpêx tỳx pix kukamã mã ajamaxpêr o ri apa.

23Anhỹr o kãm ijarênh jakamã nhũm mẽ ixkwỳjaja kot ã ijarênh anhỹrja ã kuma ma nê htỳx nhỹrmã ixtyk kêt ã ixkamnhĩx. Nê gaa nê rĩ piitã axpên mã ã ijarênh anhỹr o pa. Nom na pre ã ijarênh anhỹr kêt nê. Na kêt pre ijarênh o:

—Kot pa inhmã arĩ ri kritpêm pa rãhã pa akupỹn ixwrỳk prãm nhũm arĩ pa nê htyk kêt rãhã pa akupỹn wrỳ.

Anhỹr o ijarê. Nom ãm hãmri ixtyk kêt rãhã nhũm akupỹn wrỳk ã ijarênh kêt nê.

**Juãw kot Jejus kot tanhmã amnhĩ to hã kagà hpar kêt ã
kot amnhĩ jarênh**

Juãw 20.30-31

24E na pa mẽ amã Jejus kot tanhmã amnhĩ nhĩpêx to ho pa hã harê nê hã kagà. Ixpê hkôt ri ixpa ho ixpa xwỳnhjê hõ na pa ãm hãmri ã hã kagà anê. Ka mẽ kamã harê nê ama nê ãm hãmri ixte kagà nhĩpêx kôt ixpumunh mex kurê kumrêx. ²⁵No na pre Jejus ãm ja pix o anhỹr o pa hkêt nê. Na pa ãm mẽ amã hkwỳ pix jarê nê hã kagà. Na pre tanhmã ri mẽmoj to rax kumrêx o ri pa. Nom kêp ãm ixte kot tanhmã ri amnhĩ nhĩpêx to piitã hã kagà hpar ronhỹx hã kagàja katutxô rax kumrêx. Jao te ra kaxkwa htêp o môr pyræk.

Tã ãm ja pix. Na hapêx.